

ASO LULU, 21 IUNI 2017

Na nofoia le Nofoa e le Fofoga Fetalai i le itula e 9:00 i le taeao.

Tatalo.

SAUNOAGA FAAFEILOAI A LE FOFOGA FETALAI

FOFOGA FETALAI: Ou te faasilasila atu ua amatalia nei Taulumaga a le Fono Aoao Faitulafono.

O lele ua tuvaga i figota ae olioli livaliva le aso ona o le alofa ma le agalelei o le Atua. Aua sa tatou momoe ma outou tofafa i manu e le fati ae sau mala e atiae i lo outou soifua ma lo tatou ola. Peitai, ana le seanoa le Atua na ia i tatou, e le mafai ona faataunuina le tatou galuega i lenei taeao fou. Ia faamalo le lagi e mama, faamalo le soifua manuia i le paia o le tatou Palemene.

E i ai le manatu o le a ou le toe faloina le afaloloa i o outou paia faale-Malo, ma o outou paia faale-Atunuu, aua e tumau e leai se iota e mafai ona toesea. Ia alo maia ia manuia le tatou Fonotaga.

E faapea foi ona faapai atu i le paia maualuga i le tapuaiga a Samoa e le toe tauaufagaina i se lagona ma se upu a le Nofoa, aua o Samoa o le atunuu tofi, e taoto lava o outou paia ma o outou mamalu faalupe nei seia oo i le faavavau. Ia tapuai maia ma se manuia le atunuu pele o Samoa, aemaise o le Aufaigaluega Totofi a le Atua.

MALELEGA MAI LE AO O LE MALO

Na fofogaina e le Fofoga Fetalai le Malelega mai Lana Afioga Mamalu, O Le Ao o le Malo.

“TUSI mo:

Le Fofoga Fetalai:

E tusa ai ma le Mataupu 59 o le Faavae o le Malo Tutoatasi o Samoa, ua ou tuuina atu nei le maliega i le Fono Aoao Faitulafono na te iloiloaina ai le Tulafono Tau Faaofi ua faalia iinei:

1. Tulafono Tau Faaofi o le Pueina o Ata Tifaga (Faiga Faatosina Faapisinisi o Lafoga) 2017.

21 IUNI 2017

Faasilasilaga mai le Taitai o le Maota

TUUINA ATU i lou nei Lima i lenei aso 20 o Iuni 2017.

(Sainia): **Tui Atua Tupua Tamasese Efi**
O LE AO O LE MALO.”

FAASILASILAGA MAI LE TAITAI O LE MAOTA

Na fofogaina e le Fofoga Fetalai le Faasilasilaga mai le Taitai o le Maota.

FOFOGA FETALAI: E tusa ai ma le Tulafono Tumau 76 a le Palemene ua tuuina atu nei le Faaaliga i le Fono Aoaofa Fautulafono mo le iloiloaina o Tulafono Tau Faaofi ua faaaliga iinei:

1. Tulafono Tau Faaofi o Teuteuga o le Tulafono o Galuega tau Leoleo 2017.
2. Tulafono Tau Faaofi o Auupega Malolosi 2017.
3. Tulafono Tau Faaofi o le Faamauina o Tagata Solitulafono i Faiga Aiga Mataga 2017.
4. Tulafono Tau Faaofi o le Malosi Faasaoina 2017.

TUUINA ATU i lenei aso 19 o Iuni 2017.

(Sainia): **Susuga Hon Tuilaepa Auelua Fatiafalo Lupesoliai Lolofietele**
Neioti Aiono Galumalemana Dr. Sailele Malielegaoi
TAITAI O LE MAOTA.

TUUINA ATU O PEPA

Na tolaulau e le Failautusi Pepa nei ua faataatia i luga o le Laulau a Fono e tusa ai ma le T.T.48.

1. P.P. 2017/2018 Nu.2, Lipoti Faaletausaga a le Matagaluega o le Soifua Maloloina mo Tausaga, Iulai 2014 - Iuni 2015 & Iulai 2015 - Iuni 2016.
2. P.P. 2017/2018 Nu.9, Lipoti Faaletausaga a le Matagaluega a le Palemia ma le Kapeneta mo 1 Iulai 2015 - 30 Iuni 2016.
3. P.P. 2017/2018 Nu.13, Lipoti Faaletausaga a le Komisi o Galuega a le Malo mo le Tausaga Faaletupe 2014/2015.
4. P.P. 2017/2018 Nu.46, Lipoti Faaletausaga a le Matagaluega o Punaoa Faalenatura ma le Siosiomaga mo le Tausaga Faaletupe 2015/2016.

21 IUNI 2017

Tuuina atu o Lipoti a Komiti Faa-Palemene

5. P.P. 2017/2018 Nu.47, Lipoti Faaletausaga a le Matagaluega o Faamasinoga ma le Faafoeina o Tulaga Tau Faamasinoga mo le Tausaga Faaletupe 2014/2015.
6. P.P. 2017/2018 Nu.48, Lipoti o le Usugafono a Sui Usufono o le Palemene o Samoa i le Semina Faaitulagi a Palemene o le Pasefika na usuia i Suva, Fiti, 2017.
7. P.P. 2017/2018 Nu.49, Lipoti o le Usugafono i le Fono Aoa Lona 136 a le Iuni Faa-Palemene na usuia i Dhaka Bangladesh, aso 1-5 Aperila 2017.

TUUIINA ATU O LIPOTI A KOMITI FAA-PALEMENE

Na tolaulau e le Failautusi Lipoti a Komiti Faa-Palemene nei ua faataatia i luga o le Laulau a Fono e tusa ai ma T.T.51(5).

1. P.P. 2017/2018 Nu.51, Lipoti a le Komiti o Tupe Maua ma Tupe Totogi i le P.P. 2017/2018 Nu. 1, Tala Faatatau o Tupe Maua ma Tupe Totogi a le Malo o Samoa mo le Tausaga Faaletupe 2017/2018.
2. P.P. 2017/2018 Nu.52, Lipoti a le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae i le Tulafono Tau Faaofi o Teuteuga o le Tulafono o Galuega a le Malo 2017.

**TULAFONO TA FAAOFI O LE FAATATAUINA O TUPE 2017/2018
- felafolafoaiga i luga o le faitauga faalua**

FOFOGA FETALAI: E tusa ai ma Tulafono Tumau 132, o le a faaauau felafolafoaiga i le Tulafono Tau Faaofi o le Faatatauina o Tupe 2017/2018, ma e tatau ona saunoa sao lava i tulaga tau tupe ma le tamaoaiga o Samoa faapea faiga faavae tau tupe a le Malo.

O le avanoa leni mo se sui usufono muamua e fia saunoa, faamolemole tulai mai.

Ma lou faaaloalo a o talia se sui usufono e tulai mai e tamua aua le saunoaga o le Tala Faatatau Autu o le Tupe, ou te faasilasila atu ma le agaga faaaloalo i le paia o le Palemene, e avea au e fai ma sui auai o le Polokalame Faa-Palemene mo Kolisi 2017. Mo le silafia e le Maota, ua nofoia nei le nofoaga mo tagata lautele o sui auai o le Polokalame Faa-Palemene mo Kolisi 2017.

O le lima leni o tausaga talu ona faatino le faamoemoe a le Palemene mo Kolisi. O sini autu o nei taumafaiga, o le aoaoina lea o alo ma fanau i nafa ma matafaioi a le Palemene e pei o ona sui usufono ma Komiti Faa-Palemene. O se vaega o le latou polokalame i le aso, o le auai mai i Taulumaga a le Palemene e molimauina le faagasologa o ana galuega.

21 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga i luga o le faitauga faalua**

E avea ai lou leo e fai ma sui o le Palemene e faatalofa ma faafeiloai atu ai i lenei taeao i a outou susuga i faiaoga, aemaise o alo ma fanau ua mafai ona auai mai i lenei polokalame i lenei foi tausaga. O le matou tatalo atoa ai ma Taitai o le Malo i lenei taeao, ia agalelei le Atua i taualumaga uma o la outou polokalame mai i lenei aso.

Ia tulai maia o lea ua avanoa le Palemene mo sui usufono e fia saunoa e tusa ai o le tatou galuega. Ia tulai mai le sui usufono mo Lefaga ma Faleaseela, ia o le sui usufono foi lea sa tamua foi i le tatou Tala o le Tupe talu ai, ia tulai maia, masalo o le tofiga lava lea o Lefaga ma Faleaseela o le tamua. Tulai mai le sui usufono mamalu mo Lefaga ma Faleaseela.

Afioga TOLEAFOA KEN VAAFUSUAGA POUTOA (Lefaga & Faleaseela): Lau Afioga i le Fofoga Fetalai, faafetai mo le avanoa o lenei itumalo o Lefaga ma Faleaseela.

O lea ua maea ona e toto le niu i le tuaoi i le vatapuia ma lo tatou Matai, ua maea foi ona e fofola paia o Samoa, ua laasia foi le paia aua le tapuaiga a le Auaigaluega paia a le Atua i so o se fata faitaulaga aua se manuia o Samoa.

Ou te faatalofa atu foi i Lana Afioga Mamalu, O Le Ao o le Malo ma le Masiifo. E faatalofa atu foi i le vaa seetolu i Sui Usufono o le Fono a Sui Tofia ma outou Masiifo. E faatalofa atu foi i lau Afioga i le Faamasino Sili ma le Ofisa o Faamasinoga. E faafeiloai atu i lau Afioga i le Faauluuluga o le Malo, lau Afioga i le Palemia, le Sui Palemia o le Kapeneta ma Minisita Lagolago ma sui usufono mamalu o le Palemene o Samoa.

E le galo foi Faauluuluga o Matagaluega ma Faalapotopotoga o le Malo, e faapea foi nisi o alo ma fanau ua mafai ona tatou faatasi i lenei taeao e molimauina le Fono.

Lau Afioga i le Fofoga Fetalai, e momoli atu le agaga faafetai i le Minisita o Tupe ma le Matagaluega o Tupe ona o le Tala o le Tupe o le tatou Malo. Malo le lufilufiina o le tamaoaiga o Samoa.

Ae le i faaalua la se manatu i le Tala o le Tupe, e momoli atu lau faafetai i a tatou paaga mai fafo i meaalofoa e tuuina mai i lea tausaga ma lea tausaga, aua lo tatou Malo. Malo faafetai. O le Tala o le Tupe ua taoto nei, e matuai lagolagoina e lenei itumalo, faatasi ai ma ni fautuaga ma nisi o talosaga e fia tuuina atu, lau Afioga i le Minisita mo Galuega, Felauaiga ma Atinae Eseeese a le Malo, faafetai mo le faatinoina e le Matagaluega Eseeese o lo o i lalo o lau Matagaluega nisi o faamoemoe aua le faaleleia o nuu, afioaga ma itumalo. E agai muamua sau faamatalaga i lau Afioga i le Minisita mo Galuega, o le auala lea i Matafaa, masalo sa ou taua foi i lau uluai saunoaga i totonu o le Palemene, o lea ua toe talosaga atu i lau Afioga i le Minisita, ua fai sina faaletonu o le auala lea o lo matou itumalo, faapea foi le fesootaiga o le auala lea e agai mai i Falelatai agai i Faleaseela, e molimauina masalo e i ai se taimi afio atu lau Afioga i le Minisita, ia e taua lenei auala ona o le feafioai o le atunuu e taamilo ia Samoa, e faaletonu lava le auala lea i le fesootaiga o Falelatai ma Samatau.

21 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga i luga o le faitauga faalua**

E oo foi i le auala lea i Savaia lau Afioga i le Minisita, o le auala i Safaatoa ma le auala i Gagaifolevao, e fia faaleleia foi ia auala. E tuu atu foi i autafa o lau Afioga i le Minisita le auala lea i le Mataaga i Matareva i Matautu, se i alofa ifo lau Afioga, ua tele foi le sao o lenei mataaga aua le uunaia o tagata tafafao maimoa mai i totonu o le tatou atunuu, aemaise foi e afifio atu ma maimoa tafafao i lea afioaga, e taua foi le fia faaleleia o ia tulaga lau Afioga i le Minisita, aemaise foi o le pueinao le ata lauiloa foi lea o le Survivor, o lea sa faatino i se tasi o afioaga o lo matou itumalo. Ia o le tatalo atu lea i lau Afioga i le Minisita.

E agai foi se faamatalaga i lau Afioga i le Minisita mo Galuega, Felauaiga ma Atinae Eeseese le auala laupapa foi lea i le va o le Liua o le Vai o Sina i le afioaga o Faleaseela, e toe faamanatu i lau Afioga i le Minisita, se i e silasila ane i lea auala, auaa a oo ina pa le vai, e matua poloka atoa le feafioai o le atunuu e afifio i lea itu o le atunuu pe a poloka le auala lea. Ona toe tatalo atu lea i lau Afioga i le Minisita mo Galuega, Felauaiga ma Atinae Eeseese, se i e alofagia le auala galue o si o matou nuu o Faleaseela ma Tafagamanu. O afioaga nei, e le i oo lava i ai se auala galue lau Afioga i le Minisita, o lea e toe tatalo atu ai ma le agaga faaloalo, o le a le tofa o fea o i ai lau faasoa, ia e alofagia auala o Faleaseela ma Tafagamanu, e le i i ai ni auala galue. Ona oo mai lea i le Vaega o le suavai, o lea ua maitau e 2 miliona lea ua tuu mai e le Vaega foi lele o le Ofisa Pulega o Suavai mo le community service, e faaoo atu ai le vai i nuu i maota ma laoa i nisi o afioaga e lei oo i ai le tosoina o le vai.

E tatalo atu e i ai si o matou pitonuu nei i uta i Faleaseela Uta, iina i auala galue, ua tele ina nofoia lea pitonuu i uta, e taua o Vailuu. Sei e alofagia ifo sei faaoo atu i ai le tosoina o le suavai i lea pitonuu lau Afioga i le Minisita. Ia e talosaga atu foi i le matou nuu i Tanumalala, o lea ua maua o le a faagasolo galuega lelei a le malo aua le fausiaina o le tatou falepuipui. O lea e tatalo atu, e moomia foi le suavai i lea pitonuu o le matou afioaga.

Ia ma le talosaga mulimuli i le Matagaluega o Suavai, sei alofa ifo lau Afioga i le Minisita sei silasila ifo i le vailaau foi lele e tuu i faatanoa o le suavai pei lava ua tau malosi tele le vailaau lea e tau aafia ai nisi o le matou afioaga o lenei itumalo pei ua ova le vailaau lea ua tuuina i tane vai aua le fofoga taumafa o le paia ma le mamalu o le matou itumalo.

Ia ona ou oo mai lea i le Matagaluega o le EPC, lau Afioga, e tatalo atu, e moomia lava ni o matou moli auala. E pei lava ona silafia e lau Afioga, o nisi lava o afioaga o le itumalo, o lo o fai si pogisa, o lea e tatalo atu ai i lau Afioga, o lea o le a faagaioi le falepuipui i lo matou itumalo, ia e manaomia le malamalama lelei o afioaga aua foi le saogalemu o nuu ma afioaga. Ia o le talosaga lea i lau Afioga i le Minisita o Galuega.

Ona ou oo mai lea i le Afioga i le Sui Palemia, lau Afioga i le Minisita o le Siosiomaga, e toe tatalo atu i lau Afioga, tatou auala foi ia fesulufai aua aso louloua o le tau po o taimi i le lolovai ma sunami. E toe faamanatu atu ia le talosaga auala fesulufai o Faleaseela ma Tafagamanu. Toe pau ia o afioaga e leai ni auala fesulufai i taimi o mala faalenatura.

21 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga i luga o le faitauga faalua**

Ia e faaopopo atu i lau Afioga i le Minisita, o le faletalimalo lea o le Return to Paradise lea i Matautu, masalo e tatau ona i ai se auala faapea lau Afioga i le Minisita.

Ia ma e toe faamanatu atu ia le talosaga a lenei itumalo i taligalu a Gagaifolevao ma Faleaseela, ia e maitauina ua siisii le suasami. Ua aafia foi ia fanua ma elelee, ia e manaomia le faaleleia o taligalu o Gagaifolevao ma Faleaseela.

Ia ona ou oo mai lea i le Minisita o Faatoaga, e momoli atu le agaga faafetai i lau Afioga i le Minisita, ona o tatou maketi foi ia lea ua i ai nei mo le lauina o le tatou talo ia ma nisi o faaeleleaga i atunuu i fafo. E momoli foi le agaga faafetai i lau Afioga i le Minisita ona o le vave ona tali mai o le Matagaluega i se faatalaauula atu a lenei itumalo i se tasi o afioaga i le tau aafia faamai talo lea ua tau tulai mai. Ia ae tatou faamoemoe i le Atua, o ia e i ai lana faasoa ma lana pule faasoa ina ia aua nei oo mai ia faamai i totonu o le tatou atunuu, toe aafia ai foi le faamoemoe o lea ua sologa lelei le aveina o le tatou talo i atunuu i fafo. Ia, alofagia e le Atua ma ia manuia pea le faamoemoe o le malo aua ia taumafaiga lelei ia aua se manuia o le aufaifaatoaga.

E tatalo atu foi i lau Afioga i le Minisita o Faatoaga, e pe leai ni nai masini foi ia e siitia ai le galueina o faatoaga. Masalo a i ai ni masini faapea, ia e fesoasoani foi i faifaatoaga lima vaivai, ina ia mafai ona faavavevave ia le galueina o fanua ina ia mafai ona vave ona toto tiapula aua le faamoemoe o le tatou malo i le siitia lea tulaga aua maketi i fafo. Ia e momoli foi le agaga faafetai i lau Afioga i le Minisita, ona o se galuega foi fesoasoani a le malo i se tasi foi o tamalii o lenei itumalo o lo o taumafaia le tatou talo foi lele faafulisa po o le frozen taro. Ia e momoli atu ai le faafetai i le Afioga i le Minisita mo le fesoasoani foi a lea tamalii, ia ae tuu atu i ou autafa lau Afioga i le Minisita o Faatoaga, o lea e te naunau e unai le tatou talo, ae paga lea, o le matou afioaga i Faleaseela, e faaletonu le auala. O le auala galue o faifaatoaga, o lea ou te tatalo atu i lau Afioga, sei e fesoasoani ifo i lea faamoemoe. Afai o lea ua e silafia o lea ua e mautinoa ua ova ma le 20 container talo o lenei afioaga ua ave i Niu Sila, ia sei e alofa ifo lau Afioga i le Minisita, i le auala galue, o la ua talosaga atu i le Afioga i le Minisita o Galuega, ia ae moomia le fesoasoani a lau Afioga, ina ia faavavevave ona faatino lea faamoemoe.

Ia ona ou oo mai lea i le Matagaluega o Tineimu. Ia masalo sa ou lauga ai i lau uluai lauga i totonu o le Palemene, talosaga ma toe faamanatu i lau Afioga i le Minisita, se tatou taavale foi lele aua le tatou taulaga. E ao lava ona tatou tapena aua e i ai le taimi e tulai mai ai ia faalavelave faafuasei, ao lo o lava tapena lea faamoemoe aua ia tulaga faapea.

Ia e oo atu lea o se faamatalaga i le Minisita o le Polenisia, e momoli atu le agaga faafetai o lenei itumalo. O lea ua ae se tofa i le Malo, se i toe fai se tatou vaalele. Ioe, se ua taugata pasese e malaga i Niu Sila ma Ausetalia. Ia e faigata, ae o le toatele o e femalagaai i le va lea o Niu Sila ma Ausetalia, ia e toatele lava i le paia ma le mamalu o le tatou atunuu.

21 IUNI 2017

**Tulafono Tau Faaofi o le Faatatauina o Tupe 2017/2018
- felafolafoga i luga o le faitauga faalua**

O lea e lagolagoina e lenei itumalo le toe faatulai mai o se tatou vaa e fesoasoani i le taugata o pasese.

Ona ou agai mai lea i le Minista mo Aoga, Taaloga ma Aganuu, e momoli atu le agaga faafetai o lenei itumalo i lau Afioga i le Minisita, lea ua maea le galuega o le faleaoga i Savaia, lea foi ua maea le galuega i Faleaseela, malo faafetai. Malo le tofa i lau Afioga, lea ua faataunuuina ma o la foi ua faaaogaina e alo ma fanau o lenei itumalo, momoli atu ai le agaga faafetai i lau Afioga i le Minisita ma le Malo. Ae pau lava o lea, talosaga atu i lau Afioga, o lena ua e silafia le ta malaetaalo foi lea i luma o le faleaoga i Faleaseela ma Savaia, e manaomia lava le fia faaleleia lau Afioga i le Minisita. O lena ua uma ona ta talanoa o lena ua e saunoa mai o le a fai, lau pule lea lau Afioga i le Minisita. Ona oo atu lea o se faamatalaga i Pule o aoga, lau Afioga i le Minisita ma le Matagaluega o Aoga, o le a se tofa o le a se faautautaga, e le manaia ae faakonekarate ia Pule o aoga. Aua e aoga foi e galulue ai ma finafinau ina ia lelei le faatinoina o galuega, aua afai e lelei, ia e faaaauu pea. Ae afai foi e faaletonu, ia e mafai foi ona faasalalau avanoa o lo o i ai foi e toatele nisi e agavaa mo lea faamoemoe. E faafetaia foi le Minisita mo Aoga ma le Pule Sili i tulaga i Asiasi Aoga. O lea ua maitau atu ua toe faaaauu ia lea avanoa lelei aua nai asiasi aoga aua le uunaia o galuega lelei aua le faatinoina i totonu o le Matagaluega o Aoga.

Ona ou oo mai lea i le Minisita mo Faalapotopotoga o Mea Tau Fale a le Malo le Samoa Housing Corporation. E tatalo atu i lau Afioga i le Minisita, ia masalo na faatu lenei faalapotopotoga o le fesoasoani i le tatou atunuu, fausiaina o maota ma laoa. Ia ae peitai ane, a e silasila lau Afioga i le tului lea o nonogatupe lea e i ai, se e matautia lau Afioga. O lea e tatalo atu sei silasila ifo i ai lau Afioga i le Taitaifono o le Komiti Faafoe ma le Afioga i le Minisita i le tului lea ua fai sina maualuga tele 17% ia a tuu atu i faletupe o le Samoa Commercial Bank, ia na o le tai 8%. Ia a lea na faatu lenei Faalapotopotoga, e fesoasoani i le atunuu. Ia o le talosaga lea i lau Afioga i le Minisita mo le Faalapotopotoga o Mea Tau Fale Samoa Housing Corporation.

Ona ou oo mai lea i le Afioga i le Minisita mo le Soifua Maloloina, malo faafetai i lau Afioga o lea ua mafai ona ave a tatou mai i Initia. E momoli atu le agaga faafetai a lenei itumalo mo lea galuega lelei a le Malo. Ae pau lava le tatalo, o lea maua a taunuu le mai i Initia, ona agai sao loa lea i le falemai aua togafitiga. Ia ae tau maitau atu i Niu Sila, e pei e tuai, ae pei e manaia pe a faapena foi ma tatou mai ia i Niu Sila. Ia ona faaii lea o se faamatalaga i le Afioga i le Minisita mo le Soifua Maloloina, e toe faamanatu atu, le talosaga a lenei itumalo i se Sub-Centre. E pei ona saunoa lau Afioga, e lafo atu, ia o lea lava o tapuai lenei itumalo i ou faiva. Ia alofagia e le Atua, ia maua lau tofa, ia alofagia le Sub-Centre a lenei itumalo na talosaga atu, ina ia mafai ona maua le auaunaga faasoifua maloloina i lea aso ma lea aso.

21 IUNI 2017

**Tulafono Tau Faaofi o le Faatatauina o Tupe 2017/2018
- felafolafoga i luga o le faitauga faalua**

Ona ou oo mai lea i le Minisita mo Tina ma Tamaitai, Atinae o Nuu, Afioga ma Agafesootai, e momoli atu le agaga faafetai ona o le polokalame lea ua faatinoina e lou itumalo e ala i le komiti a le itumalo e galulue faatasi, ina ia taumafai e la la mua ai le faipule a le itumalo aua le faagaioina o nisi atinae lelei aua le itumalo. Ua maua ai foi le sootaga lelei a le faipule ma sui o nuu ma afioaga e le gata i afioga i Pulenuu aemaise foi sui tamaitai o nuu. Ua mafanafana foi le mafutaga, ina ia faigofie ona fesootai tulaga e fia moomia i totonu o le itumalo. E momoli atu le agaga faafetai i lau Afioga i le Minisita, ae faafetai foi i le famoemoe a le malo mo le ie o le malo. Faafetai mo lea galuega lelei o lo o faaauau pea, ia aua le manuia o le tatou atunuu. Pau lava le tatalo ia faaopopo nisi faamanuiaga aua ia tulaga pe a lava lau faasoa. Ia o le tatalo lea i lau Afioga i le Minisita mo Tina ma Tamaitai, Atinae o Nuu, Afioga ma Agafesootai.

Ia ona ou oo mai lea i le Minisita mo Fesootaiga, Faamatalaga ma Fesootaiga Vavave Faaneionapo. Ia o lea sa avatu foi i lau lauga, lau uluai lauga, le tulaga foi lea i le televise a si ou itumalo. O lo o i ai lava nisi afioaga e le o manino le TV, ia ae pei foi ona e saunoa mai, o la ua lelei. Ia ae talosia ia o lea e i ai lou faamoemoe i le tatou cable, a soo loa le cable masalo o le a manino uma lenei itumalo o Lefaga ma Faleaseela i le TV. E momoli atu ai le agaga faafetai ona o lenei galuega e le faigofie mo lau Afioga i le Minisita, malo le fai o le faiva aua le manuia o Samoa po o le tatou atunuu.

Ia ona faai lea o se faamatalaga i le Afioga i le Minisita mo Tupe Maua, e momoli atu le agaga faafetai o lenei itumalo i lau Afioga i le Minisita. Malo galue malo le finau, ina ia maua ni a tatou tupe e faatino ai ia tatou atinae, aua e mautinoa o lau Matagaluega o le Matagaluega taua lea, i totonu o le tatou malo, o lo o mamafatu le galuega aua le matou tagi atu, ma matou faatalauala atu i nisi o atinae o lo o fia faaleleia i totonu o le matou itumalo.

Ia lau Afioga i le Fofoga Fetalai, ia o nai manatu lena o lenei itumalo, ae faafetai i lau Afioga i le Palemia ma le Kapeneta mo le faasoa mo lenei Tala o le Tupe. E pau o lea matou tui pea le mulipapaga ma fai le faiva o Feepo, ae outou alofaiva aua se manuia o le atunuu. Tatou lafoai laia o outou faiva, ma tatou faamoemoe i Aao o le Atua. Si ou itumalo pele o Lefaga ma Faleaseela, faamalo faafetai le tatalo, faafetai le tapuai.

Lau Afioga i le Palemia ma lou auvaa, matou talitonu e le i fausia Roma i se aso e tasi. Ae ou te tatalo, ia vave, ia vave maia se aso, e oo mai ai le fausia o Roma i si ou itumalo pele, i lau pule faasoa. Manuia lau Afioga i le Palemia ma le Kapeneta, manuia lau Afioga i le Fofoga Fetalai, faapea le Fonousu a Samoa. Soifua.

FOFOGA FETALAI: Malo faafetai, faafetai saunoa, faafetai malele ia i le sui usufono mamalu o Lefaga ma Faleaseela. Ia ua avanoa foi le Maota mo se isi saunoaga e faagasolo ai le tatou galuega. Ia ua tulai mai le sui o Nuu tu taulaga i Sisifo, le Afioga ia Faumuina.

21 IUNI 2017

**Tulafono Tau Faaofi o le Faatatauina o Tupe 2017/2018
- felafolafoga i luga o le faitauga faalua**

Afioga FAUMUINA ASI PAULI WAYNE FONG (Itumalo Tu Taulaga Sisifo): Faafetai i lau Afioga i lenei taeao, ia e faapipii atu foi i le sui usufono ua tuanai atu. E momoli atu le faafetai tele i lau Afioga aemaise le tapuaiga a Samoa ia aua foi le taumafaiga o si o tatou atunuu i le tulaga i le Tala i le Tupe i lenei taeao. Faafetai atu foi i le Malo aemaise ai foi ia le Kapeneta ma i latou e lagolago i le Malo ia aua foi ia galuega fai.

O le a taumafai atu se manatu e fesoasoani ai i le tatou Tala o le Tupe ua taatia i le Maota i lenei taeao. O le a ou le tautala i le auiliiliga, o le a ou le taumafai atu foi i se Matagaluega e tasi, ae o le a taumafai atu i le aotelega, ina ia mafai ona maua ai se fesoasoani aua foi le tulaga i le Tala o le Tupe. O lea ua taatia ia le saunoaga matagofie a le Afioga i le Minisita o Tupe i le tulaga e tataua ona i ai si o tatou atunuu, aua mo le agai i luma, o lea foi ua i ai i le upu e aupito i sili ona taua, ia agavaa tutusa ma talafeagai tagata uma, aua se lumanai o Samoa mo le agai i luma. O le uiga o le faamatalaga, ina ia tatou taufai togimaa tutusa, sa uma aua foi le atinae o Samoa i le agai i luma. Ona i ai lea ma le fesili, o le fesili, po o ai i latou o lo o togimaa, a o ai i latou e le togimaa? Aua o le tulaga lea sa i ai, sa i ai le agaga faapea o le a aumai le tatou pasene o le GST, ina ia mafai ona togimaa uma i ai Samoa atoa, e oo lava i le i togia se maaa. Ae faafetai mo le agaga malamalama o lea ua aumai sao aua mo le agai i luma. E avatu la ma le fesoasoani, o lea o le a taufai tutusa tagata uma o Samoa e fesoasoani i le Tala o le Tupe a Samoa. A o le fesili; o le a se fesoasoani a lo tatou Malo o ave i le tatou Tala o le Tupe? Aua pei e foliga mai, o le tatou atunuu o lo o taumafai mai lava ina ia maua se tulaga e agai ai i luma lo tatou atunuu. Ua uma le matou fesoasoani i le itu lenei lau Afioga i le Fofoga Fetalai, o lea ua matou faamama avega atu i le Malo aua le agai i luma o le tatou Malo. E tele mea sa maua e le Palemene ia o lea ua toe tuu atu. Aisea? Ina ia mafai ona tatou pulupululima ma tatou fesoasoani i le Malo aua le agai i luma.

Ona ou taua lea o le Matagaluega lea o le Auaunaga o Tineimu, lau Afioga i le Fofoga Fetalai, o le Matagaluega e aupito i sili ona taua ia Samoa atoa aua ia le fesoasoani i tagata lautele, aua foi le fesoasoani i malaia e tulai mai i totonu o Samoa, aemaise ia le taulaga i Apia. A fuafua i le tulaga ua i ai nei le alualu i luma o le fausia o fale tetele o le Malo lau Afioga, a tilotilo atu i le tupe lea e aumai i i mo le Auaunaga o Tineimu, ia na o le aufaigaluega ae le pe ai le mu. O le uiga lau Afioga, ua tele ina aumai meaalofa o taavale fuimu mai fafo e aumai e fesoasoani ai ia tatou, faafetai mo le fesoasoani, faafetai mo le foai, ae le ola, ona aumai laia tu i se taimi, a o le taimi lenei ua tataua ona faaoga lelei se tupe a le Malo i le Tineimu e aumai ai ni taavale fuimu tetele e mafai ona latou fuia se mu, pe mafai foi ona latou fuia le fale fogafaleono lea a le Malo o lo o i tai, aua e leai se aoga e talia ai foai, ia ae le mafai ona faatino ai se galuega. E na ona fesoasoani atu i lau Afioga i le Minisita o Tupe, e toe tagai lava i le tulaga lea, aua e aafia uma ai lava i tatou, amuia i tatou e le i oo i ai le malaia, a o Matagaluega ma nai aiga sa oo i ai le malaia, e le i mafai ona faatinoina lea galuega.

21 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga i luga o le faitauga faalua**

Lau Afioga i le Fofoga Fetalai, ona ou oo mai lea i le polokalame lea a le Ofisa o le Palemia o lo o ave ai ia i latou o lo o ave i fafo aua galuega fai e fesoasoani mo nai aiga. Faafetai i le Afioga i le Palemia aemaise foi Niu Sila ma Ausetalia mo polokalame, a o lea foi o le a amata ona tau faafaigata lau Afioga. E talitonu le agaga e sao, e tatau ona ave tamaiti malolosi, e tatau ona ave i latou o lo o maua le malosi o le tino aemaise le mafaufau. Ia ae talitonu o lo o pule lava le Atua i le tagata, e pule le Atua i le tagata i le aso e aami ai, ae le faapea o le ave i Niu Sila e galue ai aua le aiga, ae toe faaopoopo atu i ai ina ia pasia ina ia malosi lona tino, e sao e lelei, aua masalo ana faatino uma le tulaga lea i galuega a le Malo ma tatou uma, e leai ma se isi lau Afioga e pasia i lenei taimi, e agavaa i le galuega o lo o faia. O lea, ia na o le tatalo e tuu atu i ina i lau Afioga, e toe tagai lava i ai isi mea laitiiti lea, o lea o le a toe afaina ai le tatou faamoemoe.

Ona ou oo mai lea isi ou uso lea i i lea e faia cables ma tulaga faapena. Faafetai i lou sogasoga lau Afioga i le Minisita, o oe lava e aupito i sili ona e laitiiti i ina a o mea tetele ia o le a aumaia i Samoa. E tatalo atu i lau Afioga, toe tagai lava i ai lau Afioga, ne i te i ua vavevave tele le sau o le mea, ae le mafai ona tatou taofiofia ma isi mea o lo o omai ai, tagai i le tulaga lena, e manaia le vave, ae vave mai na o mea lelei, ae aua ne i vave mai ai ma mea faale-lelei te i ua afaina ai le tupulaga o lo o taumafai mai i lenei taimi, ua uma ona outou silafia, o le taimi lenei i telefoni ma tulaga uma faapena, ua leai lava se tamaitiiti e leai se telefoni, ae fai se faiga ina ia mafai ona taofiofi ai nai nisi tulaga na, ina ia mafai ai ona faasaoina a tatou fanau. E lelei tatou i taimi la e leai ni telefoni, sa leai lava ni mea leaga sa i ai, na o mea lelei lava, e oo lava i faifeau e lelei uma foi. Ia a o le tulaga lea ua i ai, ua tatou faale-lelei uma atu ai lava.

E tatalo atu i le tele o Matagaluega o lo o afifio mai e fesoasoani mai i le tatou Tala o le Tupe e uiga i le faasao o tupe i Matagaluega taitasi. O lea e tagai atu foi lenei itu, o le tele o Matagaluega e tasi le galuega ae lua tagata e faia, o le tele o Matagaluega, e tasi le galuega ae lua taavale e faia, ia fesoasoani mai i lena tulaga e tau faamama le feoai. O au ou te nofo i le itu taulaga i le mea e i ai le free way lea e alu agai i o i le malae vaalele, e tai 5 lava minute ma pasi atu lea taavale, o taavale a le Malo, pasi atu lea taavale, o le taavale a le Malo, o le Aso Gafua i le Aso Toonai, Aso Gafua i le Aso Sa e tau i le 12:00 i le po, toe ao o lea lava e feoai. O le mea lea, tau faamama, tau faamama le tatou feoai, tau alolofa mai e fesoasoani mai ina ia mafai ai ona faafaigofie ia le tatou galuega. E faafetai foi o lea e vaai atu o le a toe faaipoipo isi Matagaluega ua uma ona divorce, a o le mea e lelei ai, o lea e tele lava le suiga o le a oo mai i ai, e tele foi le tupe a le Malo e mafai ona faasaoina mai. A faapea la e mafai ona faapena uma Matagaluega a le Malo, oi, e leai la e le taitai toe manaomia e tatou se tupe faaopoopo i lea tausaga i lea tausaga, ae na o tupe toese.

21 IUNI 2017

**Tulafono Tau Faaoifi o le Faatatauina o Tupe 2017/2018
- felafolafoaiga i luga o le faitauga faalua**

Lau Afioga i le Minisita mo Aoga, Taaloga ma Aganuu, se faafetai i lou loto toa, tulai mai nai faleaoga toe tasi lava le polokalame lea ou te tilotilo atu i ai o lea lava e taumafai mai aua le totogiina o pili a fanau. O le a le mea e le avane ai ma se fesoasoani i komiti taitasi o aoga, se i fesoasoani i le latou galuega, a fau le faleaoga, toe sue mai le tupe e vali ai, sue mai le tupe e totogi ai le pili o le paipa pe a le totogia. E toe tagai lau Afioga i le tulaga lea i mea ia o arrears, o arrears ona o le le totogia, o le arrears ona o le faatamala, ua le mafai ona totogi i le taimi lena ona ua le avanoa le sui o le komiti pe le avanoa foi le.....ae toe tagai lava lau Afioga ia aua lava ne i toe tagi mai lava se matua ua le mafai ona aoga. E lelei foi lena a uma loa i lenei vaitaimi ua oo i se taimi ua le mafai ona fai e le Malo, toe totogi loa le pili a le matua ia, e iloa ai le alofa moni i ona alo ma tulaga faapena.

Lau Afioga i le Minisita mo Galuega, Felauaiga ma Atinae Eseeese, ua leva foi ona ta mafuta, e tele lava o lipoti ua aumai i le taimi lenei ailoga o toe i ai se itumalo faapea, ae lelei lava le taumafai atu pea semamanu o i ai. O lea sa i ai ia Moamoa, o Moamoa, ua uma ona faatau e le Ekalesia Katoliko fanua ae le faia le auala, le faia le paia, a, le faia ma le moli. A o le tulafono lava sa tatau ona i ai, e tatau ona fai muamua galuega ia ae le i faatauina fanua. O lea la e toe talosaga atu ai i lau Afioga i le Minisita, atonu o le faatamala foi i lena vaitaimi, ae manaia si auala lea e oso atu i Moamoa tau i luga i Malololelei, e faaitiiti ai foi taavale e oso mai i Vailima ia ma tulaga faapena. Ae tagai i ai aua le agai i luma.

O lea lava o lo o taumafai i le taimi lenei ia Falelauniu, o lea e le o afio mai le Afioga i le sui usufono e tulaga tonu i ai o Faleata Sisifo, ae na ona avatu i ina. O Falelauniu sa fai e le SLC auala ae o lo o feteenai i le taimi lenei, ona ua tatau ona faia e le Malo auala, o lea ua alu ai le pasi, alu ai le taxi, nonofo ai ma aiga, a o lenei lava e tauaimisa po o ai e faia le auala.

Lau Afioga i le Minisita mo Galuega, se i e alofa ifo lava i le tulaga lena. E leai tele ni faatoaga o lo o i totonu iinei isi o matou itumalo, aua o tagata o tagata ua uma ona faatau o latou fanua tumaoti, a o lea foi e toe talosaga atu lava....o le faafaigata ia i latou mai nuu i tua, o latou o lo o taumafai mai totonu o Apia e fia maua se fanua e nofo ai, a o lea foi o le a toe avatu ma le isi avega mamafa ina ia mafai ai ona maua se tupe a le Malo, ae o lo o afaina ai e mai Savaii ma tua i Lepa e fia omai iinei e faatau ni o latou fanua i totonu o le itu taulaga, o le a faigata foi ona ua faapoopo atu i ai ma lena tulaga.

Lau Afioga i le Fofoga Fetalai, masalo o nai manatu ia, ae tuu atu i ina i lena itu, e avatu ai ma le lagolago tele a lenei itumalo i le tatou Tala o le Tupe, ae na o nai fautuaga laiti lava na ina ia taumafai e tatou te togimaa uma i ai, ina ia mafai ona faatino lenei faamoemoe. Ma le agaga faaloalo lava, faafetai ma ia manuia le Fono.

FOFOGA FETALAI: Malo faafetai saunoa. Ia e puupuu aanoa le mataupu a le Afioga i le sui usufono mamalu, malo faafetai.

21 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga i luga o le faitauga faalua**

Ou te tapa se isi sui usufono e tulai mai e saunoa, o lo o i ai le agaga o le tatou Fono ina ia tuitulimatagau le ufi a le tamaitai, ina ia vave faatino foi a tatou galuega aua le Tala o le Tupe.

Ou te tapa ma le faaaloalo se isi sui usufono e tulai mai e saunoa e tusa ai o tatou galuega. Tulai mai le sui usufono mo Vaimauga Sasae.

Afioga SULAMANAIA FETAIAI TAUILILI TUIVASA (Vaimauga Sasae): Faafetai i le avanoa i lau Afioga i le Fofoga Fetalai aemaise foi o le paia o lenei Maota. Masalo ae le i faia se tala po o se sao o lenei itumalo e faatatau i le Tala Faatatau o le Tupe ua opea nei i le Maota, e muamua ona faatalofa atu i lena itu o le Maota i le afio o lau Afioga i le Taitai o le atunuu, lau Afioga i le Palemia, lau Afioga Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi, aemaise foi o le Afioga i le Sui Palemia, le Afioga i le Sao Faapitoa po o le Afioga foi i le Sao Papa, Afioga i le Fiamē, aemaise o le paia i Minisita o le Kapeneta ma afifio i Afioga i Minisita Lagolago. E faapea foi le afifio i Afioga i alii ma tamaitai sui usufono o le Palemeneo Samoa nei. Tainane foi le tapuaiga i le paia o Faaululuga o Matagaluega a le Malo ma Faalapotopotoga Tumaoti, aemaise o ofisa faasalalau o nusipepa ma leitio, aemaise foi le paia o pule aoga ma nai aoga o lo o tapuaia le Fonousu a Samoa i lenei Maota.

E faatalofa atu foi i lau Afioga i le Fofoga Fetalai ma le Sui Fofoga Fetalai, aemaise o le Failautusi ma le paia o le Ofisa o le Fono o lo o tautuaina le Fonousu a le atunuu. E faatalofa atu foi i le tapuaiga a le Aufaigaluega paia a le Atua, o lo o nonomanu i le Atua e anapogi ma tulivae i le Atua aua se manuia o Samoa ma ona tagata.

E faatalofa atu foi i le paia o Lana Afioga Mamalu, O Le Ao o le Malo, Afioga i le Tui Atua Tupuola Efi ma le Masiofo, e faapea foi le afifio o Afioga i Sui Usufono o le Fono a Sui Tofia ma o latou Masiofo, aemaise o le afio o le afioga i le Faamasino Sili, afioga i Tamaitai ma Alii Faamasino ma le Ofisa o Faamasinoga. E le faagaloina le tapuaiga a si ou itumalo o Vaimauga Sasae, ia tapuai maia ma le manuia ae se i fai so tatou sao aua le mataupu ua opea nei i le Maota.

Lau Afioga i le Fofoga Fetalai ma le mamalu o le Maota, o le vaai a lenei sui usufono i le aotelega o le Tala o le Tupe, e momoli ai le faafetai i le Afioga i le Minisita o Tupe i le tapenaina aemaise o le afioga i le Ofisa Sili o Pulega o Tupe ma e o Matagaluega a le Malo na lagolagoina le tuuina mai i totonu o lenei Tala o le Tupe matagofie. O le tele o taimi e le momoe ai e ova i le po ma le ao i le faavasegaina o lenei Tala o le Tupe ua tuuina mai. A fuafua foi i le Tala o le Tupe i tausaga ua tuanai sa tatou vaai i ai i le faaitiitia o tupe alu, ona o le naunau o le Afioga i le Minisita ina ia matagofie ma manuia Samoa ma ona tagata.

21 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga i luga o le faitauga faalua**

O le aotelega o le vaai a le sui usufono mo Vaimauga Sasae i le Tala o le Tupe, faamalo i lau Afioga i le Minisita i lou toa ma lenei Tala o le Tupe ua leai se Supplementary o lo o i ai. Ua vaai lenei sui usufono, ai e te faamoemoe i le tatalo i le Atua ina ia faaaauau ma oo atu i le isi financial year o lo o tumau pea le tamaliiaga o i ai i lau Tala o le Tupe.

E i ai lava nai mea laiti e fia oo i ai se faamatalaga a le sui usufono mo Vaimauga Sasae. E vaai lava i totonu o le Tala o le Tupe o lo o afea ai le \$2miliona tax ia a faifeau lea sa logologoa ai le paia o le atunuu. E le fefe lava le sui usufono mo Vaimauga e talanoa ai leaga o auauna paia a le Atua. Afai o auauna paia a le Atua na tofia e le Atua e vaaia ma fafagaina le lafumamoe a le Atua o oe ma au, e le tatau la ona afea le aufaigaluega paia a le Atua i le \$2miliona lea ua faaagaaga e lau Afioga i le Minisita.

O le aotelega o le Tala o le Tupe e lagolagoina mea uma lava. O le siitia foi o nisi o vaega o le pasene o le EPC ma nisi, e lagolagoina. Na pau lava lea o le talosaga i lau Afioga i le Minisita o Tupe, le \$2miliona lea ua faaopoopo i totonu o le Tala o le Tupe. E pei lava ona ou taua o le aufaigaluega a le Atua, e tele talanoa e talanoa i ai tagata, faafalelemalu, tulaga faapena i totonu o afioaga ma alaalfaga e ave i ai le faa-ao a le atunuu, a o lenei ua tulai mai ua afea le Aufaigaluega paia a le Atua. O le ala lena o le popoe o le sui usufono mo Vaimauga Sasae, ua afea le aufaigaluega a le Atua. O lea foi tatou te vaai i le susuga i le faafeagaigaí .

FOFOGA FETALAI: Malie le sui usufono mamalu, se i tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui (Palemia): Lau Afioga i le Fofoga Fetalai, o le mea lea e fia tuituliloa atu, afai e le malu le fale o le galuega ona ato lea, a o lea ua e sau folafola i i le fale o le tou aulotu e le malu, e tatau ona ato.

FOFOGA FETALAI: Tulai mai le sui usufono.

Afioga SULAMANAIA FETAIAI TAUILIILI TUIVASA: Lau Afioga i le Fofoga Fetalai e sao le malelega a Le Ao o le Malo ae ato e le Ekalesia. O lea foi ua aumai lenei lafoga, e pau foi i luga i aiga lotu.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalaií

FOFOGA FETALAI: Tulai mai lau Afioga i le Palemia.

21 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga i luga o le faitauga faalua**

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, ua faifai ma talitalie, ua ou vaai atu ua matua inaina lava le sui usufono. E le o au, O Le Ao o le Malo, ae tatau ona faasao. O le mea lena e ala ai ona tau le faia e isi le upu lea, o lo o faafalelemalu, leaga e tau atu ai o lena e te nofonofa ae le o e ato faamalu le fale o le tou faifeau. O le mea lena a tatou e fai, matua fau ni fale fogafalelua ma faatioata e faanonofa ai, ae o le tau o le upu lea o le faafalelemalu, ua e nofo lava oe ma tau mai i le Maota nei, o lea e te leotele a o lea e le o malu lelei le fale o le tou faifeau.

FOFOGA FETALAI: Ia, tulai mai le sui usufono.

Afioga SULAMANAIA FETAIAI TAUILIILI TUIVASA: Lau Afioga i le Fofoga Fetalai, o le a aveese le faafalelemalu ae tuu ai Auauna a le Atua, le Sui Vaai a le Atua i le lalolagi lenei, le susuga i le faafeagaiga.

FOFOGA FETALAI: Ua manatu le Nofoa e fautuaina le sui usufono mamalu e lelei ona e saunoa i le tulaga o le tamaoaiga ma le tulaga lautele o le Tala o le Tupe ona tatou te le i oo atu i mea taitasi ona aumai lea o le saunoaga ma tulaga e tatau ona i ai ma e le i oo mai foi le Tulafono e tusa ai ma le mataupu pei ona e saunoa i ai.

Ma lou faaaloalo. Saunoa le sui usufono.

Afioga SULAMANAIA FETAIAI TAUILIILI TUIVASA: Lau Afioga i le Fofoga Fetalai, o le aotelega lava i le vaai a lenei sui usufono ou te faafetai lava i le Afioga i le Minisita. Na pau lava lea o le lape sa ou vaai i ai o le \$2miliona lea o le a aafia ai le Auaigaluega a le Atua ona sa i ai le vaai o lea tatou te vaai na o le susuga i le feagaiga, ae silasila, o le feagaiga ma lona faletua ma lana fanau o lo o galulue uma i totonu o le ekalesia.

FOFOGA FETALAI: Tulai mai lau Afioga i le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, na ona ou faamanatu atu, e toatele faafeagaiga la e totogi latou lafoga, ua leva lava ona totogi.

Afioga SULAMANAIA FETAIAI TAUILIILI TUIVASA: Lau Afioga i le Fofoga Fetalai e tatau ona totogi lafoga a feagaiga o lo o galulue i totonu o latou ofisa, a o le sui faifeau o lo o talanoa i ai le sui usufono mo Vaimauga Sasae, o le faifeau tausinnu o lo o fafagaina e nuu ma afioaga lea tatou te omai ai.

21 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga i luga o le faitauga faalua**

O le ala lea o lou naunau atu i lea vaega, ona a silasila foi i le tulaga sa faatino ai lenei Tulafono, sa o faatalatalanoa i tua i afioaga ma ekalesia. O le a le tali na aumai e le atunuu? Teena nisi ekalesia. E pei o le ala lena o le avatu. A o le tulaga i le aotelega a le Aufaigaluega paia a le Atua, e pei o popolega na o le sui usufono mo Vaimauga Ssaae, o le tulaga lea.

FOFOGA FETALAI: Malo. Ia na o se fautuaga lava a le Nofoa ona o le tulaga o lo o talia le Tulafono e tuuina mai ona aumai lea i ai o le saunoaga ae pei o le avanoa ia saunoa i ai le sui usufono mamaluf .

Afioga SULAMANAIA FETAIAI TAUILIILI TUIVASA: Ua ou lagolagoina le Tala o le Tupe ua tuuina mai i le Maota, ae na pau lava lea o le lave sa tau vaai i ai ma popoe i ai le sui usufono o le Vaimauga o le \$2miliona lea ua faamatuu atu i le aufaigaluega a le Atua. Ia, o le a ou talanoa atu isi ou itumalo.

Lau Afioga i le Minisita mo Galuega, Felauaiga ma Atinae Eseeese, faafetai lava i lou tulai mai. E pei lava ona e silasila ma tulaga foi i talosaga a lenei itumalo o lo o tuuina atu i totonu, ia o auala galue lava o le afioaga o Lailii. E pei o lenuu le nei o Lailii pei ona outou silasila i ai, pei ona ou talosaga atu e tataua ona fai ai se tulaga o se uafu ona e leai se aau. Ia se i silasila ane i ai ona o lea ua leva ona talanoa le uafu i Vaiusu ae le avatu loa e faatino o la e ua ofo mai lou afioaga e faatino ai le uafu ona e leai se aau. Ia o tulaga la na faatalosagaina ai, o le taligalu ua matua malepe lava taligalu o lenei afioaga o Lailii, o le nuu lenei e moni ai le upu e lumafale i moana ae tuafale i le papa. A sau nei le Tsunami ma le paia o lenei fonotaga, ou te le iloa po o fea o le a oo i ai si ou afioaga. O lea la ou te talosaga atu ai i le Minisita mo Galuega, Felauaiga ma Atinae Eseeese se i silasila i ni auala galue e o ai i luga si ou afioaga i luga o mauga e nonofo ai ma vaavaai mai i lalo, ae tuu lalo e fai atu ai se taulaga o le tatou Malo mo se taimi o i luma.

O le isi o vaega lau Afioga e pei ona ou talosaga atu i le Minisita mo Galuega, Felauaiga ma Atinae Eseeese, o si ou nuu o Vailele o totonu o le aai. O le tele o Paeaiga, na talosaga mai lava si ou nuu na o sina auala lava i totonu o le aai o Vailele e faata atu e agai ai i totonu o maota ma laoa ma taamilo ai i totonu o Vailele. Ou te tuuina atu i lau Afioga le taligalu o Lailii ma le taligalu o si ou afioaga o Vailele ma le auala galue o Lailii ma Letogo, ua loa ona le i faataunuaina atu ai lea faamoemoe.

Lau Afioga i le Minisita mo Punaoa Faalenatura ma le Siosiomaga lau Afioga i le Sao Faapito, ia o lea e te lua afio atu ma le Afioga i le Palemia i o oulua afioaga, a oulua taunuu atu loa i Lailii, pe mafai ona oulua silasila ifo ua matuai malepe lava le taligalu o lenei afioaga, ona o le a? Sa tuu avanoa atu foi lenei afioaga i le lauina mai o le oneone aua atinae mo le Malo, a ua avea ma mea ua matua leaga faia ai lava le taligalu.

21 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga i luga o le faitauga faalua**

Ia se i silasila ane i le talosaga na tuuina atu, ua manao lenei itumalo pe a aluatu ai le auala se i tulou agai tua i le mea e afifio ai i luga o taligalu ma sefe atu ai ma le toe uia o totonu o afioaga ma nuu. O le Vaialele ma Letogo ma Fagalii ua fia tausaga o talosaga atu i le tau lea sa talosaga atu ai i le isi Fonotaga i lau Afioga i le Palemia, le 8,000 kuata eka, ua fia aumai tupe i totonu e fesoasoani i le Tala o le Tupe, a o lea e le i saunoa mai lava ma malele mai le Afioga i le Minisita o fanua po o Lautafi. O lo o tapena si o matou afioaga po o le a se tulaga i eleele sa faamatuu atu i totonu aua a fuafua i tausaga ua tuanai, e tai valu afe lea sa faatau ai kuata eka i tualeelele o Letogo, Vaialele ma Fagalii. Ae pei o lea o lo o talia i lenei taimi, o le ala foi lena o le talosaga mai a le itumalo, ina ia \$8000, aua e uma ane e le o ni freehold land e le mafai ona toe faatau. O fanua o alii ma faipule o fanua faaleaganuu. E talosaga atu ai i lau Afioga i le Minisita mo Fanua se i silasila ane i lea vaega.

O le afioaga lava lea o Fagaliii ou te fia talanoa atu ai a outou silasila i lenei afioaga o le tele ia o atinae a le Malo o lo o faia ai. Masalo e ¼ o le fanua o Fagalii o lo o nofoia e ona tagata, o lo o avatu ai le malae vaalele, o le malae tapolo. Ia o tuamaota foi i tulaga i fanua o le Malo o lo o umia ai, e oo foi i le gataifale o lo o fai ai le cable. Ae talosaga atu pe fia se tupe a le tatou Malo e aumai i taimi uma e complain ai tagata i le uu a le vaalele, e fefefe foi tagata i tafatafa ae o le vaalele i pa le vaalele aafia atu ai. A outou silasila i ai, e land atu lava le vaalele i luga o maota ma laoa. Pe leai se seleni a le tatou Malo e faamatuu atu mo si ou afioaga e move ai i uta i nisi fale mautu ae tuu autafa ane o le malae vaalele.

Lau Afioga i le tulaga tau aoaoga, tele lava tupe, faafetai lava i le Minisita o Tupe ua toe afea le tulaga lea i asiasi aoga. E lagolagoina e lenei sui usufono le toe tuuina mai i totonu o asiasi aoga e faapena ona toe agai ai le Matagaluega. A o le tele o le vaai i tausaga faaletupe uma, e ave lava le faamuamua i totonu o aoga ma le soifua maloloina. Na pau lava le talosaga, o mea masani lava i lea tausaga ma lea tausaga, e ave lava le faamuamua i le Matagaluega o le Soifua Maloloina ma Aoaoga, ae ou te le iloa po o i ai se improvement i lea tulaga. O le faataitaiga, o le mea lea pei se festival lea na fai talu ai nei, tele activities foi nei ua fai ae le o i ai ni follow up, sa amata lenei festival o toasefulu ma ona tupu aoga, a o lea ou te faalogo talu ai nei lava ua toaono. O le a le mafuaaga pe le o sao le taimi, ia silasila ane lau Afioga i le Minisita i le tele o na activities o lo o i ai, pe le mafai ona tuumamaina nisi mea ae concentrate i se mea se tasi.

Faafetai foi i le tele o le fesoasoani i le Tala o le Tupe toe tuuina atu i le Afioga i le Minisita mo le Soifua Maloloina, faafetai i lau Afioga. E pei ona ou lauga foi i le tausaga o tuanai, ai o lau lauga lea na ou fesiligia ai po o i ai se follow up i le tatou tupe foi o lo o ave i le tamalii i Niu Sila i mai, a o lea ua faalogo atu pei ua ave agai i Initia. Lelei. Na pau lava le agaga ia tuu lava le faamumaua lelei pe a faapea o lau lauga lea ua sui ai le finagalo o le Minisita e le avea i Niu Sila ae ave i o i Initia. Lelei. Na pau lava le talosaga se i vaai ane o tatou tagata i lea tulaga.

21 IUNI 2017

**Tulafono Tau Faaofi o le Faatatauina o Tupe 2017/2018
- felafolafoga i luga o le faitauga faalua**

Lau Afioga i le Minisita mo Falepuipui ma Auaunaga toe Fuataina, sa ou talosaga atu o i ai le Minisita talu ai o le falepuipui o lou itumalo i Vailele, mo le silafia o afioaga nei o lo o i ai nai tagata o lo o fia faatau o latou fanua tumaoti. Sa ou talosagaina ai se - e le gata foi i lea e tuafale le afioaga lea i nuu mavae e i ai Letogo ma Vailele. Pe talosaga i se Ofisa o Leoleo e muamua o atu le pulega a alii ma faipule a ua mafai e nai tagata ia e o atu nofoia eleele o Vaimauga ae omai palota i le urban. Pei o le tulaga lena ou te faafetai ai i lenei tulafono, o le a mafai ai ona faamalosia e e nonofo i lou itumalo ina ia palota i lou itumalo.

Oo mai i le Afioga i le Minisita mo Faatoaga ma Faigafaiva. Faafetai lavai le Afioga i le Minisita i le tele o au atinae, o lea lava e oo mai i le taimi lenei o lo o faatali pea le itumalo au palau lea sa folafola mai o le a tofu le itumalo ma le palau ae faafoe lava e le sui usufono. Ae oo mai lava i le taimi lenei, na o folafolaga lava ae le i oo atu lava se mea. E tatalo atu ai i lau Afioga i le Minisita, tatou tatalo faatasi i le Atua ma tatou anapopogi i le Atua o lea ua i ai le faamai i le tatou atunuu. Tatou tatalo i le Atua ina ia aveese atu lea faamai ae o oe lea e lima taumatau i ai le atunuu, a o lea ou te vaai atu e le o lava foi se seleni o tuuina atu ona o le utiutu o le faasoa.

Lau Afioga i le Minisita mo Tina ma Tamaitai, Atinae o Nuu, Afioaga ma Agafesootai, ou te lagolagoina tele le tulaga o i ai i mea nei o fanua tumaoti ina ia oo i ai pulega a alii ma faipule. Faafetai ua e afea lea tulaga i le Ofisa Sili ma lau Afioga aua o le tele o isi tagata ia e i ai fanua i totonu o afioaga e pei e faatautee lava nisi a o nisi o lo o usitaia le pulega. Faafetai mo lea tulafono ua mafai ona oo i ai le pulega a alii ma faipule ia i latou o lo o nonofo i totonu o fanua tumaoti i totonu, aemaise foi o lau polokalame ua tuuina mai i sauaga. Na pau lava polokalame e le lagolagoina e lenei itumalo, o le fafine nofotane, se i tulou lava le paia o lenei Maota. O lea ua tauumafai tatou e promote le fafine nofotane, o le fafine nofotane o lona lava natura o le nofotane. A o totonu o auaiga, e leai lava se aiga valea e mafai ona toe faia ni tulaga faapea ua malamalama tagata uma o le atunuu. A o lea polokalame, faafetai pe a toe maua mai ai se tupe a lea faalapotopotoga o lo o taumafai, o e promote le tulaga lea ae aua le faamalosia, e tau faanoanoa ai lava i le tulaga lea e faamalosia. O tatou ua uma ona tofi uma mea tatou te ola ai, o le faiava foi au ia , e faapena foi outou ia, a o le mea lea o le a i ai, e pei o le a alu atu le nofotane e pule i totonu o le aiga, e vave ai ona fafo ma le maafala.

Lau Afioga i le Fofoga Fetalai, ua ou vaai foi i le Tala o le Tupe o le a faaopoopo i ai le Tala o le Tupe i luga o le vaega lea a le Minisita mo Fesootaiga, Faamatalaga ma Fesootaiga Vavave Faaneionapo le cable ia Afamasaga. E faanoanoa lava ona o lea ua sau le cable, a o lea foi ua vaai atu ua toe faaopoopo i luga le Tala o le Tupe i telefoni. Ae a tatou silasila ma vaai isi o tatou atunuu, o auaunaga nei ua vave ai fesootaiga, tulaga tau telefoni, a o lea e vaai atu sui usufono o lea ua toe afea foi lea fuafuaga i lau Afiogaí .

21 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga i luga o le faitauga faalua**

FOFOGA FETALAI: Se i tulai mai le Minisita, malie le sui usufono. Tulai mai le Minisita mo Faatoaga ma Faigafaiva.

Susuga Hon Laauli Leuatea Polataivao Fossie Schmidt (Minisita mo Faatoaga ma Faigafaiva): Lau Afioga i le Fofoga Fetalai, ua faitau atu ma le totoa i le saunoaga a le sui usufono mamalu, ona o lea o le a see ese lana saunoaga ma le mea lea sa taua ai le polokalame lea a le non government organisation lea taua ai le mea lea o le nofotane, leaga o au sa valaaulia faapitoa e le faalapotopotoga lea ou te alu atu e fai se upu faalaeiau, a o lea ou te maitau atu e le o malamalama lelei le sui usufono mamalu i le auga o le polokalame sa fai, ina ne i te i ua tauvaleina le aoga ma le taua o le polokalame lea e faatulaga mai mo le atunuu ae pei o le a le malamalama ai lea tulaga, leaga sa ou i ai sa ou avea le faamalosiua i le polokalame lea.

O le ala lea ou te faamalulu atu ai i le sui usufono mamalu e eseese lou lagona ese le auala lea e momoli ai le feau a le polokalame. Ona o faamaumauga ua maea ona faamaumauina e lea foi Matagaluega Tumaoti a le Malo, e 85% o faafitauli o lo o tulai mai i totonu o le atunuu ona o le mea lea. O le auala la e \$200,000:00US ua uma ona aumai i le Malo Afaatasi e lagolago ai tamaitai sauaina. O le ala lena ne i te i ona o lea e tuutalaloa a tatou tala a o faafofoga le atunuu, o se Polokalame taua le polokalame lea. E le o le agaga la e faapea e faalavelave ae ia faamalalamalama, o le Polokalame e taua mo le faafilemuina o faafitauli o lo o tulai mai i tina. Ou te le taua le upu lea nofotane, leaga o le upu faalumuluma, o paolo tamaitai i totonu o aiga. O le ala lea o le faamalalamalama lau afioga i le Fofoga Fetalai. Manuia le Fono.

FOFOGA FETALAI: Malo. E matau atu aua foi le avea le se ma mea mamafa i le finagalo o le Afioga i le Minisita. O le finagalo lava o le sui usufono ia i lona lava manatu ae tonu foi ma sao le tulai mai o le Afioga i le Minisita ina ia aua ne i aveesea ai le faatauina.

Afioga SULAMANAIA FETAIAI TAUILILI TUIVASA: Lau Afioga i le Fofoga Fetalai, sa ou faapea lava au e tali mai le Minisita i palau, ae o lea ua tali mai i fafine nofotane. O le manatu lava o le sui usufono ia aua sa ou vaai i ai, sa tatau lava ona alu atu se fafine nofotane ia mai fafine nofotane, ae ua tautala mai le fua le faiava i Polokalame a fafine nofotane o le ala lea.

Lau Afioga i le Fofoga Fetalai ma le mamalu o le Maotaí .

FOFOGA FETALAI: Se i tulai mai le Minisita mo Faatoaga ma Faigafaiva.

Susuga Hon Laauli Leuatea Polataivao Fossie Schmidt: E le tuutalaloa upu ia e alu. Sa faapea lava ua malamalama le sui usufono i lou tulaga i totonu o le nuu. Ioe, e le o au o se faiava, o au o le paolo tane sinia, ioe. E mulimuli ou nofo i le teine o le nuu ae mulimuli ane o au o le Tuliaupupu.

21 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga i luga o le faitauga faalua**

E tatau ona e silafia le tulaga lena. E faapefea la ona e Tuliaupupu pe a faapea e te le lagolago.

Ma le isi mea lau Afioga o le a ou tali atu i palau, òAua le popole, the tractor will be here soon. ò Ae se i ou tali atu, leaga ne i te i ua taai uma nisi o finagalo, ae o lo o i ai lau tali, ae ou te le vave tali nei e popole, ae fai ma to lou sela. Ma le faaloalo.

FOFOGA FETALAI: Malo. Tulai mai le sui usufono e see ese ma lea tulaga.

Malie le sui usufono se i tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, e pei o lau fautuaga, see ese ia le sui usufono ma ia mea. O lea ua tauau ina silafia ai ia lua mataifale.

Afioga SULAMANAIA FETAIAI TAUILIILI TUIVASA: Lau Afioga i le Fofoga Fetalai, o le a faauma atu se sao o lenei itumalo.

FOFOGA FETALAI: Ioe see ese mai le tulaga lea.

Afioga SULAMANAIA FETAIAI TAUILIILI TUIVASA: E manatu o lenei taeao ua tele manatu e lagalaga ona o le taua o se mea e tuuina atu ma talosaga a lenei itumalo. E pau lava lena o le talosaga a le itumalo. E lagolagoina lau Afioga i le Minisita o Tupe ma tatou tatalo foi i le Atua, aua a vaai i le Tala o le Tupe lea ua aumai. E pei ona ou fai atu, o lo o i ai nai atinae ia e tuuina mai i totonu o le Tala o le Tupe e pei o le faatinoina o le falepuipui aemaise foi o le UNESCO lea e tau fai nei, ae ou vaai atu i le Tala o le Tupe o lo o tuuina i ai e le o lava. E pau lena o le popolega sa i ai lenei sui usufono mo le Vaimauga, ne i alu alu fai le falepuipui tutu na o pou ae leai se tulaga e faauma ai. O lenei ua aumai i lenei taeao, ou te tatalo atu foi ia tatou tupe ia e totoe mai isi financial year, e tele mea e fia fai a si ou itumalo. E pei ona ou fai atu, o totonu o le nuu lenei o Letogo i le auala o lo o nofo ai le sui usufono, e tele tala a tagata e fai i ai, sole e nofo i inei lenei sui usufono ae matua malepe le auala. E pau lau tala, faamuamua auala o lou itumalo ae faamulimuli mai ai. Lau Afioga i le Minisita vaai ifo le tatou auala i si ou nuu o Letogo, i mea o lo o alu agai i totonu i vai auala se i silasila ane.

E faaiu atu sau faamatalaga lau Afioga i le Fofoga Fetalai, e lagolagoina le Tala i le Tupe ua tuuina mai i lenei taeao.

E momoli se faafetai a lenei itumalo i le afio a lau Afioga i le Palemia le Kapeneta ma outou uma lava o e sa afio atu ma talaaao atu i le tuumalo o le afioga i le fofoga o le Alataua o lenei itumalo ia Tuliaupupu. Ua maualuga ma matagofie ai le faamoemoe o le matou tama ona o lo outou afio atu ma lo outou talaaao atu. Faafetai i lo outou manatu i le tautua a le fofoga o le Alataua i totonu o lo tatou Malo.

21 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga i luga o le faitauga faalua**

E momoli foi le faafetai faapitoa i le Taitaifono o le Board a le UTOS, se leitioa lava tele a tatou tupe, faatoa vaai foi lenei nuu ma lenei itumalo, se o lauia o le tatou atunuu o lo o i ai i totonu. Faafetai i le Taitaifono a le UTOS ma le Pule Sili ma i latou uma lava o lo o i ai i le Board, o lea ua tele ai a tatou tupe i totonu o le UTOS. O le tatalo a lenei itumalo ma lenei aiga i le taitaifono a le UTOS, e toalua lava tamalii o si ou itumalo e avatu e fia suitulaga i Member o le Board a le UTOS. O le mavaega lena a si o matou tama, tatalo i le Malo e toalua tamalii a lou itumalo e fia tuuina atu e faaatoa ai le Board a le UTOS.

E momoli foi lau faafetai i lenei taeao e le taia foi i fale le faaeleelea ai o lau Afioga i le Minisita mo Faatoaga ma Faigafaiva. I le aso ma tulaga i lou faaeleelea, se o oe lava o le tupu, o oe o le tupu. E le masani le mea lea o le tufanua i se tautua. O le a le aso lea na e i ai? Se na e tautua lava ona o le a? O le fia faaeaea o le tatou tama. O lea e momoli atu ai le agaga faafetai i lau Afioga i le Minisita mo Faatoaga ua faaeleelea i le aso o si o matou tama, a o le tupu le tamaloa. Faafetai foi i le Afioga i le Sui Minisita ma e uma na afifio atu ua maua ai le aso. E faapea foi si ou itumalo o faalogologo mai i le tuua foi o le malo i le afioga Tuisugaletaua isi ou nuu o Fagalii. Ia tatalo i le Atua ia vave se taimi ia toe tofia se isi, leaga o oe o le Tuisugaletaua i lo matou nuu o Fagalii o le Tapunuu, o ia e ona le nuu. Ia tatalo i le Atua ia vave se taimi ia toe tofia ai se isi o lo tatou aiga i Fagalii Tuisugaletaua Simi e vaia si o tatou nuu. O nai tina matutua foi o si o matou nuu o Laulii sa valaau i ai le Atua, ia faamaise le Atua.

I lenei itula i lau Afioga i le Fofoga Fetalai ma lena itu o le Maota, ia faamalulu atu le sui usufono mo Vaimauga, afai ua i ai se tala ua paopapa foi i outou finagalo, o le naunau lava o le sui usufono aua ne i oo o tatou lima, ona o lenei ua tasi lenei Vaega Faaupufai o le HRPP, o le tali lena mai le Atua, a o lea e matau atu o le a toe oo le lima i nai faifeau, ua fefe ai le sui usufono mo Vaimauga Sasae. Ia manuia lenei taeao.

FOFOGA FETALAI: Malo faafetai i le saunoaga a le sui usufono mamalu e logo i tino foi matagi lelei, ua faapena foi ona e saunoa e tusa ai o lou finagalo faaalua. Ina ia aua ne i lagomia ai se finagalo o sui usufono mamalu o le Palemene aemaise le Afioga i le Minisita mo Faatoaga ma Faigafaiva. Malo faafetai e faapena saunoaga a le aumatutua. O le mea la lea malo saunoa.

Tulai mai se isi sui usufono e fia saunoa. Tulai mai le sui usufono mo Safata Sisifo.

Afioga LEAANA RONNIE POSINI (Safata Sisifo): Lau Afioga i le Fofoga Fetalai, e faamau foi le agaga faafetai i lenei taeao. Faatalofa atu foi i le Afioga i le Palemia ma le Kapeneta.

21 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga i luga o le faitauga faalua**

E faatalofa foi i le tapuaiga a Samoa i Lana Afioga Mamalu, O Le Ao o le Malo ma Sui Usufono o le Fono a Sui Tofia aemaise foi si o matou itumalo, malo tatalo malo foi tapuai. Ae tau fai ia se manatu o lenei itumalo i le Tala o le Tupe ua opea nei i le Maota Fono nei.

E muamua i lau Afioga i le Minisita mo Galuega, Felauaiga ma Atinae Eeseese, leaga e talitonu lava o lau Afioga o le Minisita o le ivitu o le tamaoaga ma atinae tetele o lo tatou atunuu. O lea foi na ta talanoa ma oo atu foi i lau Afioga i tulaga o auala o lo matou itumalo, aemaise lo matou nuu lea o Sataoa. E talosaga ai lau Afioga ona o le auala lea e alu i tai ma le alu agai i uta. O le taimi nei lau Afioga i le Minisita ua oo i le tulaga foi lea ua agai ifo si o matou nuu e tau tanu le auala lea, ua tele foi taavale ua afaina ai o lo matou nuu. Lau Afioga o le talosaga lau Afioga, a maua foi se avanoa e te afio atu ai ma e silasila i ai i tulaga o auala ia o si o matou nuu.

E oo foi i le auala galue o lo matou nuu o Vaiee, ou te talitonu lava e utiuti lava lau faasoa, a o le matou tatalo i tulaga o tatou auala. E i ai le auala lea e alu i tai i Saanapu faamolemole lau Afioga i le Minisita, ou te taua le auala lea ona o ata tifaga ia na fai, le ata tifaga lea o le Survivor a Amerika, ia ona alu foi lea o le ata tifaga lea a Ausetalia, ia o lea foi ua toe omai Ausetalia, o lea lava e faaoga ia le afioaga lea o lo matou nuu o Saanapu. A o auala ia o lea e solia e ata tifaga nei, e tatalo i lau Afioga i le Minisita, se i e alofa ifo i auala ia o lo matou nuu.

E oo foi i moli auala lau Afioga i le Minisita, e manaomia ni nai moli e faamalamalama ai totonu o nai nuu ia o lo matou itumalo, mai lava i Vaiee, Nuusuatia, Lotofaga, Sataoa ma Saanapu.

Lau Afioga i le Minisita mo Galuega, Felauaiga ma Atinae Eeseese, semamanu lava o lea ou te i ai i i mea e fia faaleleia o lo matou itumalo, i le taimi na ou pasi atu ai i le itu lea i le atu Aleipata, o la e tu ai le tatou vaa lea o le Lady Samoa II. Ou te le o iloa ou te talitonu ua uma foi ona fai tauofoga e leai se isi e manaomia ai ia le tatou vaa lea. A o lea ou te vaai atu, pei lava ua latalata ina goto le tatou vaa lea i o i le uafu lea. O le popolega, afai o le a se fuafuaga a le Matagaluega i le tulaga o le tatou vaa, aua e mautinoa lava lau Afioga, e aafia ai lo tatou siosiomaga. Ae a mafai foi ona fai i se tulaga foi lea e ave i tai i se mea e faamagoto ai foi lea, aua a faamagoto i tai i le moana foi lea, e latalata atu ai foi ia, ona fai lea ma se mea e faailoga ai foi lea e fai ma mataaga foi lea mo e o i le sami, ae ia faaoga lelei. O le popolega lena o lea e i ai, o le tulaga ina ne i te i ua goto le tatou vaa i tai i le uafu i Aleipata, ona afaina ai lea o le tatou uafu i Aleipata.

Ona ou oo mai lea i lau Afioga i le Minisita mo le Soifua Maloloina. E momoli le agaga faafetai tele i lau Afioga i le Minisita, aua e talitonu e pei foi ona ou taua i le Tala o le Tupe i le tausaga lea na mavae atu nei, na ou taua ai lau Afioga i le Minisita le falemai lea i Saanapu, Poutasi ma le falemai lea i Leulumoega, e tutotonu ai lava Saanapu i le va lea.

21 IUNI 2017

**Tulafono Tau Faaofi o le Faatatauina o Tupe 2017/2018
- felafolafoga i luga o le faitauga faalua**

E talitonu la lau Afioga aua o lea e matau atu i le agai mai i le tatou falemai i Motootua, o le matua tumu lava le tatou falemai lea. E talitonu lau Afioga i le Minisita i lau faasoa, se i e alofagia le falemai lea, e toatele foi le itumalo, e faaitiitia ai le agai mai i Apia, ae faatino le falemai lea i totonu o si o matou nuu o Saanapu.

Lau Afioga i le Minisita mo Aoga, Taaloga ma Aganuu. E momoli le agaga faafetai tele i lau Afioga i le Minisita mo Aoga. E talitonu o le Matagaluega leni o Aoga, o le tasi leni Matagaluega o lo o ave i ai le faamuamua a lo tatou Malo. E momoli ai le agaga faafetai tele, o lea foi ua matau, o lea ua amata ona toe fai ia sosoo faleaoga o lo matou kolisi mai lalo o le fesoasoani a Amerika, o lea e momoli atu ai le faafetai tele i lau Afioga i le Minisita. Faafetai o lea ua maea foi ona faagasolo galuega o lo matou aoga tulagalua i Sataoa i le polokalame lava lea Amerika, o lea e momoli atu ai le agaga faafetai tele i lau Afioga. Faafetai o lea foi ua maua ma asiasi atu i le matou kolisi ma aoga, o lea ua maua le faaopoopoga o faiaoga e pei ona talosaga atu i ai i totonu o lo matou kolisi, ae le gata foi i lea o aoga tulagalua. O lea foi na taua le tulaga o asiasi aoga, faafetai tele lava i lau Afioga i le vave ona maua e lau Afioga ma le Matagaluega e manaomia lava asiasi aoga, aua o lea ou te matau e le i atoa le tolu tausaga talu ona faamalolo ia tatou asiasi aoga, a o lea ua toe tulai mai lau Afioga, o lea ua toe fai a tatou asiasi aoga.

Ona oo lea o sau tala lau Afioga i le Minisita mo Aoga, Taaloga ma Aganuu, se i silasila totoa lava lau Afioga i tulaga foi ia o tatou .aua pei o lea ou te matau, e fuafua ia totogi o pule aoga i le aofai o tamaiti aoga. Aua o le mea lea ou te tau matau lau Afioga i le Fofoga Fetalai, e i ai aoga e oo foi i komiti aoga, e fiafia lava e aumai tamaiti aoga i totonu oí talia, ona a tele tamaiti aoga, o le tele foi lea o le grant lea e aumai e le Ofisa o Aoga ma le Matagaluega, ae toe tele foi ma le totogi o le pule. Lau Afioga i le Minisita, se i e silasila totoa lava i ai po o talafeagai foi lea, aua o le mea na maua i le matou sailiiliga ma le asiasiga, ua i ai vasega ua oo i luga toetiiti lava 70 tamaiti i totonu o le potu aoga e tasi, ae tasi le faiaoga. O lona uiga, o lo o fiafia foi le pule aoga ona e tele tamaiti tele foi lona totogi, e fiafia foi le komiti aoga, tele foi le grant lea e avatu. Se i e silasila totoa ifo ai lava lau Afioga i le Minisita mo Aoga.

Ona oo mai lea o le tala i le Iunivesite o Samoa, faafetai tele lava i lau Afioga i le Minisita aemaise foi le susuga i le alii pule. O lea ua ou matau o lea ua sefulutasi nei tausaga talu ona tuufaatasia le Aoga leni o Matata Eeseese ma le tatou Iunivesite. E momoli lau faamalo ma le faafetai i le pule sili, aua ou te tau matau e le faigofie le tuufaatasiga o aoga ia e lua. O le mea moni lava lau Afioga e taunuu ai le upu foi lele, e fiu e tau faatutusa le suamalie o le moli ma le apu, e le tutusa lava.

21 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga i luga o le faitauga faalua**

Lau Afioga faafetai o lea ua maitau i le tatou Iunivesite, o lea ua maua faailoga foi ia ua oo i luga i faailoga ia ua maua ia latou PhD, fai ia latou Masters i le tulaga o le tatou Iunivesite. A o lau maitau lau Afioga i le aoga lea o le Polytech, talitonu lau Afioga e mamafa i ai se manatu ona e tasi lea ivitu o le tatou tamaoaiga. O tagata o lo o manaomia mai e mafai ona latou faatinoina ia galuega. Aua talitonu a lelei le tatou aoga lea faa Matata Eseeese, e le toe o mai foi ni Konekarate mai fafo e aumai e fai ia tatou galuega tagata popoto faapitoa i le faiga o tulaga o galuega ia tau Matata Eseeese, maua uma i le tatou aoga lea. A o le tagata foi e saili lona tulaga i le tagata ua agavaa i le tulaga lea faa Matata Eseeese, e savalivali i le 5 i le 6 tausaga o aoga.

I totonu o le tatou Iunivesite i le taimi nei e molimau foi, e le taitai lava ia tatou tupe maua i le Tala o le Tupe mo a tatou aoga ia aemaise i aoga faa Matata. Faafetai ai i le Matagaluega a le SQA, o lo o i ai ia grant ia e aumai e faatatau tonu lava i le fesoasoani i le tatou aoga lea. Ou te talitonu foi i le tulaga a ou sailiili foi, e pei e tasi lea o aoga Matata Eseeese e vave ona fai, e le umi lava ona iu mai tamaiti, ae fai ia latou pisinisi. O le uiga lea o lau tala e mamafa i ai lou manatu, e vave ai le tamaoaiga o le tatou atunuu.

O lau tatalo i lau Afioga i le Minisita, e a pe a tofia ia se tatou komisi, se i toe suesue le tuufaatasiga o tatou aoga ia e lua, aua o lea foi e maitau i isi Matagaluega o le tatou Malo, e i ai foi a tatou Matagaluega e tuufaatasi, ae fai atu lava e le talafeagai. Ou te faafetai ia i le tatou Malo, ona e silasila loa i le mea ua tataua ona agai i ai, se mea silisili ia ona toe vaevae foi lea o a tatou Matagaluega. E tau faapena se manatu i lau Afioga i le Minisita mo Aoga, ae momoli le agaga o le faafetai tele i galuega lelei i lou tulai mai lau Afioga.

Lau Afioga i le Fofoga Fetalai, ona oo lea o sau faamatalaga i le Minisita mo le Punaoa Faalenatura ma le Siosiomaga lau Afioga i le Sui Palemia, masalo lea foi na oo atu i lau Afioga i tulaga ia i taligalu. I lo matou nuu lea o Sataoa, masalo o lea o le a 20 tausaga na fai ai le taligalu talu ai, ia ae oo mai i le aso e le i maea le taligalu lea lau Afioga. Se i alofagia aua ou te talitonu, e tele ia o le aia mai o le elelee o le matou nuu o Sataoa i le tulaga lea o le le i uma o le taligalu. O au foi sa ou tala i le matou nuu lea o Sataoa, e i ai le vaitafe lena e i ai i le alu agai i tai, lau Afioga talu mai le 2012 i afa ia na uma atu, lau Afioga ua matuai tele lava o le suiga i le matou vaai. A pa le vaitafe lea lau Afioga, ua le toe sao foi taavale i tai, ae o le tele o nai aiga ua afaina i le vai lea. Ou te tatalo atu ai i lau Afioga i le Minisita, se i e silasila totoa ifo i ai, ia ona o le suiga o le tala o le tau. Ona oo lea o lau tala i lau Afioga i mea o lisi o fanua na ou taua foi i le taimi ua sola i nisi foi o au lauga, faafetai tele lava i lau Afioga ona ua i ai le Komisi lea. O le Komisi lea na o atu i tua ma toe tau faamalamalama ia le tulaga o lisi ia i le lisiina o tatou fanua. Ia aua e talitonu, e i ai le mea lea ou te iloa lea ua tulai mai i e foi e o mai e lisi o tatou fanua. Leaga e o mai e lisi, ona o mai lea nofonofo ae leai ni o latou galuega ma ni atinae o faia i luga o lisi o tatou fanua, ae pei e toe faatalitali foi lea e toe faatau atu ia o latou share i totonu o lisi nei o fanua, e toe sue ai.

21 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga i luga o le faitauga faalua**

E pei e foliga e o mai e toe sue ai ia latou pisinisi i totonu o le tatou atunuu, ae ou te talitonu foi e le faigofie. Ia matua manino le lisiina o tatou fanua ia faaleaganuu ona e talitonu, a faaletonu le faiga o tatou lisi nei, ona tele lea o le afaina o nai aiga e a ia foi le lisiina o latou fanua.

Ona oo mai lea i le Afioga i le Minisita o le MCIL, e momoli atu foi le agaga faafetai i lau Afioga i le faafoeina foi o lea Matagaluega. Ae pau lava lea, o le tulaga foi lea i vaega foi ia e omai mo foreign investors ia e omai totonu o le tatou atunuu. Aua e i ai ia foreign investors lea ua ou iloa, ua toeitiiti tai 20 tausaga omai i totonu o le tatou atunuu ma fai ai ia pemitā ae leai lava ma ni mea o faia i le omai ai i totonu o le tatou atunuu. Po o le a se fua a lau Afioga i le tulaga o mea faapea o tagata ia e fai pisinisi omai i totonu, ae pei e omai e taumafai e tau fai ni nai atinae laiti, ia ona toe faamoemoe loa lea i tatou faletupe e nono ai ia latou tupe ona faaitiitia ai lea o avanoa o tagata o le tatou atunuu mo faletupe e fai ai ia tatou nonogatupe. O lea e tatalo atu ai i lau Afioga i le Minisita se i e silasila ifo, tulaga ia i o tatou tagata e omai e fai pisinisi ae omai lava e leai ni mea o faia i totonu o le tatou atunuu.

Oo mai lea i lau Afioga i le Minisita mo le Faalapotopotoga o Tagata Tafafao Maimoa mai Fafō, faafetai tele lava i lau Afioga i le tulai mai foi o lau Afioga i le tulaga o le vaega o tagata tafafao maimoa mai fafō. Lau Afioga e i ai le taeao na pasi mai ai lau taavale i gatai o le uafu i le masina lea na talu ai nei, ae taunuu mai le meli. E pasi mai lau taavale ae ou sau tu autilo i le va lea i le sau mai i le tatou uafu e tau mai i le fale lea i le tatou faletalimalo lea o Aggie Grey aemaise le taligalu lea, lau Afioga i le taeao lea na ou vaai ai, o le tele ia o le lapisi sa paepae i le auala, leaga e taua ia te au lau Afioga i le Minisita, o le vaaiga muamua lava lea a tagata tafafao maimoa mai fafō i le taimi e taunuu mai pe a omai i vaa ia. O le tatou uafu ma le auala savali. O le tele o tagata tafafao maimoa mai fafō e savavali mai ae na ou vaaia ai i ina aua o i i le va lea, o le tele ia o lena e i ai fale kalapu ma faleaiga la e i ai. O lona uiga o le po, malama ifo le taeao taunuu mai, sa paepae ai i ina. Ou te talitonu foi e fautuaina lau Afioga, i fale kalapu ia ma faleaiga ia, ave i ai se tuualalo, latou te faamamaina mea ia. O se vaaiga sa ta maitau atu i ai i ina i le taeao lea sa taunuu ai le meli. O le isi foi mea na maitau ai i ina, tumu ia o taavale laiti foi ia lau pasese a tatou i ina i le uafu. Ae sa maitau ai foi i lea taaavale, se pei e pule lava le avetaavale vaeatu lava le paia o le Maota, pei e pule lava le avetaavale ia ma lona laei. E i ai isi e pei lava o la e sauni e o e tautua le vao, ae le faamamalu ia tatou toniga foi ia o avetaavale o laei Samoa e iloa ai e atagia ai lo tatou atunuu. E taua ona o nai mea laiti ia, a o le vaaiga muamua lea o le tatou atunuu o i i le uafu.

O lea e tatalo atu ai i lau Afioga i le Minisita, faafetai tele i lau Afioga, a ou pasi atu ou te agai atu i le malae vaalele, i lou afioaga o Leauvaa, i le auala i moli faaituala lua, pei e ta te tau sese ai faapea ta ita o se malaevaalele lea ua ta oo i ai. Ae matua matautia le manaia o moli ia e teuteu.

21 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga i luga o le faitauga faalua**

O lau tatalo i lau Afioga, po o se fesoasoani na fai ai ia moli ia, ia o le tele ia o saoga uumi lea i Safata e avatu ai se fesoasoani se i fai ai foi ni moli uumi ia faamatagofie ai lea itu o le motu o le tatou atunuu.

Lau Afioga o le isi mea e pei ona o ta maitau, o lea na maua i le tala, e i ai tagata solitulafono ia ua....

FOFOGA FETALAI: Ia tulai mai lau Afioga i le Minisita.

Afioga Hon Sala Fata Pinati (Minisita mo Faalapotopotoga o Tagata Tafafao Maimoa mai Fafo): Ia faafetai atu i le sui usufono mamalu. Faafetai i lau Afioga Leaana. O le mataupu lea i le faamama o le taulaga, ua i ai le vaega lea o le Beautification Committee, e le o i lalo o le Faalapotopotoga o Tagata Tafafao Maimoa mai Fafo, ae i ai le Matagaluega o lo o i ai le vaega o le talafatai o Apia. A o le faafetai foi mo le fautuaga.

O moli ia e i le matou nuu, ia o nai tapenaga foi a matou lava ia, sue lava tupe a le matou nuu o moli foi e totogi lava e matou le cash power. O le aofaiga o le cash power i le masina masalo pe a ma le \$400.00, aua e 4 ia sections ua uma ona vaevae i ai. E \$400.00 la ia le cash power e alu i le masina. E 12 masina o lona uiga e \$4,800.00 le tupe, e sort out e matou, e sue mai lava e matou i totonu o matou sailiga tupe, e totogi ai moli. O le faiga foi o moli, e leai ma se tupe a le Malo na alu ai.

O le agaga ia na faatino ai le galuega, ia o le tautua i le atunuu, ia faalauiloa ma ia faamatagofie talafatai o Samoa ia aemaise la ia le afioaga lea i le faafifio ai o tatou malo mai fafo i le va lea o tatou mai le malae vaalele i Apia. Ia mo le silafia e le mamalu o le Maota ia tulaga uma nei, ia o se faataitaiga lea na taumafai i ai lo matou itumalo po o le matou nuu ina ia mulimulitai i ai le tele o afioaga. Ia o ai lava o i ai le agaga e faatino ia vaega ia e fai lava e le sui usufono ma ona komiti ia aua o mea ia e iloa ai le sui usufono lelei. Ioe faatino ma tausinio e fai mea silisili taulelei ai le atunuu ia aemaise foi le afioaga. Ia ma le faaaloalo lava.

FOFOGA FETALAI: Malo, ia atonu e avea foi le saunoaga a le Minisita, e fai ma lui i afioaga ma le afioaga o le sui usufono o lo o saunoa e atinae ma faaleleia i tulaga o le faamatagofieina o aai, ae pe tele se tapenaga a le sui usufono. Po o ua tai faaifo mai le saunoaga ae o le a....

Afioga LEAANA RONNIE POSINI: Lau Afioga i le Fofoga Fetalai o lea o le a faamaea atu.

FOFOGA FETALAI: Ia faamaea mai loa le saunoaga ona o lea o le a tatou, aua le faasiligamalosi.

21 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga i luga o le faitauga faalua**

Afioga LEAANA RONNIE POSINI: Faafetai tele i lau Afioga i le Minisita mo le faamalamalamaina, lea foi ua maua ia le tulaga. Ia e leai se agaga e tau faapea e tau fesili ai ni tupe o le tatou Malo i tulaga faapea. Ia ae lea ua maua o le agaga tautua o lau Afioga aua lea ua tau maimau ai foi le tatou paoa ae soia e taua lava le tulaga o le faamatagofie. Aua e pei o lea e fai le isi tatou Malo ia tau sefe ia le tatou diesel lea e alu ai le tatou paoa, ia ae faafetai tele mo le agaga mama ma le agaga fia tautua mo le tatou atunuu.

Lau Afioga i le Fofoga Fetalai....

FOFOGA FETALAI: Leai lea ua ou manatu e faapaia mata le saunoaga a le sui usufono. Leaga o la e faafofoga mai le tapuaiga a Satuala aemaise o laua Matua aua Tevaga ma Vaifale ma Salemuliaga. O ia lava atinae e lagolagosua i le faaleleiga o le atunuu ma le faamatagofieina o Samoa e ala i le auunaga a le afioaga. E i ai le manatu leaga e ia tatou le lafoga e mama, ae faapaia mata i le faafofoga mai a le itumalo ma aiga. O le mea la lea ua ou manatu ia leai e faapena, aua e pule e le o totogi e le sui usufono ae o lo o totogi lava e Leauvaa ma le sui usufono ia le latou paoa. Ia ae faaiu mai le saunoaga.

Afioga LEAANA RONNIE POSINI: Lau Afioga i le Minisita leai o le agaga faamalo i lau Afioga i le Minisita i le tulaga o le teuteuina foi o le tatou atunuu. O le agaga lea sa tau molimoli atu. Lau Afioga i le Fofoga Fetalai, leai o lea ua maua i tala ia le tulaga foi ia i tagata solitulafono ia i atunuu mamao. Ia aua lea ua maua pei a uma ona tuli ia latou faasalaga, ona momoli mai lea i totonu o le tatou atunuu, tipoti mai i totonu o le tatou atunuu. O le popolega la lea ou te tau popole ai le sui o lenei itumalo, o tagata nei e aumai, o latou foi nei e faatupu solitulafono i totonu o le tatou atunuu. O le tatalo, o le a se fua a le Malo, pe toe fua i ai se isi Tulafono Tau Faaofi ia aua tulaga ia aua e pei e foliga mai e na o na solitulafono lava i Niu Sila, Ausetalia ma Amerika ia ae uma loa ona tuli le faasalaga, ona lafoai mai lea i totonu o le tatou atunuu. Tatalo i le Faigamalo, ia silasila totoa i ai pe faaofi se Tulafono i lea tulaga.

Ia ona ou faaiu atu ai lea i le Afioga i le Minisita o Tupe, faafetai tele lava i lau Afioga i le Minisita o Tupe, aemaise foi le Pule Sili o le Matagaluega i le tapenaina o le Tala o le Tupe. E momoli lau faafetai tele i lau Afioga, ona o lau maitau o lea le Tala o le Tupe nei o le a maea, tupe faasili o le tatou Tala o le Tupe nei, lea o le a maea i le vaiaso fou, e \$23, 600,000. A lea ua ou vaai atu foi i le Tala o le Tupe lenei, Tupe Faasili foi o le Tala o le Tupe lenei e uma ia Iuni i le 2018, e \$21,300,000.00 O lona uiga a tau maitau atu, e \$44,900,000.00 tupe faasili mai i Tala o Tupe nei e 2, lea e momoli ai le agaga faafetai tele i lau Afioga.

Pau lava lea o nai popolega o lota ita sui usufono, i le tulaga lea ua tau vaai atu foi i tupe ia, tele ia o tatou tupe lea e faasili. Ae ou te talitonu lava i totonu o lenei Maota, ou te masalo o le 80% o le Maota lenei, o lo o latou faatagisia auala o latou itumalo.

21 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga i luga o le faitauga faalua**

O lea ou te tatalo atu i lau Afioga, pe le mafai ona toe aveane i ai se isi \$10milionia i le tulaga o le faiga o auala e fesosaoani ai i le faiga o tatou auala ia. Aua o lea ua \$44,900,000 le tatou tupe faasili, o lou popolega foi, afai e le faaaogaina le tatou tupe lea, ia o lea e aumai le tatou aitalafu i le tupe lea mama le tului, e \$90,300,000. O lona uiga a nofo le tupe lea e le faaaogaina, o lea lava la e tului le tupe lea. I lau la tatalo i lau Afioga i le Minisita o Tupe, se i e silasila totoa ane i ai le tatou tupe faasili lea, o lea ua latalata i le \$50milionia le tatou tupe faasili, a o lea ou teí Ae ou te talitonu lava o lea e silasila lau Afioga i le deficit o le tatou Tala o le Tupe, o lea e mamafa i ai. Ae ou te talitonu o le faagaioiga o le tatou tamaoiga, e taua i lau lea maitau ona o lea e i ai tatou tupe faasili ia, o le a le mea e le aveifo ai e fai ai nisi atinae a le tatou atunuu? O lea foi ou te vaai atu i le tatou unforesen i le tausaga lenai, e \$15,400,000. Ou te toe fesili atu foi i lau afioga, po o totoe se tatou tupe o le unforesen lea o le a uma i le vaiaso lea. Afai o totoe, ae alu atu foi ma lea, o lau tatalo i lau Afioga i le Minisita, o a ni mea, o atinae o le tatou atunuu o lea e totoe tatou tupe nei, iaí .

FOFOGA FETALAI: Ia faamaea mai le saunoaga a le sui usufono ua maea lou taimi.

Afioga LEAANA RONNIE POSINI: A tatou tupe nei, aua atinae o le tatou atunuu.

Lau Afioga i le Fofoga Fetalai, o nai manatu ia. Lau Afioga i le Palemia ma le Kapeneta, lafo atu nai o matou manatu, lafo atu foi o matou lagona e lagolago i la outou galuega.

Ia manuia tele lau Afioga i le Fofoga Fetalai. Ia manuia le Fono.

FOFOGA FETALAI: Malo faafetai saunoa i le sui usufono mo Safata Sisifo.

Ona o lea ua oo mai foi le taimi o le tatou malologa masani, ou te faasilasila atu ua faataatiaese Taulumaga a le Fono Aoaofaitulafono mo lana malologa masani.

Na faataatiaese Taulumaga a le Fono Aoaofaitulafono mo lana malologa masani i le itula e 10:45 i le taeao ma toe faaauau i le itula e 11:30 i le taeao.

Na toe faaauau Felafolafoaiga i luga o le faitauga faalua o le Tulafono Tau Faaofi o le Faatatauina o Tupe 2017/2018.

FOFOGA FETALAI: Ua ou manatu ua maua le faasiliga malosia e faaauau ai le tatou galuega. Ae ou te le i tapa se isi sui usufono e fia saunoa, ou te tapa ma le faaaloalo lau Afioga i le Palemia.

21 IUNI 2017

LAFO MO LE SUIA O ITULA FONO

Susuga Hon TUILAEP AUELUA FATIALOFA LUPESOLIAI LOLOFIETEELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai ou te tulai atu ma le agaga faaaloalo e faatu le lafo, *Mo le faamaonia o itula fono nei seia pasia le Tala o le Tupe amata i le 9:00 faauma i le 1:00 malolo, ona toe amata ai foi lea i le itula e 3:00 seia oo i le 7:00. E faamoemoe ina ia lava se taimi o se vaega o le tatou Tala o le Tupe e mafai ona kava i tatou Fonotaga nei, ia ona tatou malolo ai lea mo sina taimi tatou te o e tapuai le Manu Samoa i le taaloga faitauina ma le Au Tele a Uelese. Ma e faasilasila atu o lo o maua a tatou tickets ma o lo o faataugofie foi ina ia mafai ai ona tatou auai uma faatasi.*

Faaluaina e le Minisita mo Pisinisi, Alamanuia ma Leipa ma le Minisita mo Faatoaga ma Faigafaiva.

Na faamaonia le lafo.

Na toe faaauau felafolafoaiga i luga o le faitauga faalua o le Tulafono Tau Faaofi o le Faatatauina o Tupe 2017/2018.

FOFOGA FETALAI: E faia le malologa ua maea ona saunoa le Afioga i le sui usufono mo Safata SISifo, ma ou te tapa se isi sui usufono e tulai mai e saunoa e tusa ai o le tatou Tulafono Tau Faaofi.

O le a tuu atu ia le avanoa i le sui usufono mo Aana Alofi Nu.2.

Tofa ILI SETEFANO TAATEO TAFILI (Aana Alofi Nu.2): Faafetai atu lava i lau Afioga i le Fofoga Fetalai mo le avanoa. Ma ou te manatu o lea ua maea le tauteaga sa feagai ai ma le Palemia ma le Kapeneta, ua tali foi le sua i le mamalu o le Maota nei. A o lenei itula e tulai atu ma lou agaga faaaloalo e taumafai atu foi se motugaafa o si ou itumalo aua le Tala o le Tupe ua taoto nei i le Laulau a Fono e pei ona tapisa ai le Fono a Samoa i lenei taeao.

A o le i siia so matou sa foi e fai se tala, e muamua ona faafeiloai atu i lau Afioga i le Palemia ma le Kapeneta ua vaeseuga foi tatou te le fesilafai, e ui lava ina tatou va i falevea, ae ua lafi lava le iutaia ia i lona fale ie. Peitai i lenei taeao, o lea foi ua atoatagi le Maota o Samoa aua le soalaupulega o le Tala o le Tupe aua se lumanai o Samoa. E faatalofa atu foi i le faafofoga tapuai a Samoa i Lana Afioga Mamalu, O Le Ao o le Malo ma le Masiofo, tainane foi le sa seetolu o Sui Usufono o le Fono a Sui Tofia ma a latou Masiofo, le paia o faale-Ekalesia, paia faale-Atunuu. E faafeiloai atu foi i le tapuaiga a si ou itumalo o Aana Alofi Nu.2 ia Leulumoega ma Nofolii. Ua matou manatu lava, o paia ma mamalu e le aveesea pe oo i ai se faamatalaga a le leo pe leai, o paia lava le popo, o pa foi e le soloa.

21 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga i luga o le faitauga faalua**

A o lenei itula matou te tulai atu ma le agaga faaaloalo aua le Tala o le Tupe ua folasia i lumamea nei. A o le i avatua sa matou faamatalaga ma se lagona foi i le Tala Faatatau o le Tupe 2017/2018, se i avatu foi se lagona i nisi foi o nofo a Minisita o le tatou Kapeneta, i nisi foi o tulaga pei ona i ai galuega faagasolo mai le 2016/2017.

Lau Afioga i le Minisita mo Galuega, Felauaiga ma Atinae Eseeese, e auala atu i lau Afioga le faafetai tele lava, e matauina foi o lea ua faagasolo le galuega toe faaleleia a le Malosiaga Faaeletise isi ou nuu o Leulumoega, se tasi o vaega ua leva foi ona aumai foi le talosaga e le o atoatoa le malosi o le eletise pei ona i ai, o lea ua taufaaiuiu le galuega lea a le Malosiaga Faaeletise e pei ona i ai. E momoli atu ai le agaga faafetai ona o le tali manao foi e tusa foi o lea vaega.

Masalo o lo o taoto pea le talosaga a lou nei sui usufono i le auala galue o si ou nuu o Nofolii pei ona i ai. Ona matou manatu lea pei lava ona fai atu, leai e tuutuu atu pea i ina i ou autafa e lufilulfilima lelei o le a se taimi ua e silafia ua tatau ma onomea, ia o le a faapena ona faataoto le faasoia foi pei ona i ai lau Afioga.

Ona oo mai lea o sa matou faamatalaga i lau Afioga i le Minisita mo Punaoa Faalenatura ma le Siosiomaga, pei lava ona taua i sa matou faamatalaga i tausaga ua tuanai atu, o le taligalu o si ou pitonuu o Vaialua. O lo o faapea lava ona faatalia ia galuega faatino, ua na ona oo atu o le Matagaluega ma vaaia foi, ua faapena ona faafiafiaina lena foi pitonuu o si ou nuu, ae leai lava se mea ua faia. Ae peitai ane, o le pitonuu lea o Vaialua e sosoo lava le maota o Le Ao o le Malo ma le maota o le Sui Ao o le Afioga Tuimalealiifano, a tagai foi i ai ua afaina lava le vaitaele o lo o i gataifale, ona o le malosi o le galu. E pei lava ona matou fai atu, leaga a faatauanaui ua le tautamalii lea lagona. Ae taoto atu pea o lo o i ina le uta a le faimea i lau faasoia i tulaga e pei ona i ai.

O le isi vaega e faasino i lou itumalo, ae pei o se vaaiga lautele o lo o vaaia pea i le tele o aso pe a agai atu foi i le tele o tafatafaala o le tatou Malo, ma o se vaaiga foi e faatiga mata vaeane foi le faafofoga a Samoa ma le paia o le Maota nei. O se vaaiga lea i le tele o le lapisi aemaise lava i mea nei o pepa iila, ma o le tala lea a se tasi o tagata tafafao maimoa mai fafo na lotu atu i o i Leulumoega i le Aso Sa sa ma talanoa fai mai ia te au, e lagona lava lou faanoanoa i le matagofie o le siosiomaga o Samoa ae o le vaaiga foi lea ua ou vaai i ai, toetiiti lava so o se magaala e te oso atu ai, o lo o fola i le lapisi aemaise lava i mea ia tau plastic. E tuu atu lava i tafatafa o lau Afioga i le Palemia, po o ai tonu le Minisita e fitoitonu i ai lea vaega, ina ia fai i ai se fofo.

Ona ou oo mai lea i le Minisitaí .

FOFOGA FETALAI: Malie le sui usufono, se i tulai mai le Afioga i le Palemia.

21 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga i luga o le faitauga faalua**

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, e taua tele le saunoaga a le sui usufono. O le mea e taua ai o lea ua fofoga i totonu o le tatou Maota nei. O le mataupu lea o se mataupu o lo o tulituliloa pea lava e le tatou Matagaluega lea, aemaise lava le MNRE ma le Faalapotopotoga o Tagata Tafafao Maimoa mai Fafo. A o le mea lea e tupu, o le mataupu leni e aafia uma ai lava le atunuu atoa, aemaise lava o le mafuaaga lea na tofia ai pulenuu ma sui o nuu o tina ma toeaiina i totonu o nuu. O le latou galuega lea e tatau ona fai. A silasila i latou ia ua tofia o faaletonu ia a latou aai, o le mea lena a latou e tatau ona fai, ma o lea e faafogafoga atu le Minisita mo Tina ma Tamaitai, Atinae o Nu'u, Afioga ma Agafesootai o lo o gafa ma le faamanatuina pea faamanatuina pea. A o le itu lava o le faafogafoga mai o le atunuu o lea e faataua e o latou taitai i totonu o le Maota leni, o le ala lea ou te fiafia ai. Ina ia toe faafogafoga mai o tau atu lava, e le gata o pulenuu o latou ia o sui o nuu e fai ma latou galuega le faamama o aai i mea ia o lapisi ia, ae e faapena foi ia i latou e ana pasi ma taavale o lo o feoai solo. O le mea lea o le tausami, tausami o meaai i totonu o taavale ona togi lea i fafo o mea faapea ma taatitia solo ai i luga o le aualatele. Ae o le mea e tatau ona tatou mitamita uma ai tatou uma o Samoa, ina ia tau pea Samoa, o se atunuu e aupito i sili atu ona mama. E ui la ina i ai pea nai nofoaga ia e tupu ai mea ia, ae i le aotelega lava, e sili atu ona mama Samoa i lo le tele o atunuu o le Pasefika. Ae ou te faafetai i le sui usufono ona o lona taua faalauaitele o le mataupu leni o lo o tulituliloa lava e o tatou Matagaluega nei ia afioga ina ia silasila i ai i le faamamaina o latou nuu mai uiga ia faapenei. E tofi lava nuu ma tagata e i ai uiga faapena.

FOFOGA FETALAI: Malo faafetai saunoa. Tulai mai le sui usufono e faaauu le saunoaga.

Tofa ILI SETEFANO TAATEO TAFILI: Faafetai atu lava i lau Afioga i le Fofoga Fetalai, faafetai atu foi i le Taitai o le Malo ona o le faatauaina o leni mataupu. E moni lava au i le tuleiga a le Afioga i le Palemia, e le o se mataupu e fitoitonu i se tagata se toatasi ae mo Samoa atoa.

O le talosaga i le Minisita mo Aoga, Taaloga ma Aganuu, o le vaega lea o Aoga Amata, o se tasi lea o tulaga e aupito sili ona taua i le ola aoaoina o alo ma fanau a lo tatou atunuu. Aua a lelei ona tauamatamata le ola aoaoina o le tamaititi, ona oo atu lea i le tausaga muamua, ua faafaigofie le galuega a faiaoga. Peitai ane, o le faafitauli o lo o faapena ona faafeagai ma nisi e talanoa lava i lo matou nuu, e afa le tausaga ua leai se seleni. Ia ona tauanau lea o le tupe a lo matou nuu e totogi ai ia faiaoga ae o faiaoga foi o faiaoga ua maea ona aoao mai i le Aoga lea i Sogi. Ia o le vaega lena e tatalo atu ai i lau Afioga i le Minisita, mo lea vaega sina fesoasoani tau seleni ia aua aoga amata a nai fanau.

21 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga i luga o le faitauga faalua**

O le isi vaega ao lo o i ai pea i mataupu tau aoaoga, o le aoga lea Faa-Matata Eseeese i Vaivase. E leo toe po se lilo o lea ua tuufaatasi i lalo o le Faamalu o le NUS. Ua i ai lona aafiaga i le vaega lea. Matou talanoa ma nisi o le au fai konekarate foi lea e o atu tamaiti lea ua iu atu i Matata Eseeese ma faigaluega ai, faapea mai se latou tala, o tamaiti lea ua iu mai i le taimi lenei, toetiiti lava a leiloa e se tamaitiiti ona fai se galuega i se matata. Sa ou talanoa foi la i faiaoga o le Matata Eseeese, ae o le latou tala na faapea mai, e leai se tupe. Na pau le latou mea la e fai i tamaiti nei, na o le aoao o le vaega foi lea e tusitusi o le theory, ae a oo ina faatino le aoaoina, ona fai atu lea e aumai le oka e aumai ia mea foi ia e faaoga o materials e faaoga i le tulaga tau faatino po o le practical a tamaiti ae fai mai ua leai se tupe. O le talosaga lea ma le agaga faaaloalo lau Afioga i le Minisita mo Aoga, Taaloga ma Aganuu, se i silasilaifo i ai i lea vaega.

O lea ua taoto i paga tia o Tautiaga aua ia le Tala i le Tupe sa faapea ona liliu i ai le tofa ma le faautaga i le Afioga i le Minisita o Tupe ma le Vaega o Tupe. Matou vaavaai foi ma tilotilo i ai ma le totoa, lagolagoina e le sui usufono o lenei itumalo le Tala o le Tupe i lona aotelega, Ma lou faaaloalo lava faafetai.

FOFOGA FETALAI: Malo faafetai, saunoa i le sui usufono mamalu mo Aana Alofi Nu.2. Ia ua avanoa foi le Palemene mo se saunoaga a se isi sui usufono. Tulai mai le sui usufono mo Vaisigano Nu 2.

Afioga TAPULESATELE MAUTENI TAMASONE METULI II ESERA (Vaisigano Nu.2): Faafetai atu i lau Afioga i le Fofoga Fetalai, faafeiloai atu foi i lau Afioga i le Fofoga Fetalai o le Fono Aoao Faitulafono o le Malo o Samoa. E faapea foi ona faafeiloai atu i lena itu, le afio o lau Afioga i le Taitai o le Malo, e le gata i lea o le Sui Palemia, Afioga foi i Minisita, ia aemaise le vasega o Minisita Lagolago. E faafeiloai atu foi i lenei itu o le fono, i Afioga i sui usufono nei. O le faafeiloai i le Afioga i Lana Afioga Mamalu, O Le Ao o le Malo aemaise le Masiofo, faafeiloai atu foi i Sui Usufono o le Fono a Sui Tofia ma a outou Masiofo. O le faatalofa i lau Afioga i le Faamasino Sili faapea foi le Ofisa o Faamasinoga, e faafeiloai atu foi i le Ofisa o le Fono Aoao, o Faaululuga o Matagaluega, ma Faalapotopotoga ua mafai ona auai mai i lenei aso o le Fonotaga, ia e faapea foi le mamalu ua afiio mai ae le gata i lea o le au faasalalau e pei ona i ai i lenei Fonotaga. E faatalofa atu le faafogafogaaga a Samoa i le paia ma le mamalu mai mauga tetele seia paia maugaiti. E faatalofa atu foi i le faafogafogaaga a le Motu i Sasae, ona faapea lea o se faamatalaga faafeiloai atu i le tapuaiga a le Aufaigaluega a le Atua. O e o faanonomanu aua se manuia o Samoa, o lo outou faafalemalu i outou afioaga.

21 IUNI 2017

**Tulafono Tau Faaofi o le Faatatauina o Tupe 2017/2018
- felafolafoga i luga o le faitauga faalua**

E avea foi lenei avanoa e faatalofa atu ai isi ou itumalo Vaisigano Nu.2 i le tapuaiga, i le paia foi ma mamalu. Ona oo mai lea o se faamatalaga i lau Afioga i le Fofoga Fetalai i le auga ma le autu o lenei aso, o le sagai i le Tala o le Tupe. E momoli atu le faafetai i le Afioga i le Minisita, e le gata i lea o le Minisita Lagolago, Ofisa Sili foi ia ma le Pulega o le Matagaluega, e faapea foi e sa lagolago aua le faatinoina o manaoga moomia o lenei Tala o le Tupe. O le faafetai foi i le tulaga i lenei lava Tala o le Tupe, i fesoasoani sa maua e le tatou Malo, ma le faatinoina o le tatou galuega.

Lau Afioga i le Fofoga Fetalai, o le talitonuga lava ma le maitau, i le sini autu o lo o aumai i le Tala o le Tupe, e i ai le faaupuga lea e faapea, aga tutusa ma le talafeagai. I lou lava nei sui usufono e talitonu e faalateleina e pei ona aumai ai i le Tala o le Tupe, o lenei taiala o lo o faapea mai, o le faia o filifiliga sao ma le tonu aua se manuia. O le tulaga lea lau Afioga i le Fofoga Fetalai, e lagolagoina e lenei sui usufono ma lenei itumalo le Tala o le Tupe e pei ona i ai. Ona faapea lea o se manatu, e laitiiti lava nai vaega e fia agai i ai se faamatalaga.

O le tulaga muamua e avatu le faafetai i le Afioga i le Minisita o Tupe aemaise foi le Matagaluega ona o lea ua maua mai ma faailoa mai i le Tala o le Tupe, e leai se Tala Faaopoopo lona 2 o le tausaga faaletupe o lo o i ai i le 2016/2017. E i ai le talitonuga, o lo o manino ai i ma mautinoa ai i i, e mautu faasoa o a tatou tupe.

O le isi vaega lau Afioga i le Fofoga Fetalai, e fia agai i ai se faamatalaga, ona o le faamoemoega lea sa aumai, e uiga i le iloiloga lautele mo Matagaluega a le tatou Malo. Ou te maitauina o lo o mautu le faailoa mai e le Tala o le Tupe, le tulaga lava lea o le lafoga ma le tiute ia faapea foi totogi o auaunaga a le malo. E avatu lau faafetai ma le faamalo ona o lea ua mautu ma lelei mai ua manino ma atoatoa ia le fuafuaga i lea foi Matagaluega e pei ona faailoa mai i le Tala o le Tupe.

Lau Afioga i le Fofoga Fetalai, e lagolagoina foi i se manatu ma e faapea atu ia le faamatalaga, e faataua le isi foi tulaga lea e aumai ai. Le tulaga lea i le Soifua Maloloina, ma e faataua le toe tuufaatasia o le Matagaluega ma le auaunaga faasoifua maloloina e pei ona i ai. Ma e i ai le talitonuga lau Afioga, o a foi nisi iloiloga lautele o lo o taumafai i ai ia le tatou Malo e auala atu i le taitaiga a le Minisita o Tupe, i tulaga lava ia e ao lava ona taumafai e faatino ia lelei i tulaga talafeagai e faatino ai tulaga faapea. Foi le finagalo o le tatou malo e tauala mai i le Tala o le Tupe, e le o i ai se finagalo e toe sii i luga ia le tatou VAGST. O le manatu lava o lenei sui usufono, o lo o i ai lava ia faanaunauga na o tatou. Tatou tulimatai pea ia le atoatoa ia ma le lelei o le totogiina o ia lafoga o le VAGST. E oo i pisinisi o lo o faaulufale maia ia faapea foi ma le toe faatau atu i pisinisi i totonu o le tatou atunuu. O le tulaga lena o lo ta manatu lea i lea Vaega e faafetaia ai ia tulaga lea i le taofiofi laitiiti le siitia o le tatou VAGST.

21 IUNI 2017

**Tulafono Tau Faaofi o le Faatatauina o Tupe 2017/2018
- felafolafoga i luga o le faitauga faalua**

O le manatu mulimuli i le tulaga lea, e lagolagoina e lou sui usufono ia le faavae o Tupe Maua. E faapea foi ia faiga faavae mo Tupe Maua, lea ua manino lava le faataatia mai e le Tala o le Tupe ae momoli atu ai le faafetai ma le faamalo i le Minisita o Tupe faapea le Minisita Lagolago foi o le Matagaluega.

Lau Afioga i le Fofoga Fetalai, ona oo mai lea o se manatu i le faasoasoina o tupe, e pei ona i ai i le Tala o le Tupe. E maitau lava e pei ona saunoa ia le finagalo ua tuanai atu e pei e faamuamua lava i le tele o atunuu, e taumafai lava ia tatou aoaoga ma le soifua maloloina. Ma o le tulaga foi lea o lo o i ai le manatu o lenei foi itumalo.

O le tulaga e pei ona i ai i le Tala o le Tupe e faafetai atu, o lea ua tulaga mai lava o lo o toe taumafai lava lo tatou Malo e faaauau le fesoasoani lea o le totogiina o aoaoga mai vasega laiti seia aulia le vaega 11. Ma e i ai lava le manatu afai lava e o le tatou faamuamua lea o le aoaoina o le tatou atunuu po o tatou fanau e faasolo mai ia tatou, e i ai lava le faasoa e na ona faaopoopo atu, afai lava ua tai talafeagai le 12 ma le 13, ia o se matua matatia maoae lava lena matatia. E le faapea o se mea e tau faailoa, e silafia foi e le Maota nei tulaga ua i ai lava nai o tatou aiga, o le tele o aiga o lea ua faapea ua i ai ia sina tamaitiiti e toatasi e aoga i vasega i luga faasolo mai e oo mai lalo. A o sia aiga po o sia ulugalii, e le faigaluega le tamaloa le faigaluega ia le faletua foi po o le taus. Ae afai lava o le a se finagalo o le Malo i lea tulaga, ia manaia foi le faaauau atu i le 13. E i ai foi le talitonuga e leai foi se isi o le tatou o i le Maota nei e le o fesoasoani i nai o tatou aiga o lo o i ai tulaga faapea, e maitau lava i le taimi e totogi ai pili ia pe faapena. Ae pei o le talosaga lena, pe le o mafai ona toe faaopoopo atu i luga i le 12 ma le 13.

E faailoa foi le faafetai i le Ofisa o Aoga e tauala atu i le Afioga i le Minisita i le Pule Sili foi ma le faaululuga ma le Matagaluega i le tofa ua toe ave ai le avanoa e faatino ai le tofiga lea o le asiasi aoga. O lenei foi tofiga i lata ita matau, aua e le faapea e tatou lava e mafuta i o tatou aoga i nuu ma itumalo, e talatalanoa atu lava i le pule aoga po o faiaoga foi, e i ai lava le manatu lea. E taua le i ai lava o le sootaga lea e agai mai i le pule aoga agai i le asiasi aoga mai nuu taitasi o se itumalo. Ma o le faafetai lava, ona o lea foi tulaga i lau Afioga i le Minisita foi ma le faanaunautaiga e toe faatino ia lea vaega.

O le tulaga lea mo sikolasipi mo faiaoga, ia e leai lava se isi e le naunau i lea tulaga. Faafetai o lena lava e i ai le avanoa e aoao atili ai a tatou faiaoga, aua e mafai ona faapea atu se faamatalaga, o le tulaga lava lea o le mea tau faiaoga o lea sa pe toalua nai sui usufono sa talanoa i tulaga i aoga ia faa-Matata. Ma e molimau atu lava, o le tulaga lava lea sa talanoa atu ai, taatia ia le le lava o le tupe i le tulaga lea o se faatinoga o se matata, a o le tulaga lava i le poto foi lea po o le theory e moomia foi, e tele lava le moomia e faiaoga o le tulaga tau matata, pei o le tulaga lena e talosaga atu ai.

FOFOGA FETALAI: E toe lua minute o le sui usufono.

21 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga i luga o le faitauga faalua**

Afioga TAPULESATELE MAUTENI TAMASONE METULI II ESERA: Ia leaga o lea ua vave mai le faaumaina o le manatu foi i lenei Fonotaga, ae se i faasolo atu pea nai mea laiti ia manu o lava le avanoa.

Ia o le tulaga i le soifua maloloina. Atonu e faafetai atu lava i le Afioga i le Minisita mo le Soifua Maloloina ia faapea foi Pule Sili ma la outou Matagaluega. E leai e talitonu lava o le tulaga lelei lea ma mautu e toe taumafai lava e toe faafaigaluega nai a tatou fomai ua iu mai, e le gata i lea a tausii soifua e maua pea le avanoa i sikolasipi e faaauau ai pea le sueina o lo latou tomai. Ae tatalo atu i lau Afioga, o le tulaga lava lea i falemai faaitumalo e faaupu faafaigofie atu isi o matou itumalo o le Itu Asau. O le tulaga foi lea faafetai atu o lea ua i ai ia se fomai mai lea vaiaso i lea vaiaso. Ae tatalo atu pea o le tulaga lava lea o le faatali o le tagata mai i le Aso Gafua se i oo i le Aso Farai se i malaga atu le fomai....ua lava le tasi o le aso ia faalua pe faatolu ni aso. O le tatalo atu lea i lau Afioga i le Minisita, ae i ai lava le talitonuga o lo o mautu pea lou finagalo aua le fesoasoani atu mo e foi o lo o taumamao ma le falemai tele i Apia nei, e faapena foi le Faasaleleaga pei ona i ai i Savaii.

Ona oo mai lea o se faamatalaga i le tulaga lea i le Matagaluega o Faatoaga ma Faigafaiva....e tasi lava le mataupu lea e taumafai atu ai e taumafai pea i tulaga lea i faamai, e i ai lava le talitonuga, e le tea tatou ma tulaga ia, ae o le a lava le mea e tatau ma le mea e mafai ona fai, ia taumafai e faatino. Aua e silafia foi o le soifua maloloina pe a fua i ai o le tamaoaiga o le toatele o tagata o lo tatou atunuu, ia pei o faatoaga ma le faigafaiva. Ae toe talosaga atu i tulaga o pole ma tulaga na, se i toe tagai ane ia maua lea avanoa e faafaigofie ai ia tulaga i faigafaiva.

Ae ona o lea ua faapuupu mai le taimi, taatia ia isi vaega ia e lua, a o se avanoa laitiiti lea e avatu ai lau faafetai. O le tulaga o le faafetai ona o lea ua utiuti le taimi ae o le tele ia o isi mea ia ou te fia talanoa ai, ae avatu lau faafetai i le Minisita mo Galuega, Felauaiga ma Atinae Esee, e lagona lava le fiafia pei o le tulaga foi pei ona i ai, e tele ia nai vaega sa faatalanoa foi ma tusitusi ai i le Afioga i le Minisita e faapea foi ia lagolago, aemaise nai Pule Sili ma nai ofisa sili o vaega ia e i ai le vai, o le eletise o i foi i felauaiga, pei o le tulaga lena e avatu ai lau faafetai. Mo le silafia ia tulaga lava i moli, o lea ua uma ona i ai le faatalatalanoaga mulimuli nei ma le Pule Sili o le eletise e faatino ia vaega i le ogatotonu o lea masina. O le tulaga lau Afioga i le Minisita mo Galuega, faafetai lava o lea ua faataunuu le eliina o le vai magalo isi o matou nuu o Sataua, ia o le manuia lava lea mo le lautele o le matou itumalo, aua e le lavea ai na o Vaisigano Nu.1, ou te iloa o le a lavea mai ai ma le Vaisigano Nu.2.

Lau Afioga i le Fofoga Fetalai, ona o lea ua faauma mai ia lou taimi, ae faafetai lava mo le avanoa. E avatu lau faafetai tele i Minisita uma o le tatou Kapeneta, o lagolago foi, o Ofisa Sili o Pulega foi ma Matagaluega ma Faalapopotoga taitasi.

21 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga i luga o le faitauga faalua**

Ia manuia lau Afioga i le Palemia ma le Sui Palemia, aemaise le tatou Fono nei, faafetai tele lau Afioga i le Fofoga Fetalai mo nai avanoa e moni lava e le....a o lea se i faauma ia le lauga i se isi Tala o le Tupe, faafetai tele mo le avanoa.

FOFOGA FETALAI: Faafetai. E manatua foi sui usufono mamalu e maua avanoa e lua i mea taitasi pe a auiliili le tatou Tulafono Tau Faaofi. E manatu lava e alofa atu, ae manatu i lo taimi galulue e tatau ona faagaioioi ai a tatou Tulafono Tumau.

Tulai mai se isi sui usufono e saunoa. Tulai mai le sui usufono mo Gagaifomauga Nu.3, tulai maia lau Afioga i le Tamaitai sui usufono.

Afioga FAAULUSAU ROSA DUFFY-STOWERS (Gagaifomauga Nu.3): Faafetai lava i lau Afioga i le Fofoga Fetalai, e faatalofa atu i le Maota nei lau Afioga i le Fofoga Fetalai, le Taitai o le Malo, faapea foi ia Minisita o le Kapeneta, Minisita Lagolago faapea foi sui usufono mamalu o le matou itu nei, o Samoa ua potopoto, o Faauluuluga o Matagaluega ma Faalapotopotoga Tumaoti, ae a Samoa o lo o tapuai mai, e faatalofa atu ia Samoa e amata mai i mauga tetele seia paia maugaiti, le Aufaigaluega Totofi a le Atua.

E faapitoaugafa foi se faatalofa atu i lou itumalo ia Gagaifomauga Nu.3 pe afai lea o lagona mai, ona o le isi vaega lena o le faamatalaga i lenei taeao. Ae o le a fana tonu pea se faamatalaga foi i le Tala Faatatau o le Tupe o lo o opea i le Maota nei. Ua tagatagai atu i ai, malo faafetai tele lava i lau Afioga i le Minisita o Tupe faapea le Taitai o le Malo ma le Matagaluega o Tupe mo le tofa fetalai ma le faagaioioiga ma le faataatiaga o le tatou Tala Faatatau o le Tupe. O lo o maitauina ai e lou sui usufono, o lo o i ai le Matagaluega o lo o faatumauina lava a latou Tala Faatatau o Tupe mai le la tausaga i lenei tausaga, e faapea foi ma nisi o Matagaluega o lo o siitia ma Matagaluega o lo o faaitiitia. O lo o atagia mai ai la i Matagaluega o lo o statement po o la e tu faatumau ma Matagaluega o lo o faaitiitia, po o lo o atagia mai ai o lo o mataituina lelei le faatinoina o a latou galuega o lo o effective a latou measured and controlled, ua ala ai ona le siitia se Tala Faatatau o le Tupe mo ia Matagaluega, a o Matagaluega o lo o siitia, ia o lo o maitauina ai le Matagaluega o le Soifua Maloloina. Ma o lou au ia sui usufono, o ituaiga Matagaluega ia mo le manuia lautele o le atunuu ma le soifua lelei o Samoa, e ao lava ona siitia, aua e ao ona siitia le auaunaga lea e avatu i tua i le mamalu o le atunuu.

Ona avatu ai lea o se faamatalaga po o se tuualalo i le Afioga i le Minisita i le siitiaga lea o le Tala Faatatau o le Tupe a le Matagaluega o le Soifua Maloloina, ina ia tagatagai lelei i falemai lea faaitumalo, o lea foi e maua mai e nisi o sui usufono ua mavae atu, ou te talitonu o le aufaigaluega o lo o atoatoa lelei le tomai o le aufaigaluega. E ui ina leai ni fomai ae faa-tasi i le vaiaso, a o lo o gafataulimaina lava e tamaitai ma alii fomai foi o lo o faagaluaeina mai totonu o falemai ia faaitumalo.

21 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga i luga o le faitauga faalua**

A o le mea la e tupu, o le faaletonu o latou equipments e faatino ai a latou galuega. Ia o le tuualalo lea i lau Afioga i le Minisita aua o lena ua i ai lau faasiliga o le Tala Faatatau o le Tupe.

E faanoanoa lava lou sui usufono i le faaititia o le Tala Faatatau o le Tupe a le Matagaluega o Aoga, Taaloga ma Aganuu. Ona o le isi lea Matagaluega e ese le taua i le tulai mai totonu o Samoa, e le o po foi malae i tulaga o aoga i le taimi lenei i le alualu i luma o le soifuaga ma le alualu ai luma o metotia faaonaponei. Ma o le taua ia o le faaaupegaina atoatoa o alo ma fanau i le faatinoina i le faiga o latou meaaoga, amata mai lava i le aoga amata i le Pre-School. O lea e maua mai foi e se isi sui usufono ua mavae atu, o le taua ia o Pre-School, a o lou maitauina i le faiga o Pre-School lea e i ai, a manatu ifo lava le nuu ia e fai le latou Pre School, fai loa le Pre School ona e faamatuu atu ai le tupe, ae le o i ai ma le agaga ma le alagataua ua afua ai ona tataua ona amataina se Pre School. Ia o le tatalo i lau Afioga i le Minisita, ina ia silasila ane i ai i le vaega lea, pe i ai se isi ituaiga faiga ina ia faatauina ai Pre School ma faamalosia ai le faiga o Pre School ia atoatoa ona lelei aua alo ma fanau aoaoina e amata mai a o laiti.

Ona oo mai lea o se faamatalaga e le tele lava ni manatu o lou sui usufono, o le Matagaluega o Fesootaiga, o lea ua talia nei le taunuu mai o le Tuisamoa po o le a ea le igoa o le cable. Ae lau Afioga i le Minisita o le tuualalo, na ou faaleoina foi le lagona lea talu ai, ae ou te toe logologo pea i lau Afioga, o lau lauga lea e fai atu nei, e le o lagona mai e lo matou itumalo, talu ai, e le o oo lelei i ai le 2AP i o i lou itumalo. E tatalo atu ai i lau Afioga i le Minisita faamolemole, se i e tagai ane i ai, ina ia mafai ona faaleleia le vaega lea, po o le a se auala e mafai ai ona lagona lelei mai e si ou itumalo e le gata na o au, ae ou te talitonu o lo o i ai le western side o Savaii i le vaega lea seiloga e fetai ai uaea tetele foi na e i luga o fale ona faatoa iloa lea ua maua mai le reception a le 2AP.

Ona oo atu lea o lau faamatalaga i le Matagaluega o Tupe Maua, malo faafetai i lau Afioga i le Minisita, i le Tamaitai Pule ma le Matagaluega o Tupe Maua ma galuega faatino ma galuega fai ua mafai ai ona siitia tupe maua i lena tausaga e oo mai i le Tala Faatatau lenei o Tupe, e talitonu lava o le a faapena ona faateleina le tou galulue ina ia ausia lelei le Tala Faatatau o le Tupe ua faataatia mai nei. Malo faafetai mo le galulue.

E faapea foi i le Matagaluega o Tupe i le Afioga i le Minisita ma le faataatiaga o le Tala o le Tupe. O lo o maitauina mai le Tala Faatatau o Tupe talu ai, o lo o lelei lava le tapuaiga ma le control ina o le spending o le Tala Faatatau o le Tupe lea na ala ai ona maua le faasiliga lea. Malo faafetai lava mo le galulue aemaise lava o le faamaoni i le faatinoina o galuega e faapena ona atagia mai ai tala faatatau o lo o faataatitia ma ausia. You know just a token of faafetai and appreciation of work well done. Faafetai lava. Ma lou faaloalo tele.

21 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga i luga o le faitauga faalua**

FOFOGA FETALAI: Malo. Faafetai saunoa i le sui usufono mamalu. Ua avanoa foi mo se isi sui usufono e fia saunoa. Tulai maia lau Afioga i le sui usufono mamalu o Salega Sasae.

Tofa OLO FITI AFOA VAAI (Salega Sasae): Faafetai atu i lau Afioga i le Fofoga Fetalai mo le avanoa. Ou te faamalulu atu foi i lau Afioga i le Taitaifono o le tatou Komiti, se i ou faamuamua ia le tatou Komiti ona ua faalelava foi le malosi.

Lau Afioga i le Fofoga Fetalai, ou te manatu o lenei aso o se aso ua matagofie, aua o lele ua emo le uila ua taape foi viliga o matagi i le alofa le faatuaioa o lo tatou Tapaau Sili. Le alofa foi lea ua popolupe ai nei le seuga o malama ae taoto manino ataata o Samoanagalo i le paia maualuga o lenei Palemene. Malo le soifua laulelei i lau Afioga i le Fofoga Fetalai, le soifua manuia i lau Afioga i le Palemia ma le aiga Kapeneta, Afioga i Sui Minisita faapea foi le mamalu o sui usufono o le Palemene. E faapena foi ona faatalofa atu i Ofisa Sili o Pulega ma le au galulue, ua faamalo galulue faamalo foi tautua atunuu.

E avea foi lenei taimi ou te faatalofa atu ai i lou itumalo Salega Sasae faafetai i lau tapuaiga ma au talosaga ua laveai ai se vaivai o lo outou sui usufono ua fai ma outou fofoga i totonu o le Maota nei.

Lau Afioga i le Fofoga Fetalai e le umi se tautalaga a lou nei sui usufono, ae tau ina amata at uni nai manaoga laiti o lou itumalo. Lau Afioga i le Minisita mo Galuega, Felauaiga ma Atinae Eseeese, faafetai lava mo galuega lelei i ala galue o lo o i ai Sagone ma Fogasavaii ma Vaipua. Na pau lava lea lau Afioga i le Fofoga Fetalai, toe lava o Fogasavaii e fia sosoo atu laitiiti, ua lava le uumi la e i ai o Sagone ma Vaipua e tau i uta i le mea o lo o manaomia. Ae toe lava o Fogasavaii e le atoa lava se kilomita na o sina sosoo laitiiti pe a faapea e lava lau faasoa.

O le isi itu o le vaitaumafa lau Afioga, e leai se mea o faaletonu i le saosaoa o le vai o lo o i ai. Na pau o le talosaga i lau Afioga i le itu i sisifo o le faatanoa o lo o i Fogasavaii lea e feinu uma ai le tatou itumalo atoa, na o sina ofe lava e toe faaoso mai i ina e kava atu ai nisi aiga masalo po o le 20 aiga i le isi itu lena. Aua a faaaoga le ofe o lo o i ai nei, e toe ae agai i luga le vai, i nai ia foi aiga. E faapena foi le tatou moli, auala o lo o i Sagone, Fogasavaii ma Vaipua i le agai i uta, ou te iloa o la e o lo o lelei le auala o lo o i tai i le main road, ae pei o nai moli na ai o matauila o lo o faaletonu pe a.

Ia, ona oo mai lea o se matou faamatalaga lau Afioga i le Fofoga Fetalai, na o ni vaivaiga laiti lava o lenei itumalo e tuuina atu i tafatafa o lau Afioga i le Palemia ma le tatou Faigamalo i le agai i luma i fuafuaga.

Ua matauina lava i lenei vaitau lau Afioga i le Fofoga Fetalai le tele o faalavelave e tutupu mai toeitiiti lava le misi aso uma i le tulaga o le faaaogaina e tagata o atigifagu se i tulou, e fai ma auupega. Ia e le i leva nei ona ou sau mai le falemai, o le galuega lea a teine fomai, o le auau o atigifagu i ulu o onana, ia e le o le atunuu atoa a o le taupulea.

21 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga i luga o le faitauga faalua**

Ona i ai lea o se manatu vaivai lau Afioga i le Fofoga Fetalai, pe leai se afa i le finagalo o le tatou Malo ae faatulafonoina loa le faaaogaina o apa, aemaise lava i mea ia o pia, taumafa malolosi. Aua e i ai le talitonuga, e le gata i le faasaoina o nisi o soifua i lea vaega i le faaaogaina o mea nei o atigifagu, ae o le a leai se atigifagu e toe nuti pe paepae solo i luga o le... E pei e aiga lau faamatalaga ma le saunoaga foi a le Afioga i le sui usufono o le ma Itu Agai, i le paepae solo o atigifagu i tafatafaala, ia faamatagofieina foi le tulaga o le tatou siosiomaga ma maloloina ai foi ma le Ofisa o Leoleo i nei mea o misaga a e e le taupulea o lo o faaaogaina mea ia. Ae le gata i lena, atonu e i ai se faipisinisi na te toe faatuina se pisinisi e toe recyle ai mea nei o apa ae fua i ai le apa e le toe i ai lava ma se atigiapa, e oo i atigiapa eleni se i tulou le Maota, ma so o se ituaiga atigiapa o le a faaaogaina uma lava i ina ma maua ai galuega a nisi foi o tagata.

Lau Afioga i le Fofoga Fetalai, pei foi ona ou fai atu se faamatalaga i le Tala o le Tupe. E toe momoli atu foil au faafetai i le Afioga i le Minisita, e lagolagoina foi e lenei itumalo le tulaga i le Tala o le Tupe, ae pau lava o lea, e i ai lava nai vaega e fia malamalama ai a o le Tala o le Tupe, a ou vaavaai atu au ia i le Tala o le Tupe mai le tausaga faaletupe ua mavae seia oo mai i le Tala Faaletupe lea ua lotea i le taimi lenei, malo faafetai. Oka oka e se tele o se tupe faasili. I lou la talitonuga, e leai o la e sa agai lelei mai lava, i lau faasolo i le lima Tala o le Tupe i tausaga atu i tua o lea e agai i luma i mea o tupe faaopopo masani a lo tatou Malo i a tatou lava galuega i tupe faameaalofa. E avatu foi le faamalo faamalo i Matagaluega uma a le Malo aemaise o pisinisi tumaoti i le latou sao taua. E avatu foi le faamalo i lau Afioga ma le Ofisa o Tupe i le faafoefoeina o nai seleni o loo faapena ona maua mai Vaega ia. A fua la lau faamatalaga i le maoae o tupe faaopopo ia pe a faapea e sao faamatalaga o lo o aumai, e talitonu lau Afioga i le Fofoga Fetalai, e le tatau ona toe siitia se VAGST e oo i le faavavau. Lua, e le tatau foi ona toe siitia nisi auaunaga, aua o lea ua maua atu i le saunoaga a le afioga i le Minisita e pei e foliga mai o le a toe siitia foi auaunaga a le tatou Malo i le tatou atunuu. E oo foi i le mea lea tatou te vavao ai o le a fai lafoga ai le aufaigaluega, e le tatau foi ona fai pe a faapea e sao fuainumera ia. Aua o mea ia fai mai o faifeau e fai lafoga, na o le upu lava o faifeau ae le o faifeau e le o ni tupe a faifeau, o tupe a e uma lava o le atunuu o lea e fai sao e momoli e fai ai se meaalofa i faifeau. O lona uiga e le o popole i ai faifeau i le vaega lea.

Lau Afioga i le Fofoga Fetalai, ou te fia tautala lava i vaega ia e tolu, o aoga, o le soifua maloloina ma galuega ma atinae tetele a le Malo, ona i lau maitau i letetele o tupe o lo o faamatuu atu i ai. O nei foi matagaluega ma auaunaga, e leai se faamoemoe e maua mai ai se isi tupe, a o le mea aupito sili ona taua ia reflect mai tupe ia e avatu i le faatinoga o auaunaga. Ia, lau Afioga i le Fofoga Fetalai, e pei lava ona ou talanoa atu, faatoa ou foi mai le falemai e faamalulu atu i lau Afioga i le Minisita mo le Soifua Maloloina, e sili ona ou avatua ona ou te talitonu lava e le o se galuega a lau Afioga le agai e asiasi i mea uma ia.

21 IUNI 2017

**Tulafono Tau Faaofi o le Faatatauina o Tupe 2017/2018
- felafolafoga i luga o le faitauga faalua**

Ae o Lipoti o lo o avatu i lau Afioga e le talafeagai ma mea ua ou vaai tino i ai. Lau Afioga sa ou tapa se wheel chair se i ou faaaogaina tulou le Maota, ae sau le tali, e tasi le wheel chair i le Acute 7 ma le Acute 8. Ona aumai lea o le wheel chair lau Afioga, o lea ua ou tago pue mai le ata se i silasila i ai lau Afioga i le Minisita, e leai ni mea e tuu ai aao o gasegase, ou te le iloa la po o le a. E pei lava ona ou fai atu, afai o tupe ia e avatu ae reflect i le ituaiga e tasi le wheel chair ae malepe vaeatu le faafofoga a le Maota ma le atunuu, e le manuia. E oo foi la i le tausiga o le tatou falemai, maimau, ou te nofonono lava ma ou vaavaai ma ou faapea, maimau le tatou falemai. Na ona ou faapena atu lau Afioga i le Minisita, ae ua oo i se tulaga le manuia.

Ou te tilotilo atu i le \$300,000 lea ua faamatuu atu e tausi ai le tatou falemai i Motootua ma falemai uma lava, e i ai le manatu e matua le talafeagai, e le lava lea tupe.

Ia, ona ou oo mai lea i le isi Matagaluega lea e tolu ai Matagaluega o Atinae ma Galuega a le Malo, ina ne i sese lau tilotilo, a o saunoa lau Afioga i le Minisita o Tupe, e \$46.99miliona ua faaagaaga i ai, ma o lea foi la tupe ua uma ona vaevae mai e le tatou Matagaluega e faaoga i lea atinae ma lea atinae. Ae peitai lau Afioga i le Fofoga Fetalai, o lea sa e toe saunoa mai, e \$58.4miliona tupe maua mai fesoasoani a paaga mai fafo, ma le isi \$50miliona mai nonogatupe e faatino ai a tatou atinae. I lau la faaopopo atu tusa ma le \$156miliona le atoaga. Ia, na o se fia malamalama, afai matou te fesiligia le tulaga o mea ia, ae pei ona ou fai atu, o le matua tetele o tupe o lo o avatu, ae o se fia malamalama. Po o le a la le vaevae o le isi \$108miliona lea e totoe mai le \$46.99miliona lea ua uma ona vaevae mai i totonu o le Tala o le Tupe?

Ona ou oo mai foi lea i le Ofisa o Tagata Tafafao Maimoa Mai, o lea ou te tilotilo foi e tele se vaegatupe o lo o faaagaaga i le faalauiloina o le tatou atunuu aemaise i Niu Sila ma Ausetalia, le tupe lea e faapea e \$4.5miliona mai le Malo o Niu Sila, ia ae ou tilotilo atu au ia, po o le a le mea na le avea ai lea tupe e faalauiloa ai le tatou atunuu i le Atu Arapi, Aikupito ma Isaraelu? Aua o totonu o Niu Sila ma Ausetalia, o la e i ai tagata, e tumu i tagata Samoa, e leai se mea o lea foi ta te vaai i ai i polokalame a alo ma fanau a Samoa i Niu Sila, o la e latou te faia le mea foi lea o le Pacific Culture Festivals i tausaga uma, e faalauiloa ai tu ma aga a lea atunuu ma lea atunuu o le Pasefika. O lona uiga, e le aoga ona faaalu se tatou tupe i mea o lo o papaaao ai le tele o le tatou atunuu ae faaalu i nisi atunuu e pei o atunuu na o Isaraelu ma Aikupito lea na ou fai atu ai.

Ma le isi mea e fia malamalama ai lou sui usufono ma lenei itumalo, se i tau mai lava po o le a le channel o le TV a Niu Sila ma Ausetalia o lo o faalauiloa ai le tatou atunuu i matafaga, i faletalimalo faamolemole? E fia malamalama i ai Salega po o le a se channel o faaalu ai. Aua talu ona ou oo i Niu Sila, ou te le i vaai i ai, ae ou te tilotilo i channel uma, e sau ai polokalame a Fiti ma Rarotonga, ae ou te le i vaai i mea ia. Ae a ou maitau atu i tausaga ua tuanai e oo mai i le taimi nei, ou te le i vaai i se faalauiloa a Samoa i luga o le TV.

21 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga i luga o le faitauga faalua**

Ona ou oo mai lea i le Matagaluega o Faatoaga lau Afioga i le Fofoga Fetalai, a o maitau atu i le tupe ua faaagaaga, e \$13miliona lea ua toe nono mai, \$6.5miliona nono mai, ma le isi \$6.5miliona o tupe faameaalofa o lea o le a toe faauma ma faamaea ai le polokalame a le SACEP. Lau Afioga i le Minisita e tauala atu i le Nofoa, e fia malamalama foi Salega i lea foi vaegatupe, aua e manatua o lea ua uma ona avatu le tupe i tausaga ua tea pe \$12miliona Amerika e fai ai le vaega o le polokalame lenei, a o lea foi ua toe avatu le isi \$6miliona e faameaalofa toe nono atu ma le isi \$6.5miliona. Lau Afioga, e sili ona tuu lenei mea, malie lou finagalo o le matou lena manatu leaga e le o se polokalame o laugatasia uma ai le atunuu. Ia silasila la i ai i le ogaoga o le mataupu lenei, nono le \$6.5miliona e faauma ai se vaega o le polokalame lea a o ai e totogia? E totogi e le atunuu lautele. O le ogaoga lena ma le mataupu lenei ma le toe faaopoopoina foi o tupe ave i le polokalame lenei.

O le Minisita mo Communications. Lau Afioga, o lea e lupe le lafo a Lualemana i le tatou Tulafono lea o le Sex Offenders. Sa ou nofo lava ma ou tilotilo aua o lea e le i oo mai, ae tau lava ona ou tuualalo atu i lau Afioga i le Minisita, o le mea aupito sili ona mafua ai le vaega lea, o kamupani telefoni. Toetiiti lava leai se tamaitiiti, aua e faigata foi i matua ona taofiofi le mea lenei i o outou alo ma ni a matou fanau, mea nei o facebook. Ua ta vaai i ai e add le friend. O i lea ua maua ai avanoa o toelaiina e add ai teineiti laiti. Tasi lena mea aua ou te iloaina, e oo foi la i ata mataga lea e tutupu mai ai mea na, o lena foi e matala le faitotoa lena i alo ma fanau. Tau lava ina ou tuualalo atu i lau Afioga i le Minisita, e ao ona tatou agai i le cure, aua o lea ua aumai nei le tatou Tulafono lea o le prevention le mea la e aumai ai ae lelei ona tatou agai e cure le mataupu lenei. Afai ua siliga se tofa ma se uta i le pulega a alii ma faipule ma Ekalesia, o lea ua oo mai i taitai o le Malo...

FOFOGA FETALAI: Ou te vaelupeina le saunoaga a le sui usufono mamalu. Talu ai ona o lea ua tatou toai taunuu i le tatou malologa masani, e toe tele se... Ia, faamaea maia i se isi lua minute.

Tofa OLO FITI AFOA VAAI: Lau Afioga i le Fofoga Fetalai, e leai o lea ua faauma atu ma o le lauga foi lena a Salega po o nai motugaafa tau ina tuu atu i tafatafa o le Palemia ma lana Faigamalo e faamalulu atu pe a i ai se leo ua paopapa pe tautamalii i le faafofoga, ae faamagalalo laia o le leo o Ololeaeaeesefili. Aua o le faaumiga lena o lou igoa lau Afioga i le Fofoga Fetalai, o Ololeaeaeesefili. Faafetai. Manuia le Fono.

FOFOGA FETALAI: Malo faafetai. Ia, ua tele lava le taua ma le aoga o le saunoaga a le sui usufono mamalu o lea foi faatoa malamalama le Kapeneta ma le paia o le Palemene i le faaumiina o lou suafa, malo faafetai. Se se i vaai po ua resitara nei mea. Talu ai ona o lea ua tatou toai taunuu i le tatou... e vavae ai foe e pei ona faatulai mai le lafo ina ia faamuta le tatou Galuega nei i le 1:00 tatou toe amata i le 3:00 seia aulia le itula e 7:00 i le afiafi.

21 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga i luga o le faitauga faalua**

O le mea lea e ia te au le agaga faaaloalo ou te faasilasila atu o le a faataatia ese Galuega a le Fono Aoao Faitulafono seia aulia le itula e 3:00 i le aoauli nei e toe amatalia ai le tatou galuega ma le tatou Fonotaga.

Na faataatiaese Taulumaga a le Fono Aoao Faitulafono i le itula e 12:56 i le aoauli ma toe faaauau i le itula e 3:00 i le aoauli.

Na toe faaauau Felafolafoaiga i le faitauga faalua o le Tulafono Tau Faaofi o le Faatatauina o Tupe 2017/2018.

FOFOGA FETALAI: Ou te faasilasila atu ua toe amatalia Taulumaga o le Fono Aoao Faitulafono. E faia le tatou malologa ua maea ona saunoa mai le afioga i le sui mamalu mo Salega Sasae, ma o lea foi ua maua le avanoa e tulai mai se isi sui usufono e faaauau le saunoaga.

Afioga Hon Faumuina Tiatia Faaolatane Liuga: Lau Afioga i le Fofoga Fetalai, e na ona faafesili atu ne i te i ua leai se isi e faamaumauina ia lauga a le matou Itu Agai. E pei o le a fai e le vaega lea faamaumauga mo tali a Minisita.

Ma lou faaaloalo lava.

FOFOGA FETALAI: Ou te manatu eí .se i tuu atu le avanoa i le sui usufono mo Faleata Sisifo.

Tofa Lealailepule Rimoni Aiafi (Faleata Sisifo): O lea ou te matau atu ua atugalua le sui usufono i le matou nofononofo atu. E le o ni tamaligi tafefea mai i le vai foi lele i Alaoa mea ia e nofononofo atu i i. Aua tou te popole, lauga mai o le a matuai matou faamaumau i lalo mea tou te saunoa mai ai. Afai foi e le oo mai le Kapeneta i le taimi e í ..o le a ou tali atua. Faafetai.

FOFOGA FETALAI: Ou te manatu e ao onaí Malie le tatou Fonotaga, ona ia maua atoatoa e le Malo ia finagalo o sui usufono i mea o lo o faapena ona finagalo i ai le itumalo aemaise foi o le tatou galuega o le Tala Faatatau Autu o le Tupe.

Ona i ai lea o le manatu o le a toe faataatiaese galuega a le Fono Aoao mo se lima minute, e talia le Kapeneta. Ma lou faaaloalo.

Na toe faataatiaese Taulumaga a le Fono Aoao mo le lima minute e talia le Kapeneta.

21 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga i luga o le faitauga faalua**

FOFOGA FETALAI: Ou te faasilasila atu ua amatalia Taulumaga ma galuega a le Fono Aoa Fautulafono. Ou te manatu sa feagai ai le Kapeneta ma nisi o tiute ma faiva ia e faamalulu atu. Tulai mai lau Afioga i le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, e faamalulu atu. O le Aso Lulu lenei e fono ai le Kapeneta. Mo le silafia e le Maota lenei e leai se minute e faamaumauina o le tatou aso. E tolopo le Fonotaga ua ou oo mai i le pioga, ae o la e silafia e le foi sa fesili, o au e fa au leitio ou te fealuai ma au. E lua au taga i lalo lua au taga i luga. E leai lava ma se mea e misi ia te au. Ae o le mea sili o lea ua silasila mai, o lea ua nofoi atu le Kapeneta, ia faagasolo loa le tatou Fonotaga. O lauga foi sa fai nei le taeao o lauga foi ia na fai i le sefulu tausaga talu ai, e leai lava se mea o fou.

FOFOGA FETALAI: Malo faafetai. E faapena ala o mea, o isi faiva ma isi tiute e faapena foi ona faaaauu isi galuega ma isi tulaga faapena mo le ai o lenei aso ma le tapuaiga a Samoa.

Tulai mai se isi sui usufono e fia saunoa o lea ua afio mai le Palemia ma le Kapeneta aua mea o lo o faapena ona finagalo i ai sui usufono aua lou itumalo ma le Tala Faatatau Autu o le Tupe.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, o le mea lea na tau faatuatuai mai ai, se i tuuavanoa i le Maota nei pe i ai ni mea e fia saunoa ai. Ae ou te lagona a e aumaia le avanoa ia te au ma le Kapeneta, tali atu loa lea vaega ua muamua, e oo atu i ai e uma atu lau lauga ua tau maua se vaega e lauga mai ai isi sui usufono ia e totoe.

FOFOGA FETALAI: Tulai maia le sui usufono mo Vaisigano Nu 1.

Tofa LOPAOO NATANIELU MUA (Vaisigano Nu.1): Malo le soifua ma le lagi e mama i lau Afioga i le Fofoga Fetalai faapea foi lau Afioga i le Palemia ma nisi o le vasega o le Kapeneta o lo o faapea ona auai mai i lenei taimi o le tatou Fonotaga sa tataua ona amata i le 3:00 e le afaina.

Lau Afioga i le Fofoga Fetalai, ua uma ona e laupae paia ma mamalu o le tatou aso nei. Ae na ona ou fia faaoga lenei taimi e faatalofa atu ai i lou itumalo ia Vaisigano Nu 1. sau i Vaisala le afio o Tapaau ma le Gafa, Safune ma Taulauniu ma le afio o le Aloalii ia Vaai, faapena foi i le afioaga o Auala, Lealiifano ma Tapu ma le Toalima ma le afio o Safune faapena foi i le paia i Aiga ma Salafai, susu mai Tufuga afio mai le afioaga i le Matua maliu mai Salafai Faiga Faaitualalua Falefia ma le Siuolefanua faapea foi le paia o Aiga o Nofo, Aiga o Tupu, Aiga o Ee, Aiga o Papa. E faatalofa atu foi i le tapuaiga fatafaitaulaga e fia a le matou itumalo amata atu i Asau se i oo lava i Vaisala.

21 IUNI 2017

**Tulafono Tau Faaofi o le Faatatauina o Tupe 2017/2018
- felafolafoga i luga o le faitauga faalua**

Susuga i Faafeagaiga ma o latou faletua, faapea foi le paia maualuga i vaega eseese ma le lasilasi o le tatou itumalo, faletua ma tausii malosi o le nuu faapea tama ma teine seia oo lava i fanau. Talofa lava. E faatalofa atu foi i lenei itula o le aso i le mamalu o le Kapeneta faapea foi Minisita Lagolago faapea foi lenei itu, taua e lau Afioga le Palemia o le Itu Agai. Malo le soifua malo le lagi e mama.

Faafetai i le Afioga i le Minsita o Tupe mo le Tala o le Tupe ua uma ona saunia. Faafetai mo le galuega maea faafetai foi i le Matagaluega sa gafa mo le saunia, faapea foi i Matagaluega uma a le Malo, sa latou auai faatasi i le tuufaatasia o le Tala o le Tupe i lenei tausaga. E i ai nai manatu e fia faaali, e fesoasoani po o ni fautuaga po o ni fesili foi e fia tuuina atu, i lau afioga i le Minisita o Tupe e auala atu i lau afioga i le Fofoga Fetalai, ona uma ai lea o se manatu o lenei itumalo.

E muamua o le tulaga i mea tau auala, aua e tasi lava la ta upu e fia faamanatu atu pea i le Minisita mo Galuega, Felauaiga ma Atinae Eseese, o aualagalua o aualagalua o aualagalua, o le vaiinu o le vaiinu o le vaiinu. Aua o mea lava na e moomia e tagata. O lo o i ai foi le agaga faafetai o lenei itumalo e fia momoli atu i lau Afioga. E pei ona i ai le suiga o le fetuunaiga o le tau o le suavai e pei ona talosagaina ma talia e lau afioga ona o le mai o le vai o le matou itumalo. Faafetai foi ua uma ona faagaioi le suiga o paipa i totonu mo le afioaga o Auala. Ua maua ai e nisi o nai o matou tagata le suavai sa le mafai ona maua ona sa tele le suavai maumau i totonu o le manava o le elelele ona o le le lelei ma le mama o paipa. Faafetai tele i lau Afioga. Ae ui i lea e pei ona taua i le Fonotaga ua mavae, e lei oo lava se fuafuaga a le Matagaluega e uiga i le siama o lo o aafia ai vaitaumafa o lo matou itumalo. O le mea e fia faamanino atu ma faamanatu atu i lau afioga, a silasila i le Tala o le Tupe Faaletausaga a le Pulega o le Suavai i le 2014 i le 2015, e \$8miliona tupe i totonu o le Bank, 2015 i le 2016 e \$11miliona, a o le tau e fai ai le togafitiga lea e faaletonu o le matou vaitaumafa e le atoa se \$300,000. O le fesili i lau Afioga, o le tele o afioaga o le tatou atunuu o la e fia feinu, o la e i ai tagata la e fia feinu e pei foi ona i ai i si o matou itumalo. A o le fesili tele lena, po o le mea o fai se faaputugatupe a le Pulega o le Suavai ae le mafai ai ona faatino auaunaga e tataua ona fai mo le mamalu o le atunuu. Na ona fia faamanatu atu ma fesili atu faapena i lau Afioga, pe mafai ona faamatuu ese nisi vaega o na seleni e togafitia ai le vai o lenei itumalo. Ae ua uma ona momoli atu la matou faafetai e uiga i le tulaga o lo o i ai le fesuiaiga o paipa i Auala ma le fesuiaiga o le tau o le suavai ona o le mai o le suavai o lo o taumafaina e lo matou itumalo. Ae faafetai foi e le o tapeina le vai, aua po o le a lava o la lava e toaaga si o matou itumalo e tafu ma faapuna le vai a o le i taumafaina maif .

Susuga Hon Papaliitele Niko Lee Hang (Minisita mo Galuega, Felauaiga ma Atinae Eseese): Lau Afioga i le Fofoga Fetalai .

21 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga i luga o le faitauga faalua**

FOFOGA FETALAI: Malie le sui usufono mo Vaisigano Nu 1. Se i tulai mai le Afioga i le Minisita mo Galuega, Felauaiga ma Atinae Eseeese.

Susuga Hon Papaliitele Niko Lee Hang: E le faalavelavea le saunoaga matagofie a le sui usufono mamalu, ae o se mea e fia faamalamalama ina ia mafai ona tali atu. O le tupe lea e faailoa mai le \$8miliona ma le \$11miliona, ou te fia malamalama po o fea lea e agai i lau saunoaga i le tupe lea faamolemole?

Tofa LOPAOO NATANIELU MUA: O na e i totonu o le Annual Account a le Matagaluega lea e saina ai lau Afioga pe a momoli mai i totonu o le Palemene. O lea ua taulimaina e pei ona i ai i le Fonotaga ua tuanai le 2015/2016. Ua uma foi ona tagofia e le Komiti le 2014/2015 i le tausaga ua tuanai. Ma le faaloalo lava e tusa ai ma le faafesili.

Ona oo mai lea o lau faamatalaga i le Matagaluega o le Punaoa Faalenatura ma le Siosiomaga, o se vaitaimi ua tuanai na avatu ai e le Malo. Ou te le iloa po o le Malo po o le WESTEC le laau leni o le lusina. A silasila lau Afioga i le togavao i se vaega o le matou itumalo, ua tape uma e le lusina se vaega tele o le togavao. Ua pei o le ola a le fuesaina le ola a le laau leni. O lea e talosagaina ai le Minisita o le Matagaluega, pe mafai ona faia se fuafuaga po o le a se fesoasoani e mafai ona avatu, se i taumafai ai le tapeina o le laau leni se i tulou le mamalu o le Maota. Ua faasoese ua afaina ai foi le laufanua o le itumalo. Aua a tupu le lusina i se fanua e te silasila i ai e sosolo faavao. Ae po o le a se auala pe avatu foi ni iliafi se i tofu taulelea, o lo o i ai taulelea o le itumalo e fesoasoani i le faatamaia ma le faaloalo.

Ona ou oo mai lea lau Afioga i le Minisita mo Faatoaga ma Faigafaiva o le itumalo leni e i ai fua o le laueleele e le o taatele i nisi o itumalo, e maua ae le pei o matou. O le koko o le moli o le mandarin le moli lea e maua ia matou. Ua ou tusi atu i le amataga o le tausaga nei i lau Afioga ae leai lava se avanoa e tali mai ai, pe mafai e le Matagaluega i leni vaitaimi i le 1 lava ma le utiuti o tatou seleni ona o le vaitaimi leni e faasolo mai ia Me, e tau ia Aokuso, o le taimi leni e tele ai le moli lea ia matou. A na faapea e fai se suesuega ma se fesoasoani, o lo o matou taumafai lava foi ma nisi o le kamupani tumaoti i se auala e mafai ai ona faaoga le moli lea, aua a outou silasila i ai a outou Afioga, e matua fua tele laau ma moli o le itumalo leni. E le gata foi i le itumalo o Vaisigano Nu.1, ae oo lava i Falelima. O lona uiga, faamolemole lau Afioga i le Minisita se i e silasila ane. E i ai foi la nai au tamai issue o le faataitaiga o le vaega o le Tala o le Tupe o lo o atagia ai ou te le iloa po o se mea ua overlook po o se mea ua sese. O tulaga ia a silasila i le auiliiliina o le taunuuga o le faatinoga a le Matagaluega, o lo o i ai le latou molimau i le 2015, na latou fesoasoani i le tupe maua a le atunuu po o le contribution i le GDP e 15% i le 20%.

21 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga i luga o le faitauga faalua**

Lau Afioga i le Fofoga Fetalai, ou te lagona po o se fuainumera mai se isi mea, aua o le taimi tonu lea o lo o i totonu o le Lipoti a le Central Bank faapea foi ma le Bureau of Statistics, o le contribution a outou o le Agricultural Sector i le tamaoiaiga o le tatou atunuu e toese le .6% year on year.

O le agaga e ala ai ona ou fia taua le tulaga lea lau Afioga, leaga e tatau ona aumai faamaumauga e tonu ma sao, e tatau foi ona siaki. Aua e le aumaia faapea, o le isi vaega o le Lipoti lea a le Matagaluega o lo o tusia ai, e 20 papuaa se i tulou na asiasi.

O le aofaiga o papuaa fou tulou, e leai, aofaiga o papuaa tuai, e leai. O a la papuaa lea na alu ai le asiasiga lea? A o la e feoai, tele le mau meaituaolo la e feoai solo i tatou laueleele. E ala ona fai atu se faamanatu. A tilotilo foi i le tala faatatau a le Matagaluega, e 47% o le tupe lea e tuu atu i le Matagaluega o Faatoaga e alu i totogi. A aveese projects ia e i lalo ae tuu i luga, e 55%. O le uiga o lau faamatalaga lea e fia fai atu, are we getting value for money? E pei o le agaga lena o lea e fia faamanatu atu ai. O le isi tulaga lau Afioga, e pei foi ona taua e nisi o sui usufono, o le SACEP fai mai o lo o aafia ai ma le koko. O matou o le tele ia o faifaatoaga o le matou itumalo, o le koko lava la e fai, ae oo mai lava i le taimi lenei, e le o mautinoa tonu po o le a tonu ni faamanuiaga po o a foi ni fesoasoani o maua mai totonu o le polokalame lea o le koko. Na ona tuu atu faapena i ou talane lau Afioga i le Minisita, se i silasila ane aua o le taimi lenei i le taumafaiga ma le sailiilia o tupe maua a le tatou atunuu, e fai lava sina faigata ona sue pe a outou silasila foi i le tatou paketi. Ua laki le tele o tatou meaalofa ia e aumai fafo ma tatou soft term loans ia e i ai, ua faapaleni ai le tatou paketi.

Lau Afioga i le Minisita mo Tupe Maua, e momoli le agaga faafetai i lau Afioga ona o lea e maitau atu i le Lipoti o lo o faatupulaia pea le lelei ona faatino o le galuega o le aoina o tiute, malo le fai o le faiva i lau Afioga, aua e tua atu le Malo i lau Afioga ma le Matagaluega. Ae pau lava sau faamatalaga e fia fai atu, e uiga lea i le tatou feagaiga lea ua saina nei o le PACER Plus. A silasila lau Afioga i le taumafai maiga e si uso Aferika lea na sau e tau faatau mai le mataupu lea ia tatou ma faamalamalama mai i le Palemene, fai mai na o le \$600,000 tupe maua a le tatou atunuu e aafia. Ae a silasila i le Lipoti la e i luga o le website a Niu Sila, foreign affairs a Niu Sila, o le aofaiga o fefaatauaiga i le va o Samoa ma Niu Sila, export mai ia tatou e \$111miliona Niu Sila. O le aofai o le import mai a Niu Sila ia tatou, e \$4.8miliona Niu Sila. A faaliliu le \$111miliona lena i tupe Samoa, e \$15miliona le tiute e maua ai. O le mea lea lau Afioga, leaga o lea ou te tilotilo atu nei, e ui e tolu tausaga lea e faagaioi ai le mea lea ma ona e reducing basis mo le aafiaga o le tiute, ae i ai le manatu, e pei na olegia tatou e le vaega lea na omai e faamalamalama mai le PACER Plus ona o lea na tatou faafofoga ua uma ai lava po o se mea o le \$600,000 Samoa le aofaiga o le tatou tupe maua e aafia. A o lea a tatou tilotilo i ai, e \$111miliona le tatou import mai Niu Sila a fuafua i le tiute e maua ai, o lona uiga o se mea o le \$15miliona le lafoga.

21 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga i luga o le faitauga faalua**

O le mea lea e avatu ai ma le talosaga i lau Afioga faapea foi le mamalu o le tatou Malo, tatou saga tilotilo pea i le feagaiga lea rules on origin. E faapefea le oloa e sau mai Saina alu i Niu Sila aumai ai lea i Samoa a o Niu Sila lea ua fai le latou TPP lea e lavea ai ma Saina. O lona uiga la e oo mai Samoa mea ia e faamomoli mai Saina ua leai foi se tiute. Na ona faamanatu atu faapena i lau Afioga se i silasila ane i ai, ae ou te iloaina o le matafaioi a le Minisita o Pisinisi la e i ai le tulaga lea, ae na ona faamanatu atu faapena, po o le a le aafiaga o tatou tupe maua i tulaga nei ma fefaatauaiga ma feagaiga faava o Malo faapenei.

Ona ou oo mai lea i le Matagaluega o Telecommunication ma Technology, o lo o i ai le \$50miliona o le tupe faameaalofa mo le submarine cable. O le tausaga lea na tea atu nei e \$75miliona sa faamaonia i le Tala o le Tupe lea ua \$125miliona. O le fesili i lau Afioga, po o le a la le faiga o le mea lea? Aua o le kamupani lea o le a faatautaia pe faagaoioia le submarine cable, o le kamupani tumaoti, private companies e toalua ma le kamupani a le UTOS, o le SLAC ma le NPF. E ui e tetele shares o Matagaluega ia a le Malo, ae 27% la e umia saoloto e private companies nei, ae faapefea la le faiga o le tupe lenei i le outlay lea ua fai e le Malo, pe i ai la se tatou faamanuiaga e maua aua o lea ou te le o vaai totonu o le Tala o le Tupe mai le investment lea e fai e le Malo. Na o le pau le mea lea e vaai atu i ai, o lea ua tatou faamaonia o lea o le a pasia nei le Tala o le Tupe ua atoa ai le \$125miliona le tupe o le a faamaonia i le submarine cable. Pe i ai ni fuainumera e tau mai ai pe fia ni seleni o le a maua mai o le investment pe faapea foi le faiga o le \$125miliona lea pe charge se interest po o le a se faiga ona e le o maoti mai totonu o le tatou Tala o Tupe le faatinoga o le tulaga lea. Ma le faaaloalo i lau Afioga.

Ona ou oo mai lea i le Afioga i le Minisita mo Aoga, Taaloga ma Aganuu, malo foi i lau Afioga, e tele le galuega ua faia e lau Matagaluega i le matou kolisi ae ona ua pau lava o le a lava le tele, a o matou nei e mamao i tua. O isi taimi pei ta te mafaufau e le o out of sight out of mind, a mamao tele le mea e te i ai, pei a galogalo atu foi matou. E i ai le tulaga o le aso 12 o Iuni na amata ai suega a le Malo, a o le aso lava lea na avatu ai le faaiuga a le Matagaluega e transfer le isi faiaoga o le kolisi i Mataaevave. Ua uma ona ou iloa le mafuaaga o lo o i ai foi le vaifofo, ae peitai, e le fesiligia leaga e pule le Matagaluega, pule lau Afioga ma le Matagaluega. A o le mea lea na tupu mai, o le vaiaso o le suega, sosoo ma le makaina o pepa o suega, ae toe aveese atu le faiaoga. Lau Afioga e na ona tuu atu i ou tafatafa. A faapea e tupu ia matou o lona uiga e fia nisi o aoga o aafia ai. Silasila ane i faiga faavae ma faiga o lo o faatino ai galuega a le tatou Malo ina ia mafai ona toe iloilo faiga ia. Afai o le lumanai o Samoa e mai tupulaga aoaoina, e tataua ona tatou faia i ai se tulaga talafeagai. Ma le tasi mataupu taua lava, a faapea o se fanau teine ua maitaga, o le policy lea e i ai nei e faaauau lava le teine i le aoga, ae pei ona ou faailoa atu i le Afioga i le tamaitai pule, Allocations have consequences, e sao le aia tataua lea a o le faalavelave e le mafai ona aumai le saolotoga soona fai a le isi tagata e aafia ai ma le saolotoga puipui o isi tagata.

21 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga i luga o le faitauga faalua**

O le manatu lau Afioga, e tatau ona toe silasila le Matagaluega, afai e faaauau pea, se i vaeatu lava le Maota ma le faafofoga mai a le tatou atunuu, tau ona fai se i ola le pepe ona toe foi mai lea e faaauau le Year 13 po o le Year 12, ae le o le mafai ona aua o le tele ia o nai matua sa faitio mai pe faapefea ona fai lea faiga. Ae peitai ua maea foi ona logo aloaia mai e le Tamaitai Pule, o le faiga lena o lea e fai ai, ae pei na ona valuvalusia aa o le fau i lau Afioga, afai foi ua faatamala le tulaga lea, e tatau foi ona faasala laitiiti, faatali se i oo i le tausaga fou ona faauma lea o lau aoga, leaga o le mea e ono tupu, o le lepeti e le policy lea le vanonofo ma le vafealoai o matua ma latou fanau.

Lau Afioga i le Fofoga Fetalai pei ona ou fautua, ae pei ona ou fai atu, o le tele o mea lelei sa faia e lau Afioga ma le Matagaluega a o lo o moomia pea, moomia lava. O maua ma Aliimalemanu sa ma amata mai i le Itu Asau, a ua seasea toe i ai nai fanau, a le omai lava iinei i Apia e le oo i le tulaga faamanuiaina, aemaise ua maualalo tele le aoaoina. E avatu ai le talosaga i lau Afioga, silasila alofa ifo i nai alo ma fanau a le itumalo, e moomia foi e latou le fia popoto, e fia inisinia, fia saienitisi, fia loia, fia faiaoga, a o le mea lea e i ai nei, a misi mai le nursing, ona pau ifo lea i lalo i le faiaoga, ia ona toe o atu foi lea toe faiaoga i si o matou itumalo, ae talosagaina pe mafai ona fesoasoani atu i tulaga faapena aua pei uma lava na o le tasi pe lua faiaoga science la e i ai, ae o le Year 9 agai i le Year 13 e 400 tamaiti aoga. E tulai atu ma le faaaloalo ma le agaga maualalo e fesoasoani i le matou itumalo.

Ona ou toe foi lea i le Matagaluega o Galuega Tetele, our development money o lea e alu iinei i Upolu. E laitiiti se vaega o le tatou atinae, o lo o alu i le matou motu i Salafai. Ia e talosaga atu i lau Afioga faapea foi lau Afioga i le Taitai o le Malo, alofagia le uafu i Asau ua tatau ona fai. A silasila foi i le faamaumauga a le Visitors Bureau, o le Tourism po o le Samoa Tourism Authority, lea e i luga o le Samoa Statistics, so o se taimi lava e alu ifo ai le meli i Apia, oka oka le alu i luga o fuainumera o tagata tafafao. Ae ua lava lena na o le meli e alu atu i Asau, maua ai foi nai a matou esi ma nai a matou niu e faatau ma matou o ifo ma sisiva i luga o le uafu, ma lalo o fau ma tafatafa ane o le uafu ma maua ai nai seleni a lo matou itumalo. Ae le gata i lea o le matou...

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai...

FOFOGA FETALAI: Tulai mai le Afioga i le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: E tele lava le galuega sa fai i le uafu i Asau i le tausaga e 1970, faaloloto ai tipi ai ma le ava, tipi i luga o le aau, ona alualu lea taimi lena o tafana i fanaia e faamalepe ai le papa. Ua fiu e tafana papa na, ae pei se papatea foi lena e matua le ila lava i se fanaia.

21 IUNI 2017

**Tulafono Tau Faaofi o le Faatatauina o Tupe 2017/2018
- felafolafoga i luga o le faitauga faalua**

Ona aumai lea o le expert mai Holani, molu i ai i lalo, o lana faaiuga, e leai lava ma se fanaia e mafai ona talepea le papa lea. O lona uiga la, e papau lava le, o le ala lena, o le isi lea uafu taua tele, a o le faaetonu tele na o le ava. O le material foi na aveese mai lea na fai ai le malaevaalele. Na ona agi mai lava o Ofa toe talau uma mai lava i lalo o le, la ua toe i lalo o le alititai.

Sa ou talanoa lata mai nei i le savali na sau mai Saina, o le isi foi kamupani ae fai mai le kamupani, o lea ua i ai ia matou masini i le taimi lenei. O masini na o papa na e le toe tui e ni fanaia, a o latou masini na, na ona tuu atu lava o le masini e tasi na ona alu atu lava aati le papa lea taei uma lava.

O le la ua i ai le talosaga, mo le faalolotoina o Asau. A oo i ai le faasologa o tatou projects ia e ono fesoasoani mai Saina ona ou faapea lea ua maua le ai o lau lauga umi lea na fai nei. Ae o fuainumera ia sa e taua mai i le lipoti, e na o le 3 lava miliona lea sa faagaioia ai. A e tilotilo i le cash flow, o iina lea e maua ai tupe e sau i totonu ma alu i fafo ona totoe lea o le 3 miliona o tupe na o la e faatupe ai ia le galuega a le tatou vai. Ia ae pei o le faasaoga lena nei tei a ou faalogo mai pei e faulai seleni la e i ai ae e manino le mataupu pe a e vaai i lalo o le cash flow, ona iloa uma ai lea o mea la e alu i ai tupe ma le Vaega lea e totoe. E tatau lava la i le faalapotopotoga ona lava ia lana cash flow o le seleni leaga e toatele tele le aufaigaluega, e tatau ona uma ifo le vaiaso ua maua tupe e totogi ai le aufaigaluega ia latou galuega ia e faatino i le atunuu atoa.

O le tulaga foi i le vai, e i ai lava le faaeteetega i le mea lea o le vai. E manatua foi o le vai lea e mimiti mai i lalo o le manava o le eleele, a alu ese mai le vai ona pu atoa lea o lena mea. E i ai la isi itu o le lalolagi, ua mimiti mimiti le vai alu ese ae la e ava atoa, ua leai loa se mea e talitali ai collapse ifo loa i lalo ma le eleele oti tagata. O le mea foi lena e i ai le faaeteetega i mea faapenei aua o lo o i ai le manatu, a mimiti ese le vai, e toe tafe atu lava le isi vai faatumu ai, ona tetee ae loa e le vai lena le palapala atoa le papa ma le palapala atoa lea i luga. Ae a mimiti mimiti le vai e sau mai totonu i le manava o le eleele, e oo loa ina mai le vai, ona e iloa loa lea, ua leai se vai o toe totoe o le sami la e totoe. E ono tupu ai la faalavelave o le mea foi lena o lea e le faigofie le galuega lea e faafeagai ma le Minisita ma le Matagaluega, ae aumai lou faatuatuaga.

FOFOGA FETALAI: Malo, ia o lea ua manino au o fala i lea vaega, faauma mai ua maea lou taimi.

Tofa LOPAOO NATANIELU MUA: Faafetai lava i lau Afioga i le Palemia. O lea faatoa ou faalogo foi i le faiga o le vai lea. Mo lou silafia e 21 vai ua ou vilia i totonu o Samoa. E le vili atu ona vili lea faasameme le mea, e tuu i lalo i le mea la e i ai le fresh water lens, ona mimiti mai lea o le....

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai .

21 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga i luga o le faitauga faalua**

FOFOGA FETALAI: Ia, se i saunoa atu le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: O lea ou te tali tonu atu lava i le mea lea na e talanoa mai ai i le vai ua mai. E oo loa i le vai ua mai, ona o lona uiga ua pu fafa uma luga ae o le vai lena lea ua oo i le taele ua folasi faatasi ma le sami. Sa ou avea foi le faainisia, e ta te inisia uma lava.

FOFOGA FETALAI: Ia faamaea mai le saunoaga.

Tofa LOPAOO NATANIELU MUA: O le a ou le faafinai atu leaga ou te lagona na tele au vai na vili nai lo lau Afioga, ae ui i lea o le mea sili foi ua faafofoga mai lou itumalo o lena o le a i ai le, ia ae pau lava le mea e fia faasao atu lau Afioga o la e fix deposit le tupe lea a le vai, ne i te i ua e fai atu....

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: O lena a e tilotilo i ai i le lipoti lea, ona e tilotilo lea po o le a le, o Iuni i le 2015. A e tilotilo la i so o se lipoti, vaai le aso, mai la i le tausaga lena o le 2017 lea tatou te i ai. E pei o le tulaga lena sa fix deposit ai mo le faatinoga o galuega, ae oo mai la i le taimi lena, ua ese foi la le tulaga.

FOFOGA FETALAI: Ia se i faamaea mai le saunoaga a le sui usufono.

Tofa LOPAOO NATANIELU MUA: Ia faafetai i lau Afioga, lea ua maua atu lou finagalo, ae ui i lea, o le matupu mulimuli lau Afioga, e uiga i le Land Transport Authority, o lea e pei e foliga mai o le tatou fuel levy lea e ao e le Ofisa o Tupe ona o la e i lalo o le Tulafono e pei ona faamaonia mai e le Afioga i le Loia Sili. Ia la e i ai foi le Tulafono a le LTA la e foi e i ai le latou Tulafono ae ui i lea, o le pau lava le atugaluga lea e i lou tagata, ona o lea na aumai e le Ofisa o Lafoga, o le aofaiga o le penisini na aumai i le 2013, 2014 e 150miliona lita le penisini, 2014 189miliona lita, 182miliona lita a faatele nei la i le rate lea e i ai nei, ou te leo iloa pe aisea ae lea na ona fesili atu faapena, lau Afioga fesili atu faapena leaga lea ou te vaai atu e \$11 miliona le tupe lea e maua mai i le fuel levy. Ia ae tuu atu pea i lau Afioga atonu e maua se malamalamaaga pe a tali aloaia mai lau Afioga i le Minisita o Tupe i le tulaga o i ai le mea lea ona o le manatu o lo o noatia le Afioga i le Minisita o Galuega mo le faagaioiga o matou auala ma matou mea e mananao ai ona o le utiuti o le seleni ia ae atonu pe mata e i ai se fesootaiga ma se tulaga i lea tulaga ona maua ai lea o se fesoasoani.

21 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga i luga o le faitauga faalua**

Lau Afioga i le Fofoga Fetalai, faauma atu ai se manatu o le matou itumalo, faafetai atu foi si lau Afioga i le Palemia mo le fesoasoani mai ia faapea foi le mamalu o le Kapeneta ia Minisita Lagolago mamalu o le Maota nei, faapea foi Faaululuga o Matagaluga o le tatou malo o lo o afifio mai. Ia faafetai atu foi i le tapuaiga a le tatou itumalo, agalelei le Atua e fesoasoani ma faapea ona aualiitia outou faiva ma outou tiute o feagai ai, faafetai.

FOFOGA FETALAI: Malo, faafetai saunoa i le sui usuofono mamalu, ia ma ua faapena foi ona faagasolo pea ia avanoa i sui o le Palemene e saunoa ai e tusa ai o le tatou galuega. Ia tulai maia le sui o Falealili, maitau atu ua olioli mai le sa o Falealili i Sasae.

Afioga FUIMAONO TEO SAMUELU TEO (Falealili Sasae): Faafetai i lau Afioga i le Fofoga Fetalai, masalo o le tausaga lea na tuanai nei sa e tofia foi le lauga a Falealili Sasae. Ia o lea foi ua e tofia le lauga i lenei itula o le aso, faafetai mo lou avanoa.

E manatu e fia faafeiloai atu i lau Afioga o le Pao ma le Vavao o le Maota Fono lenei lau Afioga i le Fofoga Fetalai, e fia faatalofa atu foi i lau Afioga i le Palemia ia aemaise foi le Sui Palemia, Minisita o le Kapeneta, ia aemaise foi i latou o lagolago po o Minisita, Sui Minisita ia ma le mamalu o sui usufono o le Maota o Samoa.

E i ai upu a le atunuu, a faufaupue galu feai o le sami ona faailo mala lea o le peau o le matasaua, peitai o lea ua viligia matagi ma ua to i tua Apolima aua le soifua ma le ola. Ae fai mai le tala a viligia le u ma le aumatatao, ona inu malie lea o le soifua galue ma le ola tautua. Manatu o lea ua tatala le tau o le taafi fonofono o vala susufi a tina, aua le ripoti o le Tala Faatatau o le Tupe 2017/2018.

E le tele se lagona ma se sao o Falealili i Sasae, e nao ni nai lagona e faamanatu, ae muamua ona ou faapea atu i lau Afioga i le Minisita o Tupe, malo faafetai o le faiva, faafetai tautua, faafetai le toa. Matau o lea ua faasolo paepae lou lauao, ona o le sailiga o tupe aua Samoa ma ona atinae. O le tulai atu e lagolagoina le Tala o le Tupe e Falealili i Sasae e faaleo ai se lagona ia faatasi ai ma nai fautuaga. Masalo e lelava se vaiaso se tasi po o ni masina e faitau ai le Tala o le Tupe lenei i lona aotelega i se taimi puupuu.

Peitai o nai manatu na fesiligia ai, ia ona o tulaga foi lea i tupe e taua o le surplus e \$21miliona \$23miliona e pei ona i ai. Na pau lava le talosaga pe sao lea faamaumauga o le surplus ae le o se interest o se loan. Aua e pei e foliga mai, sa ou fiafia o lo o i ai se tupe faapea e ono faasoa atu e le Minisita o Galuega aua foi le fuafuaina o atinae a le atunuu. Peitai e pei e foliga mai o le tupe lea e afua mai ona o tatou nonogatupe po o aid foi ia e grant mo tatou galuega tetele. O le tulai atu o Falealili i Sasae e lagolagoina ma le atoatoa e tauala atu i se faamatalaga ia ni nai motugaafa aua foi nisi o nofo a Minisita, ia masalo o le pese lava lea sa outou faafofoga i ai i lea tausaga, o lea foi ua toe pese ai le sui a faipule ae ou te manatu o le a ou le usua fuaiupu o le pese ae lea o le a usu atu na o le tali.

21 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga i luga o le faitauga faalua**

Ia le Minisita o Galuega faafetai, faafetai mo le tali atu, ou te mautinoa o lea ua uma ona fuafua le auala ua loa tausaga e lei faatatau o Salesatele ma Siuniu. Ia o lea ua i ai le lagona o lea ua ave i ai lau faamuamua i le Tala Faatatau o le Tupe o lenei tausaga ia malo faafetai.

Ia o le taligalu lau Afioga i le Minisita mo Punaoa Faalenatura ma le Siosiomaga, ia na ona toe faamanatu o Sapoe ma Utulaelae na aafia i le Sunami. Ia e oo mai i le taimi nei o lo o manaomia lava se taligalu ona ua afaina tele le gataifale ia aemaise foi latou o lo o i ai nai turisi laiti o nai beach fale, ia ao lo o manaomia ia le puipuiga aua foi ia turisi o lo o gaasolo atu i ai faatasi ai ma le auala e alu i Utulaelae.

O le Minisita mo Faatoaga ma Faigafaiva, e puupuu lava, masalo o lea sa i ai se ripoti taufaasese ia po o se ripoti taufaafefe e uiga i le tatou talo. Sa tele na fesiligia ai faafetai i le tali vave atu o le Matagaluega sa saili ai vaifofo pe faamata e faamaonia lenei vaega. Peitai ia o lea ua maua mai i lou itumalo, ia o le faamai lenei e le o se faamai o le mea na tatou ola mai lava ma tatou talo muamua, le talo lea o le u. Ia o le u o le mea masani lava, e fiasia foi nisi o tagata matutua e tausami le talo lea.

O lona uiga e le o se mea e popole ai, ao le popolega o lou itumalo, e leo lava le maketi a tatou e ave i ai le talo. O le popolega lona lua, ua i ai foi ia tatou individuals exporters ia e i ai, ao lona lave, ua alu atu le isi alu i lalo o le tau foi lele e faamalie ai lona manao a ua leai se tau ina ia mafai ona fuafua lelei ina ia laugatasia ai tatou lea e ave le talo i fafo. Sa faigata ona maua se fetuunaiga ma se tasi o faipisinisi i Aukilani i le aso ananafi, ona o lea ua confirm mai pe faamautu mai e le alii lea, e i ai nisi o tatou exporters lea e avatua i le tau maualalo e \$35 i le 20 kilo. A o le talosaga i lau Afioga i le Minisita, pe mafai ona ao mai tatou kamupani nei ma tagata taitoatasi e fai i ai se fua ina ia mafai ona standardise le tatou price ia aua ai ne i o isi i luga ae o isi i lalo, aua o le mea lea e tupu, ua faigata ona toe fai se fetuunagia lea ona o lea e fai mai le alii lea e pule i le kamupani lea, o lo o i ai le tagata o lo o sapalaia au i le taimi lenei ae \$35. O lea foi ua omai ma le aulotu ia te au e mafai ona latou aumaia le container i se tau e maualalo atu. O le itu la lona ou te matuai popole ai lava po o fea le mea o i ai le control ina ia mafai ona laugatasia container e ave i ai le tatou talo i fafo. O lea ua silasila le mamalu o le Matagaluega o latou na malaga atu e asiasi i maumaga ma faatoaga a lenei itumalo, masalo e maua lava le 10 container e alu i le masina i faatoaga a Falealili Sasae, tele le talo. Masalo ua matauina foi le falate o le talo i le tatou atunuu, a o le popolega lava lea o le le lava o le maketi e mafai ona ave i ai. O lea e maua o lea foi e malaga lau Afioga e faalauiloa le maketi lea i Amerika ma nisi o atunuu, ia talosia ina ia ae manuia ou faiva ina ia mafai ona maua se faamamaavega i a tatou faifaatoaga. O le mea foi lea e i ai faifaatoaga a faapea e omai i le maketi o le tau lea ona o atu lea nofonofo ua le toe fia galulue ua le iloa po o fea le mea o le a ave i ai le talo. A o le mea e aupito sili ona taua, ia o lo o i ai se mea e tua i ai le fofoga taumafa o le atunuu aua o le talo o le mea e moomia i aso uma.

21 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga i luga o le faitauga faalua**

FOFOGA FETALAI: Se i tulai mai le Afioga i le Minisita mo Faatoaga ma Faigafaiva.

Susuga Hon Laauli Leuatea Polataivao Fossie Schmidt: O se mea e fia faamalamalama lau Afioga i le Fofoga Fetalai, e leai se agaga e fia faalavelave i le saunoaga a le sui usufono, ae i ai nai itu e fia tuuina atu ai le fesili leaga o lea e fai sailiiliga a le Matagaluega i le mea tonu lava lea e saunoa i ai le sui usufono.

Faamolemole le sui usufono mamalu, se i faailoa mai lava le tagata faipisinisi lea? Leaga o lea e faamaopopo ua atoa nei le ono, fitu masina o faamaopopo o le Matagaluega o exporters uma, e fai fono uma i masina uma. A o lea la ua maitau ua i ai tagata faipisinisi ia ua omai mai Niu Sila o latou lea ua omai fai le talaiga lea. Faamolemole la lau Afioga i le sui usufono mamalu, se i tau mai lava le faipisinisi lea, se i agai tonu i ai le Matagaluega, e taua. A tatou o i le mea lea o le fai o le finauga i fafo atu o Samoa, e le lelei mo le aufaifaatoaga, ae manaia le aumai sao, po o le Initia po o se Fiti ona fai lea i ai o se fuafuaga. Ma lou faaaloalo.

FOFOGA FETALAI: Tulai mai le sui usufono mamalu.

Afioga FUIMAONO TEO SAMUELU FUIMAONO: Faafetai i lau Afioga i le Minisita, ae o le maea ai o le Fono lenei ona avatu lea o le suafa o le Initia lea ou te talanoa i ai, aua o lo o i ai se tasi o alii o tapaaui foi o le atunuu o lo o ia avatua le talo lea i le Initia lava lea e tasi.

Susuga Hon Laauli Leuatea Polataivao Fossie Schmidt: Lau Afioga i le Fofoga Fetalai o le agaga moni lava lea na ou fia sailia leaga o lea ua oo mai Lipoti o le tatou Matagaluega o lo o faigaluega faatasi ma le tatou Trade Commissioner la e i Niu Sila. O le mea lea e finau ai nei tatou ma le Malo o Fiti, vaeane le va fealoaloai ma le Malo o Fiti, o lo o taumafai foi Fiti ia e fai le latou propaganda e uiga i le tatou talo lea ua sao atu, a o lea ua malamalama ona tuu mai tonu lava lea o le igoa aua e leai se exporter e mafai ona alu pe a le saina le quarantine a Samoa. O le tulaga tonu lava lena. Na ona ou faapena atu ina ia aua ne i popole ai se isi e maioio lelei e le Matagaluega le tulaga o lo o i ai le atugaluga o le sui usufono mamalu. Ma lou faaaloalo lava.

Afioga FUIMAONO TEO SAMUELU FUIMAONO: Faafetai. A faapea e maua ai se faamamaavega i le taumafaiga o le avatu o le talo a Falealili Sasae, o le a avatu uma information nei e uiga i le faipisinisi lea. Ae a faapea e leai, ou te lagona o le a teu malu pea ia te au nei faamaumauga ne i te i ua le maua ai se manuia o lou itumalo.

Ia....

\

21 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga i luga o le faitauga faalua**

Susuga Hon Laauli Leuatea Polataivao Fossie Schmidt: O lea e lelei lava le ma fetaliai ma le sui usufono. Na ona ou fesoasoani atu, aua o le tulaga lea, o Falealili lava lea e ave i ai le faamuamua, na tulai mai loa le faamai i Falealili tulai le Matagaluega. O lea e pei e tau solomua ia te ia le nana o tagata faaletonu ia e omai i le atunuu. O le ala lea o le taumafai atu e faasoa le faamatalaga ina ia manino ma faigofie ona fai atu le fesoasoani.

FOFOGA FETALAI: Malo. Ia tulai mai le Afioga i le Palemia.

Susuga Hon Tuilaepa Auelua Fatialofa Lupesoloai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, e le na o tatou lea e ave le talo, o la e i ai foi le talo a Fiti latou. A o le maketi lea, o le maketi o la e tatala mo tagata uma. Afai la o oe o le faleoloa lea e toai taunuu atu i ai talo, e na te le faatauina se talo taugata, na o le talo taugofie. O lona uiga la, o lea ua o atu nei tatou ma tatou talo tatou te mananao i se talo lelei ae faalava ane le Initia mai Fiti. O le tulaga faigata la lena, aua e le na o tatou o lea e alu atu ai le talo, e i ai le tauvaga la e fai. O le ala lena o lea e taumafai taumafai atu tatou, o lea foi la ou te maua atu o la e malamalama lelei lava le sui usufono mo Falealili i lana mataupu la e aumai. Silasila foi, o la e aumai, pei e togi mai le afa ae taofi le moa. O la e i ai lana tama la e fealuai solo i o e peki i lalo le talo ina ia taugofie lana talo ae oti ai le talo lea e alu atu i i. O le ala lena e togi mai ai le afa a o la e nofonofo lelei lava ma le moa. E pei la o le tulaga lena lau Afioga i le Fofoga Fetalai e fai si lavelave o le mataupu lenei pe a oo loa ina tatou feagai ma faleoloa o le au Initia o la e foi e fia ola latou. E le mafai lava la ona fia o i se supply e avatu le talo e taugata e fia o i le mea e taugofie. O le ala la lena a le maopoopo lelei ona fai a tatou mea, e oo foi la i le vaega lea e tau taofiofi e Laauli ma le vaega, e vaai atu loa o le a tuai ona alu ana talo, puna loa foi ia ma fai le tau e pei ona tau nana mai e Falealili.

FOFOGA FETALAI: Malo. Tulai mai le sui usufono e faaauau le saunoaga.

Afioga FUIMAONO TEO SAMUEL TEO: Faafetai mo le manatu o le Afioga i le Palemia. E leai e le o i ai se tulaga faanana, o le fia ola o Falealili Sasae lea e ala ai ona malupuipua faamatalaga nei. Ae o le mea mautinoa, o tatou lava. Ona toe manatua ai lea o le ad a si papalagi turisi, e toe oti lava tatou ia tatou. O tatou lava lea e ala ai ona toe faataugofie le tatou talo. A o le tulaga i le... ua maea le mataupu i le Minisita mo Faatoaga, o lea o le a talitali foi le palau lea na taua e le sui usufono mo Vaimauga Sasae atonu e fesoasoani foi i le faiga o faatoaga a Falealili Sasae.

21 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga i luga o le faitauga faalua**

O le Minisita o Tupe pei ona pasia ai ma lagolagoina, na o se tuualalo, ou te iloa o le vaega lea o le Housing Corporation, o se vaega e fesoasoani i le fausia o maota ma laoa, e faamamaavega. Peitai, ua uma ma le faamamaavega, uma ma le faamatalaga foi lea fesoasoani a ua faamamafa i le avega a le atunu le tele o le interest. A faapea e 4% e nono mai ai le tupe a le vaega lea i le Central Bank, a o lea e aumai e pei e foliga e charge le 17% po o le 18%, ua double triple le interest lea ua alu i luga o loan a le Housing. Ona o le toatele o tagata foi lele e fesoasoani mai e manaomia lau fesoasoani e guarantee loans ia, o lea e avatu ai se tuualalo pe le toe tagai ane lava i ai pe le mafai ona tuutuu laitiiti i lalo le interest rate ua fai si taugata tele o le tului lea i le tatou Housing faamolemole. E oo foi i le Development Bank, masalo sa fausia le faletupe lea mo le fesoasoani ia i latou le aufaifaatoaga ma i latou e faia nai faatoaga laiti.

Peitai, o le matua mamafa lava o criterias ia e manaomia, e faataamilo faataamilo se faifaatoaga e fai sana nonogatupe e iu lava ina toe foi lava e leai se nonogatupe e faia ona o le tele ma le tele o mea e manaomia mo nonogatupe. Pei na pau lea o le talosaga i le Minisita o Tupe.

Mo le Minisita o Aoga, Taaloga ma Aganuu, malo faafetai. Faafetai foi o lea ua ae le finagalo ina ia mafai ona toe fai ulu aoga, o le matua lelei o lona vaega ia faia asiasi aoga. Masalo e le i maua e nisi o sui usufono o lea ua faakonekarate pule aoga ma sui pule, a o lea e foliga mai o lea e tatalo mai lava e faakonekarate ua leva lava ona konekarate. Ia tailo i ai i nisi o pule aoga, a o pule aoga a le matou itumalo, o le tulaga foi lea manaomia o nai faiaoga, ou te iloa e i ai nisi vaega sa faauu talu ai nei mai le tatou FOE, ou te iloa e manaomia nai tamaiti faiaoga laiti faapena e fesoasoani i le au matutua o lo o i ai. O lona faigata ona o le toatele o tamaiti aoga, ae toagaogao faiaoga. O le vaega foi lele e iloa ai le tau faaletonu o aoga ma aoga i tua, e oo lava i le pule aoga, o lea e pule aoga i le aoga lea e i ai, ae ave lana fanau e aoga i le isi aoga. O i ina la e atagia mai ai le maualalo tele ma le lelelele o le aoga la e pule aoga ai, aua o la e pule aoga i o, ae aumai lana fanau faaaoga i le isi aoga. Ia o le fesili lona e tulai mai, aisea le mea e le faaaoga ai lana fanau, a o ia la e pule aoga ai i le aoga. E pei o vaega na lau Afioaga i le Minisita mo Aoga e tatalo atu ai.

Mo le Minisita o Fesootaiga, faafetai. Ou te tatalo ina ia oo mai se taimi vave ia fai ai le tatou Tui cable ina ia mafai ona faataugofie tatou telefoni, o data ma tulaga faapena aemaise o fesootaiga. O lea sa laga foi e nisi o manatu a o se lagona foi o Falealili Sasae, a o talia le vaega lea, aua ou te iloa o lea sa i ai tatou firewalls foi nei faapea e poloka ai sites ia ma le agai ai o fanau aoga. Ou te le iloa po o toe i ai tatou filters na e mafai ona taofia uma ai vaega ia ina ia aua ne i mafai ona access i ai tamaiti aoga ma i latou o lo o fiafia i lea vaega, faatasi ai la ma le tatou... sa i ai le Samoa Broadband lea sa i ai, sa fuafua mo Matagaluega a le Malo ina ia mafai ona link ai i inei lava.

21 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga i luga o le faitauga faalua**

Ou te le iloa po o fea le mea ua oo i ai aua o lea e tau fesilisili atu i le Matagaluega, e fou nei nisi o Matagaluega, ae masalo pau Matagaluega ia e faaaogaina le auaunaga lea, na o le Matagaluega o Aoga, Falemai, ou te le iloa i le Finance. E oo lava i Matagaluega a le Malo, e pei e i ai le tulaga mumusu foi lea e share informations. O la e faaaoga mai e latou isi isp services a o lea e tuu foi le vaega lea ua uma ona alu ai tupe a le tatou Malo pe \$20milion ea nogatupe na fai e faatino ai, a o lea lava e le o active lelei le broadband lea ua uma ona faataoto.

Ona faaiu atu ai lea ma se faamatalaga e pei ona ou fai atu, e puupuu lava foi le manatu o Falealili Sasae, ma nai faamanatu. E mulimuli lava i le Minisita mo le Soifua Maloloina ne i pau ia te au, sa ou tau mai i le taavale ua lavea i Falefa i le masina talu ai. Ou te taunuu mai i le taavale ua tigaina si ulugalii na o atu ai. Alu atu lava le ona soa le taavale lea ma afaina ai. Ona ou fesoasoani lea e aumai le ulugalii i le falemai i Lufilufi. Ae ou te tutu i fafo i le taavale ae sau le avetaavale o le van na tu faamalie mai e malie e o atu ia i Apia leaga o lea e leai se fomai.

Na ona tuu atu i autafa o le Afioga i le Minisita po o a aso ia e alu ai le fomai i tua i Lufilufi ae pe i ai se isi e vaaia le falemai lea ona o lea ua sulu atu i le taimi o le faalavelave faafuasei. Ia o le laki lava o lea foi na i ai nai aoaoga foi lea i le first aid ma tulaga faapena na mafai ona pamupamu mai ai si loomatua lea na afaina na oo mai ai i le falemai.

Ae pei o le talosaga lena se i toe tagai ane i ai lau Afioga i le Minisita mo le Soifua Maloloina. Manuia lau Afioga i le Fofoga Fetalai manuia foi lau Afioga i le Palemia aemaise foi o le galuega fitaituga a Afioga i Minisita, aua foi nei tetee le uluga i o outou finagalo pe a tetele atu sa matou tuualalo. A o le naunautauga ia lelei le tatou Malo. Manuia le Fono.

FOFOGA FETALAI: Malo faafetai saunoa i le sui usufono mo Falealili Sasae. Ia, ua avanoa le Palemene mo se isi foi saunoaga.

Ia, e maitau atu ua oli mai le sa o Salega i Sisifo. Tulai maia lau Afioga i le sui usufono mo Salega i Sisifo.

Afioga TOOMATA AKI TUIPEA (Salega i Sisifo): Faafetai lava i lau Afioga i le Fofoga Fetalai mo le avanoa. E avea foi lenei avanoa e faatalofa atu ai i le Palemia, faapea le Sui Palemia, aemaise foi Afioga ma Minisita o le Kapeneta. E faatalofa atu foi i Minisita Lagolago aemaise o sui usufono mamalu o le Palemene o Samoa. E faatalofa atu foi i Faauluuluga ma Faalapotopotoga a le tatou Malo, aemaise foi le faalogologo mai tapuai a Samoa i ona tulaga faalupe.

Ou te faatalofa atu i Lana Afioga Mamalu, O Le Ao o le Malo ma lau Masiofo, Afioga i Sui Usufono o le Fono a Sui Tofia ma a outou Masiofo. Le Usoga a Tumua ma Pule, Ituau ma Alataua, Aiga i le Tai ma le Vaa o Fonoti, Tama ma Aiga, Aiga foi ma a latou Tama.

21 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga i luga o le faitauga faalua**

E avea foi lenei avanoa e faatalofa atu ai i lou itumalo, lou itumalo o Salega i Sisifo mai Faiaai, Fogatuli, Samataitai ma Samataiuta, faapea Fagafau. O le paia lava lea i Alo o Lilomaiava, lau afioga Seve ma lau afioga Tilamafaga. Lau afioga Tuimaugapo ma le aiga sa Tuimaugapo, faapea le falefa o sa Soa ma Samai. Afifio Folau ma lo outou aiga sa Folau. Afio Tilafono ma le Faavaoga, afio Gisa, Sua faapea Fepuleai o le Aloalii. Lau fetalaiga Tuisalega i le tou vaatele o le tatou itumalo. Afio Afualo ma lau tofa o ou alo, lau fetalaiga Faimanu, o le fofoga o usoalii. Afio le sao Toomata ma le Tofaoalii, faapea le tapuaiga ma le mamalu ia Saleutogipoe na alii ma matua i ai Faleupolu tofa o tofiga. Faafetai mo la outou tapuaiga, ae tapuai mai, se i fai so tatou sao aua le Tala o le Tupe a lo tatou Malo 2017/2018 ua opea i le Maota.

E muamua ona ou faafetai i le Faigamalo i le Taitai ma le Sui Taitai, faapea Minisita alii ma tamaitai, ona o lenei Tala o le Tupe e \$934.2miliona, e le o se tupe laitiiti. A faatusatusa i tausaga ua mavae, o se faaopoopoga tele. O i e atagia ai le matua manaomia e le atunuu o le fesoasoani.

E le gata foi i lea, e atagia mai ai foi i Tala o le Tupe le naunautaiga o le Malo ina ia faaleleia lana auaunaga e auala mai i Matagaluega ma Faalapotopotoga a le Malo, e faalagolago i tupe, aua e faatino i tupe le manao. A vaavaai atu i ai i le Tala o le Tupe, ua siitia tupe maua mai auaunaga masani i le tausaga faaletupe lenei 2017/2018. E le gata foi i lea, o lo o i ai fesoasoani mai atunuu i fafo o lo o fesoasoani ai e le taitai lava a tatou tupe o lo o maua i totonu o lo tatou atunuu e faatupe ai o tatou manaoga. O le mea lea e avatu ai le faamalo ma le faafetai i le Malo, ona o le saili Malo, aua e le o nofononofo, aua ana faalagolago i tupe o lo o maua i totonu o le atunuu, ou te talitonu, e le taitai ona faamalieina le atunuu. Aua e tele manaoga o le atunuu. E pei lava ona matou pesi atu ma tuuina atu o matou manaoga leaga o lo o faatali o matou itumalo. E fia maua foi se fesoasoani e ala i auala galue. E pei lava ona muamua ona faaleo i lauga muamua o mea lava ia o lo o manaomia e o matou itumalo i nuu i tua. Aua foi e tua i faatoaga, a leaga auala i uta i faatoaga, e le mafai foi ona galulue tagata. Pei lava ona taua i lau lauga muamua, ua tele taavale a nai tamalii ma failauga ma le mamalu o matou itumalo, a o le faaletonu e le sao i uta i auala galue, e pei lava ona fai atu o le tele o matou nuu e aega, e manaomia le faaleleia. Afai ua taugata le faataina, faamolemole taatia ane i ou tafatafa lau Afioga Papalii, ua ou tapa fua i lou suafa e sulufai atu i ai nai talosaga ua uma ona tuuina atu. Ae se i silasila i nai nuu ia ua uma ona ou faaleoina atu e manaomia vave lava se fesoasoani, o Fogatuli ma Fagafau. O Fogatuli o lo o i ai ia falesa, o le Aso Fitu ma le Mamona o lo o i ai i tafatafa o auala galue, o le matua leaga lava le auala, ma avea foi ma faafitauli i tagata lolotu ma ua tau le o ai ini lotu. Ae talosaga atu ma le agaga vaivai faamolemole, a fai na auala i lenei tausaga faaletupe, ia ona faasoaso atu ai lea i nai isi o matou nuu ua e silafia ma lou faaaloalo lava.

21 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga i luga o le faitauga faalua**

Lua o le suavai. Aua o mea lava ia o lo o moomia i o matou nuu. E matou te le o manaomia ni taligalu, aua o lo o i ai taligalu ua uma ona saunia e le Atua, o lo o i ai papa mauualuluga, ai seiloga o se mala ona faatoa oo lea i ai o se Tsunami. Ae na o nai mea laiti na o lo o manaomia e lo matou itumalo o auala galue, o le vai. Ua uma ona ou fesootei le Ofisa Sili o Pulega o le Suavai, masalo po o le faalua i le faatolu, o le fetau lava i lea mea ia fai i ai, talosaga i ai ma le faamaualalo. E i ai nai aiga i gauta o Fagafau o gauta foi o Samataitai, e le i oo i ai le vai. Ae a pe a ave ae se isi vaega o le CSO e fesoasoani ai i nai aiga ia e oo lava i ai le vai se i taumamafa foi latou ua leva ona fia taumafa i le vai, ia ae le oo i ai e limavaivai e le mafai ona oo i ai le latou faasoa e faatino ai a latou auunaga.

O le EPC, o le a faalua atu pea Matagaluega o lo o i lalo o lau Afioga o le Minisita mo Galuega, Felauaiga ma Atinae Eeseese. O le EPC ou te matua faafetai i le auunaga a le EPC. O lo o lelei moli totonu o lo matou itumalo. Ae pau o lea, ia se i vaavaai ae nai isi moli na e tataua ona tu i mea o lo o pogisa, aemaise ai lava le mea o lo o feoai ai nai tamaiti aoga, e tumamao foi nai o latou aiga i uta, a o ni nai moli se tasi pe lua, ae se i fai mai se lisi, ona ou savalivali atu lea i lau Afioga e ta te talatalanoa.

E i ai le ogaeleele ua uma ona faailoa mai e isi Inisinia ua leva a o i lalo o le vaega foi lea i tai i le Vaaitau, e i ai le mea o le puna e maua ai le vai e i lalo o le elele. Na ona ou faaleo atu faapena i ina i Samataitai, o lea o le a ou oo atu ma lau talosaga e faataatia ai i ina, a maua se fesoasoani mai fafo, ia ona vili ai lea o se boreholes i se taimi oi luma, ae le o le tausaga lenei, o le tausaga lea po o lesi foi tausaga, ae ia uma le lima tausaga ua uma ona vili faamolemole.

Ona oo atu lea i le Matagaluega o Aoga, Taaloga ma Aganuu. Faafetai Sola ua e tulai mai i le foe. Ou te talitonu o oe e te le popoi i isi taimi ae fai lava le mea e mananao i ai le atunuu, aua o lena e te iloa lava le mea e tataua ona fai. Ou te talosaga atu ma lou faaaloalo...

FOFOGA FETALAI: Ona o lea ua e taua le suafa o le Minisita mo Aoga, Taaloga ma Aganuu.

Tulai mai lau Afioga i le Minisita mo Aoga, Taaloga ma Aganuu.

Afioga Hon Loau Sola Keneti Sio (Minisita mo Aoga, Taaloga ma Aganuu): Lau Afioga i le Fofoga Fetalai, faafetai lava i le sui usufono foi o le itumalo o Salega. Ia o le sui usufono foi o si au uo, uo lelei. Ia o le mea muamua lava e fia faasao, o lou igoa o Loau, o Sola ua leva ona leiloa. Lona lua, ou te le popoi pei ona taua, o le mea e fia faasao, o le 1 popoi, leai ou te matua le popoi lava. Ma le agaga faaaloalo.

FOFOGA FETALAI: O lena ua maua le faasaoga.

21 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga i luga o le faitauga faalua**

Afioga TOOMATA AKI TUIPEA: Ia e faamalie atu, o lea ua maua atu Loau leaga o oe e tele ou suafa maualuluga. Ia ou te talosaga atu i lau Afioga, o lea ua faafetai tele lava i le Matagaluega e tusa ai ma le lagolago e tusa ai ma le talosaga a le isi ou pitonuu lea ua maua le faleaoga na talosaga mai le JICA. Sa faapea sa lagolago e le Matagaluega o Aoga le talosaga, o lea o le a umusa i le Aso Toonai. Ae i ai le isi faleaoga i Samataitai ma Fagafau, ua matua leaga lava, ua matua leaga lava. A maua se avanoa e tatou te savalivali i ai i le Aso Toonai lea o le a sau e te silasila i ai, ou te manaomia foi sa outou tusi e lagolago ai le talosaga lea ua sauna ina ia maua ai. O le faleaoga sa fai muamua e le JICA i le 2004, a o le faalavelave ua matua leaga lava ua tutulu, ma le isi mea sa tatau ona sua atoa le malae, ona faigofie lea ona maua ai ma se malae taalo. O lau vaavaai i ai, afai ae maua se fesoasoani e auala atu i la outou Matagaluega lagolago e ave ia Saina po o Iapani foi, e maua ai se faleaoga o lenei itumalo, o nai o matou itumalo e mamao e saili malo. O aso ia e matou te savali mai lava i luga i Samata e savali i lalo i Salailua i le aoga, ia o nei aso ua fai pasi, ae aua ne i tuulafoaiina nai a matou itumalo ma nai o matou nuu, ne i te i faapea e mamao, ona faagalo lea pe faamulimuli foi i a outou lisi. O le tatalo lea ma lou faaaloalo lava i lau Afioga ina ia taatia i ou tafatafa le talosaga a lenei itumalo.

Ona oo mai lea i le Matagaluega o Faatoaga ma Faigafaiva. Ia faamalo i lau Afioga, ua vaai lava le tele o talo i le maketi, ua tele foi ia pusa talo ua ave i fafo, ae ou te talitonu e le o lava ia container ia e ave i fafo, e fua i le tele o talo o lo o faatau tiai i le maketi. Se i silasila ane. I le taimi nei e leai ni faaeleeleaga o sau mai Savaii ona o le tulaga lena, faapea e o atu i isi taimi ua i luga le tau, o isi taimi ua i lalo, o isi taimi ua aumai so o se talo, ia o isi taimi ia ua filifili na o isi talo. O le mea lea se i silasila ane po o le a le ituaiga talo lea o lo o manaomia mai e maketi i fafo, leai e soona toto leaga ua tele varieties ia ua taatele i totonu o le atunuu, ia ave tonu talo i fafo o lo o manaomia mai e maketi.

Ona oo mai lea o sau faamatalaga, ua ou vaai i le Tala o le Tupe o lo o i ai le vaegatupe mo le foia o le faafitauli lea o le manu ainiu. O se fuafuaga lelei tatau, aua o le tamaoiga lea o le tatou atunuu, e tatou te tua i ai. O le niu ma le koko. E ui lava i isi faaeleelega, ae puupuu o latou na ona uma lava ona fafai ae....ae o le koko ma le niu e aoga, e uma atu lea tupulaga, sosoo mai ma lea tupulaga ma lea tupulaga, o lau fautuaga, e le gata i le foia o le faafitauli, ae a amata ona toe fai ni faamiliga i itumalo, ia faatele le niu i itumalo, ina ia toe lalaga lea laau aoga o le atunuu, o le tasi lea tamaoiga o lo o tua i ai lo tatou atunuu, a o le faalavelave pei ua faagalogo atu lava i lenei vai taimi, ae faafetai i kamupani tumaoti lea o lo o latou maketiina o lea foi faaeleeleaga o lo o mafai ai e le mamalu o le atunuu ona maua a latou tupe.

O le isi itu ou te talitonu e i ai le taimi na matua tele ai le koko Solomona foi lea, ae le matua lelei lava i lau tofo i ai. Faamolemole lau Afioga se i fai se polokalame e matua aveese ai le koko lea ae ua lava le koko Samoa masani e totoina i le tatou lauelele.

21 IUNI 2017

**Tulafono Tau Faaofi o le Faatatauina o Tupe 2017/2018
- felafolafoga i luga o le faitauga faalua**

Ou te manatua le toeaina lea o Vaai sa taumafai atu ai le Ofisa pei uma lava o le vaega lea o i lalo o le Malo o Ausetalia le alii lea o Ken newton a o faigaluega, sa taumafai atu ai e sui le koko Samoa i koko ia mai Solomona, na matua tetee Vaai e le i totoina se koko Samoa i lana faatoaga. O le taimi lena a o ou i le Development Bank i Savaii alu ae le toeaina ma talatalanoa, o lana tala, e matua le talitonu i le koko lea. Ae silasila ane, leaga o lea ua tele le maketi i fafo e aumai e fai ai le sukalati, ou te talitonu o le koko lea o lo o moomia. E sili ona matua faatamaia loa le koko lea ae atiae na o le koko Samoa moni e lelei ma e lelei maketi e faafiafiaina ai foi le aufaifaatoaga i le tulaga o latou faatoaga.

I le tulaga o le fai, na matou o aumai matou tamai fai, ua faalogo loa i le tala ua taunuu mai fai Isaraelu matou o loa aumai. E i ai le talitonuga, a o lea ua maua, e tutusa lava le fai lea, na o le tau o le fai Isaraelu, ae tutusa lava ma tatou fai Samoa. O lea foi ua amata ona lavea i faamai. Se i silasila i ai, e le i taugofie foi le tausiga o le fai. Ne i te i ua olegia mai tatou i nei fai ae te i ua uma atu ae sosolo mai ai se isi faamai e sau ai ma le fai faamolemole. O le atinae manupapalagi lau Afioga, faafetai i le Matagaluega i letele o taumafaiga e toe atiae lea atinae aua lava le manuia lautele o le atunuu aemaise o faifaatoaga, o le manupapalagi. Sa masani ona alu alu i le isi taimi ua le lava tatou povi ona aumai lea o tatou povi mai Ausetalia.

I le taimi lenei, ou te talitonu e le taitai lava stock o loo i ai e faamalie ai le manao o faifaatoaga. E le taitai. Pe leai se avanoa e toe silasila ai i le faaulufaleina mai o manupapalagi mai Ausetalia e fetai ma le tau o Samoa. Ou te talitonu lava a maua mai ni manupapalagi o le a fesoasoani tele e faamalieina ai manaoga o le aufaifaatoaga. Ae ou te faafetai tele i le taumafaiga a le Matagaluega o Faatoaga, o lea ua tele le fesoasoani o lea foi ua aumai le fesoasoani i le fasiga o povi mai tua, o lea ua i ai ae ua i ai foi le fuafuaga mo le faatuina o le fale fasimanu. O le a taatia atu pea i le tou Matagaluega ae ina ia maua se manuia auiluma i lea foi atinae.

Ona ou see mai lea i le Matagaluega lea o Pisinisi, Alamanuia ma Leipa. Ua maua faamatalaga o lo o taumafai pea e faatosina mai le aufaipisinisi mai fafo lea faapea e tele latou tupe e invest i totonu o Samoa. Ou te talitonu o se fuafuaga lelei, ae i ai lava le popolega e omai ai tagata lelei, omai ai foi ma tagata faale lelei. O lona uiga o lau tala, lata mai nei lava se i ai le au Saina e le i leva ona i inei i Samoa ae o talepe masini a le Bank. Ou te le tuuaia la tagata Saina, ae ou te tuuaia le auala na aumai ai pe na suesue lelei e le Matagaluega lea vaega, sue background o nei tagata po o ni tagata solitulafono i fafo a o lea ua sao mai i le atunuu. E le gata foi i lea, ua sosolo faa-faamai le sosolo o pisinisi a tagata mai fafo. Ou te le faitio foi i ai i le omai fai pisinisi i inei, ae tatau i le Matagaluega ona tilotilo i le faiga faavae ma le Tulafono e puipui ai o tatou tagata.

21 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga i luga o le faitauga faalua**

Aua a tatou manatu i le amataga o le tatou atunuu, o le aufaipisinisi muamua o faipisinisi mai fafo lea na sosolo i totonu o Samoa, ona alu alu ai lea, taumafai tagata o le tatou atunuu e encourage tagata Samoa moni e fai a latou pisinisi. Ua alu alu ai ua i ai pisinisi a Samoa, ua faaeaina le toatele o le aufaipisinisi a Samoa. O le taimi lenei, ua amata ona oia faavae o isi pisinisi. E le faapea e faaletonu le... ae faalavelave e faigata lava ona tatou tauva ma le aufaipisinisi mai fafo, e eseese le latou culture, e eseese foi le tatou culture. O le mafuaaga lena e tatou te fiu lava e taumafai atu e alu lava i luga le Saina ae tatou tolototo lava i lalo. Se i tagai ane le Matagaluega lea se i silasila totoa ne i alu alu se taimi uma atu tatou tulai mai ni tagata ese ia e pule i le Malo ona faapena lea ona... aua o latou e le talitonu i le Atua ona aveese ai lea o faavae o lo o tatou mimita ai i lenei vaitaimi.

Malo faafetai i lenei Tala o le Tupe, tele lenei Tala o le Tupe. A vaavaai atu foi i auala o lo o maua mai, taumafai e maua mai ni nonogatupe mama e tau faapaleni ai ma faafetai ai manaoga o lo o manaomia o le tatou atunuu ae faafetai tele o lo o faaauau lava fesoasoani ma faalapotopotoga mai fafo ona o le tomai i a outou Afioga aemaise le Afioga i le Minisita o Tupe ua mafai ai ona oleole malie nai a tatou paaga i fafo ua mafai ai ona tatala mai le faitotoa ma maua le avanoa ua maua ai nei fesoasoani. Ia talosia ia tafimala le faigamalaga a le tatou atunuu, aua o lo o i ai le unforeseen \$10milionia ae tasi lava le tupu mai a le Tsunami pe sau foi ni afa malolosi, o le matua pinati lava o le \$15milionia lea.

Na pau lava lau talosaga i lau Afioga, vaai ni tupe foi nei e le o faaaogaina, ua le faaaogaina. O le mea lea ou te iloa ua e lototele ai ua leai se Tala Faatatau Faaopopo o le Tupe, leaga o lea ua e mautinoa e tele vaegatupe o le Tala o le Tupe 2016/2017 e le o uma ona faaaoga. O lo o tele foi le tupe o lo o totoe o le unforeseen, faamolemole tuu ane e fai ai le tatou uafu i Salelologa. Aua e te fefe, fai le mea e tataua ona fai ia i ai se vaegatupe o letatou uafu i Salelologa. O le uafu lea o le a tatala ai le faitotoa, e manuia ai tagata Savaii ma foia ai le faafitauli o lo o tupu i i inei, o le omai o tagata Savaii i inei ma tau sue ni mea e nonofo ai. E le o toe mamao ae maua tatou pei o le mea lea e tupu i tagata i fafo ua maua tagata foi nei e nonofo i auala. Ia ua alualu lava i luma ae faaitiitia foi le aofai o fanua, aua e laitiiti foi fanua o le tatou Malo. E alofa ai la i tagata o le tatou motu ne i omai nonofo i fale tapoleni i talaane o le auala. Ia manuia le Fono. Ma lou faaaloalo lava.

FOFOGA FETALAI: Malo faafetai. E manatu ona o lea ua olioli mai se tasi o sui usufono e fia saunao ae ona o lea ua tatou toai taunuu i le taimi o le tatou malologa masani. E faasilasila atu o le a faataatiaese Taulumaga a le tatou Maota Fono mo lana malologa masani.

Na faataatiaese Taulumaga a le Fono Aoao Faitulafono mo lana malologa masani i le itula e 4:50 i le afiafi ma toe faaauau i le 5:42 i le afiafi.

21 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga i luga o le faitauga faalua**

Na toe faaauau Felafolafoaiga i luga o le faitauga faalua o le Tulafono Tau Faaofi o le Faatatauina o Tupe 2017/2018.

FOFOGA FETALAI: Ou te faasilasila atu ua toe amatalia galuega a le Fono Aoaofaitulafono, e manatu ua maua le faasiligamalosia i le paia o le Palemene ma le Kapeneta e faaauau ai la tatou galuega. E faia la tatou malologa ua maea ona saunoa le afioga i le sui usufono mo Salega Sisifo. Ma ou te tapa se isi sui usufono.

Tulai mai le sui usufono mo Siumu.

Afioga FAALOGO IOSEFA SOPI (Siumu): Faafetai ua maua se faasiligamalosia i lau Afioga faapea le Palemia ma le Kapeneta ma le mamalu o le Palemene. Ae faatalofa atu i leni itula i le afio a le Palemia ma le aiga Kapeneta faatalofa atu foi i Minisita Lagolago, ma sui usufono mamalu uma o le Palemene o Samoa o lo o ua potopoto i leni aso. E faatalofa atu foi i tapuaiga a Samoa o lo o tapuai mai, mai ona ao seia oo i ona iu. E faatalofa atu foi i Taitai o Ekalesia Kerisiano uma i Samoa o lo o faafofoga mai.

Ae muliai se faatalofa i si ou itumalo o lo o faafofoga mai, sau mai Siufaga seia paia Faletete, o le a le oo se faamatalaga i outou paia ma outou sa ma faiga aua o paia lava mai le vavau. Ae o le a taumafai e fai se sao o leni usufono i le Tala o le Tupe ua i lumamea nei.

E muamua ona faafetai i lau Afioga i le Minisita o Tupe, mo le tapenaina o leni Tala o le Tupe, faafetai foi i le Matagaluega i le galuega fita sa faafeagai aua le tuufaatasiga o tupe. E silafia e tatou uma e faigata tele le suega o le tupe ae faigofie le faaalaina. O le a oo mai se faamatalaga i le Minisita mo Galuega, Felauaiga ma Atinae Eeseese faafetai i lau Afioga ua i ai galuega ua faatino i leni itumalo. Faafetai ua toe ola le tele o moli auala sa le mafai ona ola i la vaitau. E momoli foi le faafetai i le tofa na ae ua toe faaulu mai ai taavale ia mai Amerika. Faafetai ua toe maua le faamama avega i le mamalu o le atunuu, ma le naunautaiga o lo o aumai i lena faatagaga aua le vaaia o faatoaga a le mamalu o le atunuu. E auala atu ai la se talosaga, se i tagai i aualagalua. Ou te iloa e le na o Siumu ia aualagalua ua matua le toe mafai ona toe feoai ai ni taavale i leni vaitau. E fa pitonuu o si ou itumalo e fa foi nai aualagalua e fia faaleleia. E manaia lava le taunuu mai o taavale Amerika, e alu atu o lo o lelei le auala e agai ai uta i le faatoaga. O le isi au talosaga o le alavai lea sa ou taua foi i le isi au lauga muamua. Le alavai lea e latalata mai i le faleaoga o si ou itumalo. Taatia atu pea i lau Afioga le alavai pe fai sina auala laupapa laitiiti pe fai sina alasima, sina ford, o le mea lava e foia ai le tele o faafitauli ma le tele o mea e faaleaga pe a oo i le taimi e tafe mai ai le vai lea.

Oo mai lea i le Afioga i le Minisita mo le Soifua Maloloina. Faafetai o lea ua avatu ia gasegase agai i Initia, se mea sa le mafai ona oo i ai i ia tausaga ua tuana'i atu. Atonu ua fesoasoani lea i le isi tele o mai o lo o avatu i Niu Sila.

21 IUNI 2017

**Tulafono Tau Faaofi o le Faatatauina o Tupe 2017/2018
- felafolafoga i luga o le faitauga faalua**

Ae auala atu ai ma se talosaga i lau Afioga, pe le ua onomea ma alagatau ona fai loa se tatou Amapasa i Initia, aua a avatu mai a tatou e avatu i Initia, e leai ma se isi e i ai se aiga, e eseese ma mai ia e ave i Niusila, e tele aiga e oo ae i ai ma talanoa ai, ma fesoasoani i ai. E talosaga ai i lau Afioga e auala atu i lau afioga, pe le i alagatau ona faatu se tatou Amapasa i Initia pe afai lea ae umi le faiga paaga lea ua amata i lenei vaitau. O le isi talosaga i lau afioga, sei tagai ane i fale ia e gaosia fagumalosi i totonu o le tatou atunuu. E i ai lava lou masalosaloga, o le tele lea o isi faamai ua i ai, e auala mai i e o lo o tagofia ia ava malosi, se i tagai ane ai lau afioga i lena itu. O le isi tulaga, faafetai foi i lau afioga o le a toe tuufaatasia le Matagaluega sa lua vaega sa i ai, a o lea o le a mafai ona toe faatasi, atonu o le a tele foi se seleni o le faasaoina mai lea vaega.

Ona oo mai lea i le Afioga i le Minisita mo Faatoaga ma Faigafaiva. Faafetai o lea ua maua o le a faatu le isi pole e fagota i gataifale o Siumu. E aoga tele aua e tele ia tautai mai le matou itumalo o latou foi o fai vaa fagota. Ae toe talosaga atu i lau afioga i le talosaga foi na avatu muamua i se ramp lea e taunuu i ai vaa, se mea toso vaa ia mafai ai ona toso vaa i luga pe a oo i le taimi ua faaletonu le tau ma louloua.

O le isi tulaga e fia fai i ai se manatu o le manuainiu lea ua matua tele naunau i lenei vaitaimi ua tele ina faaleaga ai faatoaga, ua le gata i le niu ae ua vaaia foi ma isi laau ua amata ona oo i ai ia le faasologa a lea manu faalafua. Lau Afioga se i tagai ane, ou te manatua i aso ia e pei sa i ai ni fuafuaga na i ai mea na sailiili pei ni biological control foi ia, lea na tau faaitiitia mai ai i le la vaitau ia le manuainiu.

Ona ou oo mai lea i le afioga i le Minisita mo Aoga Taaloga ma Aganuu, ia faamalo atu, ua ou iloa toeitiiti faia la ta malae taalo. Ae e toe talosaga atu e manaomia se fesoasoani i le Kolisi a Palalaua o lo o i totonu o lou itumalo. E le gata i le itu tau i le faleaoga ae faapea foi i nai totoga, computers ma nai mea na e fesoasoani ai i le matou aoga.

Oo mai lea i le Minisita mo Faamasinoga ma Pulega Tau Faamasinoga, e auala atu ai se talosaga. O lenei vaitau ua alu i luma le solitulafono lea o le Faiaiga faamalosi i alo ma fanau. Se i tagai ane lava i le Tulafono pe le i tatau ona toe iloilo le Tulafono toe sii i luga ni faasalaga ma ni tulaga faapena. O le vaiaso lenei o lo o faalogoina pea i luga i le ea se faalavelave na tupu, aafia ai ni alo teine laiti se toalua. E lagona le faanoanoa i lea tulaga, ae taatia atu i lau Afioga i le Minisita sei tagai i le Tulafono ma le iloiloga. Ou te iloa o le isi tulaga e tatau ona faamalosi, e tatau ona fai ni awareness i tua i nuu ma afioaga. Alu i ai se tatou faamalosi ina ia silasila i tagata faapea ona fai lea i ai o se fuafuaga.

Lau Afioga i le Minisita mo Tupe Maua, faafetai o lea e vaai atu lava o lo o tuputupu pea i luga ia le tupe maua a si o tatou atunuu. Faafetai o lena foi ua saunoa mai e lua tausaga e le toe siia le VAGST, faafetai pe afai e le toe siia atu i luga le VAGST.

21 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga i luga o le faitauga faalua**

E faauma atu ai se lauga, e momoli atu ai le agaga faafetai tele i lau Afioga i le Palemia faapea le aiga Minisita i la outou galuega o lo o faatinoina i leni vaiataua le tautuaina o si o tatou atunuu. Faafetai atu foi ia outou afioga i Minisita Lagolago i la outou lagolago ma la outou tuualalo o lo o faia i afioga i alii ma tamaitai Minisita. Faafetai foi i Matagaluega a le Malo i lo latou sao o lo o fai i le tautuaina o si o tatou atunuu. Faafetai i lau Afioga i le Fofoga Fetalai mo le avanoa.

FOFOGA FETALAI: Malo faafetai mo le saunoaga matagofie a le sui usufono mamalu mai le itumalo o Siumu. Malo saunoa faafetai. Ma ua avanoa foi le tatou laulau mo se sui usufono e tulai mai e saunoa.

Tulai mai le sui usufono mo Falealili Sisifo. Alo ia ia manuia le saunoaga a lau Afioga i le sui usufono mamalu.

Tofa AUMUA ISAIA LAMEKO (Falealili Sisifo): Lau Afioga i le Fofoga Fetalai, faafetai mo lou avanoa i leni itula o le aso. O paia ma mamalu o Samoa o le a le toe oo i ai se faamatalaga. O paia mai le vavau e oo i le faavavau. E faafeiloai atu i le Afioga i le Palemia le mamalu o le Kapeneta faapea Afioga i Sui Minisita.

E faafeiloai foi i le matou itu nei Afioga i sui usufono. Ua maua foi leni avanoa e faafeiloai atu ai i le Afioga i Lana Afioga Mamalu, O Le Ao o le Malo ma le Masiofo faapea le vaa seetolu o Afioga i Sui Usufono o le Fono a Sui Tofia ma a latou Masiofo. E faafeiloai atu foi i le Afioga i le Faamasino Sili aemaise le Matagaluega o le Faamasinoga. E faafeiloai atu foi isi o matou itumalo o Falealili Sisifo. E ui lava ua vaevae o Falealili Sisifo ma Falealili Sasae ae tasi lava lo tatou aluga tatou te aluluga ai. Le paia o Alalagafa la lua nofo a tulafale ma le Tauagaeseese ia te oe Falealili, tapuai maia se i taumafai so tatou manatu aua le Tala Autu o le Tupe 2017/2018.

Lau Afioga i le Fofoga Fetalai e muamua ona faamauina le agaga o le faafetai. E faafetai i le Afioga i le Palemia faapea le itu o le Malo e tusa o leni Tala o le Tupe. Ou te faaigoaina le Tala o le Tupe leni, o le Tala o le Tupe Faaositaulaga. E mafua lea vaega ona o le tele o le vaegatupe lea e taumafai le vaega o le tatou Malo e ao mai e 852.3miliona. E momoli ai lau faafetai i le Minisita o Tupe Maua faapea le Matagaluega o Tiute ma Tupe Maua i le loto toa i le aoina o leni tupe ina ia mafai ona faatino galuega e fuafua i ai lo tatou Malo. A fuafua i tupe faaalu e \$934.2miliona ona i ai lea o le tupe pau e \$81.9miliona, a tuu iai le faaunegatupe e mama le tului ma le faaunegatupe a le Faletupe a le Lalolagi, ona maua ai lea o le faasiliga e \$20miliona. E momoli ai le faafetai tele, o le tele o nei tupe o le a mafai ona faatinoina ai a tatou atinae. O le vaega e aupito i sili ona ou fiafia i ai i le Tala o le Tupe leni, o lo o atagia ai vaega ia e pei ona faailoa mai i le lauga a le Minisita o Tupe.

21 IUNI 2017

**Tulafono Tau Faaofi o le Faatatauina o Tupe 2017/2018
- felafolafoga i luga o le faitauga faalua**

O le vaega muamua o le vaega lea ua siitia ai le tatou threshold lea o le zero tax mai le \$12,000 i le \$15,000 i le tausaga. O lona uiga ua le totogia se lafoga sa masani ona totogi e i latou e \$12,001 agai i le \$14,999 i le faiga tuai sa i ai. A o le faiga fou la lea pe a pasia le Tala o le Tupe e amata faamamaluina ia Iulai, e le toe totogia se lafoga a i latou e \$15,000 ma lalo mai o latou totogi i le tausaga.

O tatou galuega atinae, o le a amata sau faamatalaga i le Matagaluega a le Minisita mo Galuega, Felauaiga ma Galuega Eseeese vaega a le LTA, na o sina talosaga vaivai lava e taatia atu i ou tafatafa. O lo o ou faatagisia pea le auala agai i le faleaoga o le matou nuu i Saleilua. E pei lava ona ou talosaga atu i le tausaga ua tuanai e oo mai lava i le asua matua faaleagaina le auala. Na ona pau lava lea o le vaega o le auala o le vaega o le aualagalua o le nuu lenei o Saleilua. E tatalo atu ai ma le agaga faaloalo tele, a maua lava se taimi e mafai ai ona sua le alavai ma tanu ae se i faata mulimuli i se taimi pe a tusa ai ma lou finagalo.

O le vaega o le vai, e pei lava ona silafia o le vai o lo o inu ai le matou itumalo i Falealili atoa, e sau mai le vai lea o le nuu lenei o Sapunaoa. O le nuu lenei o Sapunaoa mo le silafia, e tolu ona pitonuu, o Sapunaoa, o Faleulu ma Piu. Mo le silafia lena e le mamalu o tatou aemaise o le vai, o Piu e le o se nuu mavae, o le pitonuu o le nuu o Sapunaoa.

O le vai la lea mo le silafia, e fai lava sina malosi tele o le vailaau. Pe mafai ona tagai ane i ai faamolemole le pule o le Suavai se i tagai ane i ai ua fai si malosi o le vailaau o lo o i totonu o le suavai, ua oo lava i le taimi e inu ai le suati se i tulou, e faalogoina lava le manogi o le vailaau.

Ona ou see ane lea i le vaega faaeletise, e pei ona avatu sau fautuaga i le tausaga ua tea nei, e talosagaina lava le faaoo atu o eletise i matou auala galua faamolemole ina ia mafai ai ona siitia i latou o lo o nonofo latalata i le sami ae nonofo i uta aua foi le puipuiga mo faalavelave tutupu faafuasei.

Ona faasolo mai lea i le Minisita mo Faatoaga. E momoli atu le faafetai tele i le Afioga i le Minisita e tusa ai foi ma ana polokalame faalauiloa ma le sailiga o le maketi e auina atu ai le fua o le faaeleeleaga o le talo o le ulu, o le taamu faapea foi ma le esi. O isi fua o faaeleeleaga ia e tatau ona tagatagai i ai, o le tulaga lea o le manioka ma le ufi. O le polokalame o lo o faataatia nei, e talosagaina lava le tatou poloketi lea o le SACEP i le vaega lea e i ai, i lau tilotilo e fai lava sina tuai laitiiti o le process. O le process a faapea e faaauuala atu i le tou Matagaluega, e atoa le masina e le i sau lava le tupe mai le Ofisa o le Tupe. O le process lena e mafua ai le tuai ae o lo o lelei lava ona faatino e le aufaigaluega le tulaga o le poloketi lea o le SACEP.

O le tulaga i faigafaiiva, e talosagaina lava faamolemole, i le nuu lenei o Poutasi, o lena e i ai le sima e mafai ona toso ai vaa, ae leai se uafu foi lea e mafai ona taula ai vaa fagota i nisi o le matou afioaga aemaise o nisi o nuu taulalata mai e faaogaina e faafaigofie ai le feoiga.

21 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga i luga o le faitauga faalua**

O le tulaga i le faamai talo, o lena ua silafia, ua leva ona tatou i ai ma le faamai o le talo, e mafua ona o lea sa tau amata ona toto le talo, aemaise le talo Salani ma le talo Fusi. A o latou la sa tele ai le tiapula, lea la sa o atu tagata e faatau mai aumai faatasi ai ma le talo, toto faatasi atu ai ma le talo u, lea e mafua ai ona maua le talo u i le taimi lenei. Ae a lelei lava le filifiliga a oe le faifaatoaga, saili lelei le talo pe u, ae aua le totoina. O le u o le faamai lea o le talo.

O le Matagaluega o Pisinisi, Alamanuia ma Leipa, e momoli atu lau faafetai tele i le Afioga i le Minisita e tusa ai ma le sainia e Samoa o se tasi o pepa e faailoa ai le tulaga o galuega a le Ofisa o Leipa mo le isi Meleniuma. E pau lava lea o le vaega e tatalo atu ai lou sui usufono, se i silasila ane i ai le Matagaluega ma le Minisita, o le Tulafono lea o Galuega a Leipa ma Galuega 2013.

I totonu o le Tulafono lea o lo o i ai se vaega e mafai ai ona faalaiseneina le faiga o le pisinisi, employment agency. O le faiga lea e mafai ai ona issue e le Matagaluega laisene e 10 ia i latou e i ai le tomai faapitoa e mafai ona latou faagaioia le employment agency. O i ina foi la e tatou te maua ai galuega mo tatou tagata. Aua a create le employment agency e tasi, e le iloa pe mafai ona faafaigaluega ai ni tagata se toalima. A toasefulu laisene ua maua na avanoa e limasefulu.

O le tulaga pei ona sainia i le avea ai o Samoa ma sui o le PACER PLUS, e momoli ai lau faafetai tele i le Malo i le talia o lenei tulaga ua avea ai Samoa ma se tasi o atunuu ua sainia le PACER PLUS. O le itu aupito sili ona lelei i lau lea tilotilo, o le mafai lea ona faagasolo le tatou polokalame lea o le seasonal worker i Ausetalia ma Niu Sila. O lona uiga, e le mafai ona alu alu lava Ausetalia ma Niu Sila toe faamatuu ese polokalame ia e lua mo tatou.

Ona oo atu lea o sau faamatalaga i le Matagaluega mo Fesootaiga, Faamatalaga ma Fesootaiga Vavave Faaneionapo, faafetai i le Malo mo le tatou Tui Cable. A o le tatalo a lenei itumalo i lau Afioga i le Minisita ae le gata i lea o le Pule Faatonu po o le Regulator, se i silasila ane lava i le tatou auaunaga lea o le Digicel i le talafatai o Falealili Sisifo e amata atu i Tafatafa e tau i Sapunaoa, e le ola ai le Digicel. O lona uiga, a e manao e fai sau telefoni ona e alu lea i gauta o le aualatele e te tutu ai pe a faapea o lau telefoni o se Digicel. A o le telefoni lea e i ai nei o le BlueSky, e ola i so o se mea. O le mea lea e tatalo atu ai i lau Afioga i le Minisita e silasila ane i ai faamolemole.

O le Matagaluega o Aoga, Taaloga ma Aganuu, e talosagaina lava faamolemole, o le malae lea mo le tatou kolisi i Falealili, e pei ona tuuina atu le matou talosaga, o lea ua i ai le maliega o i latou e ona le fanua e talosagaina le malae ina ia suaina le fanua, fai ma se pa ina ia puipuia ai ana meatotino.

21 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga i luga o le faitauga faalua**

Ona oo mai lea o sau faamatalaga i le Matagaluega o le Punaoa Faalenatura ma le Siosiomaga, e faatatau i taligalu, e talosagaina pea taligalu mo le matou nuu i Iliili, ae le gata i lea o Saleilua, Poutasi, Vaovai, Matautu, Tafatafa, Satalo ma Sapunaoa, o le afioaga o Malaemalu o lo o i ai se tasi o poloketi i Amerika, o lea la ua amata nei toeitiiti maea le galuega o taligalu, ae talosagaina ma le agaga faaaloalo e toe tagatagai i tatou auala lea sa faaigoa o auala o le Tsunami i nuu nei e tolu, o Tafatafa, Poutasi ma Sapunaoa. O lea ua amatamea nuu i le suaina o auala ia ina ia mafai ona feoai ai tagata.

Ona oo mai ai lea o sau faamatalaga i le Matagaluega o le Soifua Maloloina ma le faaipopoga sa fai i le va o le Matagaluega o le Soifua Maloloina ma le faalapotopotoga health services. O le fesili sa tulai mai i lou mafaufau, pe aisea ua toe tuufaatasia ai, ae sa mavaevae lava vaega sa i ai i le Regulatory ma le operation ae a tilotilo foi i le taimi lenei i le taumafai e faasao tupe a le Matagaluega, ia taumafai ia tuufaatasi, auunaga i le taimi lenei, o lona uiga, o le a tasi le auunaga. Ia, o lau talosaga lau Afioaga i le Minisita, silasila ane lava i le falemai lea o Poutasi, ia, tasi lea o falemai pei ona taua e nisi o sui usufono e tatau ona i ai se fomai. O lo o i ai le fomai i le taimi nei, ae na o le Aso Faraile e alu atu ai le fomai. E talosaga atu pe le mafai ona lua ni nai aso, o le Aso Lua ma le Aso Faraile ina ia faapena ona faaitiitia le aofai o tagata e asiasi mai i le tatou falemai lea o lo o i Motootua.

Ona oo atu lea o sau faamatalaga i le Matagaluega o Leoleo, e momoli atu lau faafetai tele e tusa ai ma le galuega tele o lo o fai i le Ofisa o Leoleo i Poutasi e tusa ai ma le tautuaina o le mamalu o le atunuu ae le gata i lea o le tautuaina o le toatele o latou e faasuaava ma onana i luga o le auala ma soli le tulafono. Ia, faafetai atu foi e tusa ma lea tulaga.

O le Matagaluega o Tina ma Tamaitai, Atinae o Nuu, Afioaga ma Agafesootai, e talosagaina lau Afioaga i le Tamaitai Minisita, se i silasila ane o lea ua pasia le tatou Tulafono Toe Teuteu o le Pulega a Alii ma Faipule 2017, pe le faia ni aoaoga a nuu e faatatau i le suiga lea o le tatou Tulafono, e faapena ona amanaia ai le natural justice, o le avanoa e tuu i le tagata e ona moliaga i totonu o le nuu e faaitiitia ai foi solitulafono i totonu o nuu ma afioaga. E avea ai foi lenei avanoa e momoli atu ai lau faafetai tele o le matou itumalo i Faalapotopotoga a le Malo, ae le gata i lea o Matagaluega a le Malo, ua le oo i ai sau faamatalaga i le aso lenei i la outou tautua i le atunuu. Ae le gata i lea o le auunaga o tatou tagata lautele.

Lau Afioaga i le FoFoga Fetalai, faapau mai i i sa matou faamatalaga, manuia faasausauga o lenei po. Soifua.

FOFOGA FETALAI: Malo faafetai, faafetai saunoa i le sui usufono mamalu. Ia, le sui usufono mo Falealili Sisifo pei ona maea le saunoaga. Faafetai. Ou te tapa lau Afioaga i le sui usufono mo Gagaemauga Nu.3, lau Afioaga i le Sui Fofoga Fetalai.

21 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga i luga o le faitauga faalua**

Tofa NAFOITOA TALAIMANU KETI (Gagaemauga Nu.3): O upu lava a le atunuu, e mau e faalele, e mau e maitau. Lau Afioga i le Fofoga Fetalai ua ese foi le tagatagai ma le vaai i le Malo i lenei taeao, e afua mai i le taeao seia oo mai i lenei vaega o le Fonotaga, maitau totoa uiga ma taga. E tau mai ai i lou nei usufono le taua o le Fonotaga lenei, o le talanoaina o le Tala Faatatau Autu o Tupe 2017/2018. O le mea lea e fia momoli atu ai le faafetai tele i lau Afioga i le Taitai o le Maota, le Aiga Kapeneta e oo lava i Minisita Lagolago, e maitau so o se taimi lava e taua ai le suafa, e lua lima e aumai i luma se i tusi uma mea ia. O foliga vaaia ia o le tapena, o le lava taoso o lo outou sa aua le faamoemoe tele o le Malo i lana Tala o le Tupe. A o lea e sauva foi i le vaai i le body language a Minisita Lagolago la e atagia ai le femusuai, femusuai, e taua le tuumumusu i mea o lo o fia maua ma fia maua ma fia malamalama ai sui usufono mamalu o le Palemene. O taga ia o lenei aso, fai ma tatou toe leaga ua iva le Fonotaga.

Lau Afioga i le Fofoga Fetalai, o lele ua maitau atu ua tele ina malaga tia o le ulupaga, ua ala i sulu le seu na fagafaga i le tele o finagalo faailoa o le mamalu o sui usufono o le Palemene. O le ala lea o le sii o le vaa o Matautua Gagaemauga Nu.3, lou itumalo pele se i taumafai so matou leo i le taua o le faamoemoe, afai e taua i le Malo, e taua foi i sui usufono uma le talanoaina a o se sao foi e togi i tulaga o le Tala Faatatau Autu o le Tupe 2017/2018.

Ae le alu loa le matou vaa lau Afioga i le Fofoga Fetalai, e talii ae popoe, o le aso i ou sa faautuutugata ma sa faautuutuaaoo ou te taofi, o paia sautuao lava ia o Samoa, lea e afua mai i Matautunaaai seia utu le faga i Taua. A lele ua atoa le faga i Laua, ua atoa Lanu ua atoa lio o le Maota i Tiafau tauave nei e lipoi ma vevete ai upu a Samoa ma lona Malo tutoatasi. O le ala lea i le tapatapa i le Nofoa, malo faafetai malo faatoatoa i lau Afioga i le Fofoga Fetalai. Taialii i lenei aso, ia ulimasao le faamoemoe. E faatalofa ma faafeiloai i lau Afioga i le Taitai o le Maota, Sui Palemia ma le Aiga Kapeneta e faapea foi Minisita Lagolago, malo le onosai, malo le galue mo le faamoemoe lava o tatou tagatanuu ina ia soifua manuia tagata uma.

E faafeiloai foi i le paia maualuga o afioga i Taitai o Komiti Faa-Palemene, o e na fitaituga aua lenei faamoemoe aemaise le Komiti Faa-Palemene o Tupe, malo le vaai malo le suesue. O lea ua matua manino lava i le vaai a le Gagaemauga Nu.3 tulaga uma e tataua ona faataoto ai le tala o le Tupe e pei ona faataoto nei i le Maota.

Lau Afioga i le Fofoga Fetalai e ala atu i le Nofoa, e fia faamauiina le agaga faafetai i le ee mai o tupu ma tamalii Ofisa Sili o Matagaluega a le Malo, aemaise o le Ofisa o Tupe lau Tofa i le Tulafale lau fetalaiiga Lavea. Malo faatoatoa malo galulue, o lea na sauva i le va o nisi o usufono, sa galulue i le ao ma le po e tapena le faamoemoe o le aso. E momoli atu le faamalo ma le faatalofa, malo le galulue, malo le silasila i lo outou valaauina, e lima taumatau ia te outou le Palemia ma le Kapeneta ma le malo. Faafetai tele mo lenei aso.

21 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga i luga o le faitauga faalua**

Ae ou te faatalofa foi i le tapuaiga mamalu a le atunuu e afua mai i le Ao Mamalu o le malo ma le masiofo, Sui o le Fono a Sui Tofia ma masiofo, le Afioga i le Faamasino Sili, alii ma tamaitai o le Faamasinoga, matou te faatalofa atu, aua o le upu moni e pipii tia ae mamao ala. E i ai le moemoenoa ma le laufa le aina. Ao le aso, ua logologo i le tala e lelei, i lo outou soifua le lagi e mama.

E le galo lou itumalo lau Afioga i le Fofoga Fetalai, na afua ai ona lagona le leo, Aiga Sa Peseta ma lo Latou Maopu, Nofo Usoalii le Faleiva, ma le Igoa Mamalu o Matautu o Oe o le Muautasi, ao Oe foi o le Faamaluga o Malo. Matou te afe atu e faatalofa atu, le Afua mai i Fanuatanu ma Aso Faatau, Siliga ma Fale Faamaoi, Malae ma Tulaga seia oo i Malo Amata, ae Matua le Tuu i Fale Fagamalo i lou Malae. Malo tapuai. Ua manuia faiva, e pei o upu a le atunuu e le sili le tai i le tapuai. Faafetai tatalo, tapuai maia sei taumafai so tatou leo, ae a le tatou nonofo ai ma le lologa pule ma le faitoaga, tama e fai mai e lave i manino e lave i le ava, e i ai le afuaga o lenei Tala o le Tupe.

Lau Afioga i le Minisita o Tupe, faafetai mo le Tala o le Tupe. Lea na e saunoa ma faamaioio tulaga uma, ma e taua ai le tapenaga o taiala o le Tala o le Tupe, o lona sini autu, ia agavaa tutusa ma le talafeagai. Malo le silasila mamao. O lea e taoto ai i le sini autu lea se faamoemoe o le Tala o le Tupe, ia togi maa uma le mamalu o le atunuu, e tataua ona togi sona sao. Matamata ma le totoia i le faamaioioina o taiala o le Tala o le Tupe. Lau Afioga i le Minisita faafetai.

Sa tau i ai lava ni manatu i le Tala o le Tupe, a ua tepaina ia lenei itumalo, i le folasaga i le laupepa e 3. O lea e taua ai, o le vaaiga taulai i le lumanai, ia o lea ua maea ona silasila i ai le IMF. O iina lea e tau mai ai i lou sui a usufono, leai e le o na o iinei, e le na o lau Afioga, ma le paia o le Matagaluega o lea sa silasila i tulaga uma i le aotelega o le Tala o le Tupe ma le tamaoaiga o le atunuu. O lea e faamaonia mai ai, sa faatino le faamoemoe lea e le IMF i le masina o Fepuari i le tausaga nei. I le taotoga la o le Tala o le Tupe, ou te manatu, o lea e aliali ai i luga le good management. O le lelei ona manage o tupe. E le o le tele o tupe e le o le laiti o Tupe Maua, e leai, o le mea lea e fia momoli ai le faamalo ma le faafetai i lau Afioga i le Minisita. O le lelei ona foefoe aemaise o la e faafofoga mai Faauluuluga o Matagaluega, e pei ona sau i nisi o lauga, o le toe faafoi seleni pe a maea Tala o le Tupe i lea tausaga ma lea tausaga. O le tausaga na tea nei e oo mai i le tausaga lenei, lea e momoli atu ai le faamalo ma le faafetai. O le lelei foefoe e i ai lava faaletonu, pei ona masani ai le atunuu so o se faiva e sii e le asa ma se maumau. Na ona matou faafetai i lau Afioga, ua matou auai ma talia aloaia le tulaga ua faataoto mai ai le Tala o le Tupe 2017/2018.

Pau lava o lea, pau lava lea lau Afioga i le Minisita, sei toe silasila ane lava i le faamoemoe o Salafai. Lea ua maea ona saunoa i ai nisi o sui mamalu, o le atinaeina o le uafu, o le taulaga i Salelologa. O le mea lea e ao ona silasila i ail au Afioga. Ioe lenei usugafono, e i ai atinae tetele lea e lomaloma mai lona faatinoga e i ai le uafu i Vaiusu, peitai e le gugu Sakaria i sui mamalu mai Salafai.

21 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga i luga o le faitauga faalua**

A lelei tapena Salafai, o lena foi e silasila i ai lau Afioga ma le mamalu o le malo, i se suiga o le feoaiga o tagatanuu. Malaga mai Salafai mo Tumua nei o le a faaitiitia, e tele mea e aoga lelei i ai. Faaitiitia soligatulafono, malaga mai o nai o tatou tagata mai Salafai, nonofo iinei, ua motu ma le taula.

O le agaga o le sui usufono, lau Afioga i le Minisita o Tupe, sei silasila i tulaga o lo o faataoto ai tulaga o fuafuaga alualu mamao. I lou lava talitonuga, e le ua oo i le taimi ua tataua ona amata loa ona tau atiae Salafai? Ae atiae i tulaga lelei o le vaai i tupe, le agaga lena o lenei usugafono, sei toe silasila ane lava i ai. Toe lalaga ane i luga, o lea lava o le a tau mou atu. O le a ou le oo tele i tua, ao lo matou naunautaiga o lenei itumalo, ia alofagia e lau Afioga i le Minisita le motu tele i Salafai. O le mea e lelei i Tumua nei, e fia maua foi e o tatou tagatanuu i Salafai.

I le aotelega o se matou lauga lau Afioga i le Fofoga Fetalai e tau lava ina o matou faapai atu ma faapea atu lau Afioga i le Minisita o Tupe, ave ave ai, ave ave ai lea ua leai se Tala Faaopoopo o le Tupe. O lona uiga o lea ua lelei tapena, e le gata i lau Matagaluega, ao Matagaluega uma o le malo lea e faafofoga mai. Ua uma ona ou faafetai atu, leaga e le faigofie le faiva, e faigata. E fai foi o le fuafua faatatau o le alu o le tupe, ia ao le service e tataua ona maua. O mea ia e finau i le taimi e tasi, peitai ua o matou tatalo i le Alii, ia agalelei i lau Susuga i le Komiti Tumau, lau Afioga i le Minisita o Tupe. O oe lea e te taimataliina le faamoemoe o le malo, e te taulamua, e te lagalaga mea.

O le agaga faafetai, e le mafai ona e aveesea ai le tulaga i le vaavaaia o le puipuga lelei o le faaogaina o seleni a le malo. Malo le fai o le faiva, talia e lenei itumalo le Tala Faatatau o le Tupe 2017/2018.

Ona ou oo mai lea i talosaga a lenei itumalo, so o se tagata soifua lava, e i ai ona manaoga. Ao manaoga foi e fai fuafua i le tamaoiaiga o si o tatou itumalo. O lea e faafoe i outou aao, aiga Minisita. E lelei ona ou faasolo mai, i le tulaga o lo o faataoto ai le faamuamua a lo tatou malo, Vaega o aoga.

Lau Afioga i le Minisita o Aoga, malo, faafetai. O le talosaga vaivai a le itumalo, e 2 Primary Schools i totonu o Gagaemauga Nu 3. Ua uma foi ona ou feiloai atu, o lo o moomia ni faiaoga faamolemole. O Laumoliapi Primary School i Avao, e 8 vasega ae 6 faiaoga. Ou te tatalo ai i lau Afioga, faamolemole ua moomia le fesoasoani i le taimi nei, moomia ni faiaoga lelei mo la matou Primary School i Laumoliapi.

E faapena foi la i Tuutaga Primary School i Fagamalo, e 8 vasega 7 faiaoga i lau asiasiga sa i ai, lea sa ou talanoa atu ai i lau Afioga. E toe faamanatu atu o na e iina le tofa, ae moomia se isi faiaoga. O totonu o vasega taitasi, e tai 20 e tai 30 tamaiti. O le agaga lea, afai e le atoa faiaoga, silasila la i le ratio, o lona uiga, e 40 ma ona tupu tamaiti o la e auai i ai faiaoga. O le agaga lea lau Afioga i le Minisita o Faiaoga, matou te faasoso atu ai ma le agaga faaaloalo.

21 IUNI 2017

**Tulafono Tau Faaofi o le Faatatauina o Tupe 2017/2018
- felafolafoga i luga o le faitauga faalua**

O le fesili lau Afioga, se faamolemole po o fea o taoto ai le polokalame foi lea a tatou ma le au pisikoa? Lea e ofo mai ai fesoasoani i mea tau faiaoga. O le tasi lena talosaga a lenei itumalo, aua e pei o pisikoa ia e o mai e i ai le tomali i mea tau Science, ao mataupu ia o lea e moomia lava e Pule Aoga ni faiaoga. O le mea lea ou te tatalo atu ai, ia sei silasila ane i la matou talosaga.

Lau Afioga ou te manatu e le o toe po se lilo i lau silasila i Vaipouli, le mea sa i ai le Kolisi i aso ia. Tasi lea nofoaga e ese le matagofie, o le matou tatalo i lau Afioga, pe le ua talafeagai ona silasila i ai lau Matagaluega ma le malo lea na taua i se lauga i le taimi ua sola. Mo mea o Technical Institutions, nai aoga foi ia e ao ai le kuka, ao ai le suisui, ao ai le kamuta nai mea faapena mo Salafai e amata lemu ai lava. E pei ona taua foi, a silasila i le tulaga e pei ona i ai le APTC, ou te leo mautinoa i la outou feagaiga ma le APTC, a ua uma ona ou alu lava talanoa i le Pule, pe leai ni avanoa e toe faatu ai ni mea faapea i Savaii. Lea lava ua silasila iinei vaitau, oka se matagofie. Lea foi na taua e se tasi o usufono, afai e lelei aoga ia, o le tasi lea fesoasoani tele mo le malo ma tatou. Aua foi o le a maea ona alu lava lea o le tagata ia e faatu lana pisinisi laititi. E atiae ai lona aiga ma le itumalo, aemaise Gagaemauga ma Gagaifo.

O le agaga maualuga lea o lea e tau avatu ai, o la e tele ina taoto fale i le taimi lenei vagana ai le falemai. A ua tapena le itumalo, o le a lava se taimi, o le a se aso, e tepa ai le tauala i lau Afioga i le Minisita, sauni le itumalo e tali fiafia ao le faamoemoe lea, ina ia mafai ona atiae a tatou fanau, i tulaga o le fai pisinisi, tulaga o le atinaega o le atunuu. A lea e faailoa i le Tala o le Tupe, tofu sao uma, tofu le tagata ma lana maa e togi, ao le isi lea auala ma le faaaloalo.

E faaiu atu se matou faamatalaga i lau Afioga i le Minisita onosai, o le maitau a lenei itumalo ma lenei usugafono, e alualu lava le aoga a le tamaititi i le Year 8 vaega foi lea e tau i le Year 10, ia ona pei lea e foliga ua motu ai iina le faamoemoe o se tamaititi. E leo i ai se fuafuaga mamao a le Matagaluega e tapena ai, alo ma fanau ia, i se isi foi laasaga ua le ausia, ia mea masani lea e mafai ai ona autovaa mai i Tumua nei i aoga lelei Iunivesite. Ae o le talosaga ma le faaaloalo, e leai sina fuafuaga faapena, ou te talitonu e tele le faatalanoaga. E nao ona tuutuu atu i ou tafatafa lau Afioga, alualu mamao fuafuaga a le malo, e tatau lava ona i ai se polokalame a le au drop off ia. O le vaega tonu la lea ua sau ai le vaega lea o le sauaina. Aua foi e foliga ua i ai le manatu ua tuulafoai i latou, aapa i ai le aao o lau Afioga, ioe, ua e silafia le tulaga o mea nei. Afai foi e le o aoga, ae a taaloga. O lea foi na ou talanoa atu i le tatou maea fusu, o la e lava e tautau. Ua uma ona i ai le fale, ua i ai maea, toe lava o nisi mea e fai ai kalapu ma amata loa, ma alu loa fusuaga aua o le tasi lea taaloga e tautau ai tatou. O le Itu o Tane aemaise i i Fagamalo ma Avao, e numera tasi i le taaloga lea. O le mea lea lau Afioga, e toe silasila ane lava i ai i nai talosaga na, a tele atu, ia fai na o se tasi ae tiai le isi vaega pe afai o finagalo lena.

21 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga i luga o le faitauga faalua**

Ona ou oo mai lea i lau Afioga i le Minisita mo Faatoaga ma Faigafaiva, malo onosai. E le auai lou sui usufono i le tulaga o le taofi o le mea lea o le SACEP le polokalame, e le auai. Ou te momoli atu le faafetai tele, ana leai le polokalame lea, e leai ni manupapalagi, o atinae o nuu ma alaafaga. O i i lo matou nuu uma o lo matou itumalo, e matou te moomia lava le polokalame lea. O le a ou le oo i tua i tulaga o process ma isi mea uma. Lau Afioga i le Minisita, lototoa e faaaau. Aisea? Afai e le aoga i isi itumalo e aoga i isi itumalo. O le mea lea ia toa lou loto, e tauave pea le polokalame. E pau lava sina mea laitiiti la e taoto ai lau Afioga i le Minisita, se o le faafaigata ona fai o form foi ia e apalai i ai tagata e entitle i ai i le mea lea. A o atu nei awareness ma faalauiloa le SACEP, manaia ia o le kilivaina o le message i afioaga taitasi. Ae a agai mai loa e fai le mataupu lea, pei o i lea e fetauai ai le auvaega lea e o atu i tua ma le staff i totonu o le ofisa. E toe tatalo atu i lau Afioga, se i toe silasila ane i ai, e faafaigofie. O le ala foi lea o le tuai ona faaoga o seleni ua oo mai le taimi ua tataua ona faamaea ae o la e tele le seleni o totoe, ia o le agaga lena, o le faafaigata ona fai o le process. A o le mea ia, o le faigofie ia lau Afioga. Ia a o tagata lava e latou te suia atoa le ata o lea e aumai ai le fesoasoani mo le tatou atunuu.

Ua e silafia le vai o Satoalepai, tasi lea vai sa taumafai ai le atinae o le tilapia. Ou te tatalo atu i lau Afioga, se i toe silasila ane lava i ai, e toe moomia le faamalosi, ma le mea lava lea o le asiasi, asiasi, asiasi atu le mamalu o le aufaigaluega ia ma toe aoao ma toe fai faalelei. Aua o lau suesuega, o le ia lea o le tilapia, tasi lea ia e moomia tele i Tutuila, e moomia tele. O lona uiga, a lelei ona atiae, o le tasi lena o faamanuiaga mo lena itumalo. O le mea lea ou te toe tatalo atu ai i le tatou atinae o le tilapia...

FOFOGA FETALAI: Toe lua minute o le sui usufono.

Tofa NAFOITOA TALAIMANU KETI: Alofagia le faamoemoe o lo matou nuu i Satoalepai.

Ona ou oo mai lea i le falemai le soifua maloloina. Lau Afioga e faaauaala atu i lau Afioga, e fia momoli atu le faafetai tele i le afioga i le alii pule lea i Salafai, i lana galuega maeaea o le taumafai lava ia mafai ona tofitofi atu fomai i lea vaiaso ma lea vaiaso, e ui lava ina tasi i le vaiaso, ae momoli le faafetai. O le taumafaiga ma le galuega a le tagata le effort, o le mea lea e faaauaala atu i lau Afioga i le Minisita, e momoli aloaia i ai se faafetai tele i le tamalii o lo o vaai Tuasivi. E oo foi la i tulaga sa faaletonu ai vailaau, o lea ua uma o la ua matua lelei atoatoa. O le mea la lea lau Afioga, o ou mama na.

Ona ou oo mai ai lea i galuega tetele a le Malo, ia lau Afioga i le Minisita mo Galuega tetele a le Malo, o lea ua talanoa lava i mea ia o website ma mea uma faapena, o lea ua i ai le website ua ou iloa ai, na ou iloa ai lau lisi la e i le ofisa, ioe, ou te iloa mamao atu lava. Ou te faafetai o lena ua numera lua lo matou itumalo, faafetai. O le mea la lea, o ou mama na.

21 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga i luga o le faitauga faalua**

Na ona matou tuutuu atu i ou tafatafa le nuu o Safai ua agai uma i uta, o le leaga ia o le auala, e ai i le pefu i le taeao se i oo lava i le taimi e momoe ai, taatia ia le auala galue i se isi taimi, a o le mea o lo o nopiai ai le mamalu o lenei nuu ma lenei afioaga, ou te tatalo atu, se i faamolemole se i silasila ane i ai, o le mea sili o lena e numera lua i lau lisi.

FOFOGA FETALAI: Ou te musu e faalavelaveina le saunoaga a le sui usufono, masalo ua tali maea ma ua maea le taimi o le sui usufono, ae faamaea mai le saunoaga.

Tofa NAFOITOA TALAIMANU KETI: Lau Afioga i le Fofoga Fetalai o lea ua faamaea atu, faafetai.

Ona ou oo mai lea i le Afioga i le Minisita mo le Punaoa Faalenatura ma le Siosiomaga, e leai na ona tuitui atu, ae ou te iloa o lena e maua uma lava i le website lea ou te iloa o lena e iloa ai le lisi o lena e pito mai i luma lo matou nuu. O le mea lea, I salute, faafetai tele o lea ua alofagia lenei nuu, ua leva ona leai se taligalu ua aia uma Fagamalo, aua tasi lenei nuu e tele faletalimalo, le Lagoto, le Lagoon o fale matagofie e afifio atu i ai le Malo. Ia o le agaga maualuga, ia na ona lalafo atu, faamolemole se i silasila ane i ai i lau lisi o lena ua maea ona tuuina atu le talosaga tusingusia, ia o ou mama na le Sao Faapito.

Ona faamaea atu lea o sa matou faamatalaga, faafetai tele i le avanoa i lau Afioga i le Fofoga Fetalai, e ui lava ina ou iloa ua ova ou minute, ia ae o lou silasila i lo ta vanonofo ai, o le mea la lea, ia alofagia e le Atua o toega o totoe o le Fonousu o le atunuu, ia i ai le agalelei o le Atua. Le tapuaiga a lou itumalo, ia o lena ua outou faafofoga mai, e taumafai lava so tatou leo e taua le faafofoga mai i tulaga o lo o i ai le taumafaiga o nai atinae aua le manuia o si o tatou itumalo. Ia manuia le Fonousu a Samoa, faafetai.

FOFOGA FETALAI: Malo faafetai. E aumai lava le talo matua e toa le moa, vaeatu le faafofoga tapuai mai a le atunuu. Malo faafetai saunoa i lau Afioga i le Sui Fofoga Fetalai.

Ma o le avanoa foi lenei mo se isi sui usufono e saunoa e tusa ai o le tatou galuega. E fautua atu i le tatou Palemene i sui usufono aua le maimaua le tatou taimi, e manatu o le tatou galuega ina ia mafai ona....ia vave foi ona tuu atu i le Palemia ma le Kapeneta e faatino mea sa outou talosagaina aua mea e fia faaleleia o itumalo ma atinae.

E maitauina ua lava foi ma totoe sui usufono na saunoa e tali ai le Malo, ua manatu foi i se tulaga faapena, aua e le iloa pe tali le Malo ia ona faamalieina uma lava lea o outou finagalo e pei ona taoto i ai ia finagalo e saili ai se manuia aua itumalo o lo o faafofoga mai.

O lea ua faailo mai se tasi o sui usufono matua o le Palemene le sui usufono mo Palauli le Falefa. Ia tulai maia lau Afioga o le sui usufono matua o lena itu o le Maota e malele ma e saunoa.

21 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga i luga o le faitauga faalua**

Afioga Hon FAUMUINA TIATIA FAAOLATANE LIUGA (Palauli le Falefa): Faafetai i lau Afioga i le Fofoga Fetalai. Ia ou te iloa foi o le manaia foi o le faamulimuli aua ua leai lava ma se isi o toe faafogafoga mai ua vaivai lo tatou Maota, ae le afaina.

Faafetai atu i lau Afioga i le Fofoga Fetalai mo le avanoa, faafetai i lau Afioga i le Palemia le Sui Palemia ma le mamalu o le Kapeneta, faapea foi ia Minisita Lagolago sa faatalitali pea pe i ai se Minisita Lagolago e fia saunao, ou te iloa e uma loa au ona faauma lea e le tatou Taitaifono o le Komiti, ia ona tatou malolo ai lea ae tali le Kapeneta i le taeao a taeao. Faamalo le tapuai faamalo le onosai.

Ia si ou itumalo ia tapuai mai o le a fai so tatou sao i le tulaga o le Tala o le Tupe. I le tulaga lava i le Tala o le Tupe lau Afioga i le Minisita o Tupe faamalo, faafetai mo le sauniuniga o le Tala o le Tupe. Ou te iloa foi o lena ua e silasila i le Lipoti a le Komiti, ia ua maea ma ua uma ona tuuina atu uma ia vaega ia i le tatou Malo mo le faaauauina o le faatinoina o galuega faataatitia a lo tatou Malo mo le tausaga faaletupe o le a amataina i le aso 1 o Iulai i le masina fou.

Lau Afioga i le Fofoga Fetalai, ou te matua lagolagoina le Tala o le Tupe pei ona faataatia mai. E tasi lava le vaega ou te fia avatu ai le faafetai ona o Faaiuga a le Kapeneta e siitia mai ai ia auaunaga ia Tuasivi, pei o le Ofisa o Faamasinoga faapea foi le Faaululuga le Ofisa Ulu o Leoleo. I le tulaga lea e pei ona faatofalaiga i ai le Kapeneta, e momoli lau faafetai, ona o le amanaia o le faataua e le gata o le atinaeina o le taulaga i Salelologa, ae o le a taugofie mo i latou uma e faimalaga i Salelologa ia ma toe foi foi i o latou afioaga.

Ou te faafetai i le tulaga e pei ona faataatia mai ai ia tupe e siitia ai le Ofisa o Faamasinoga i le Tala o le Tupe, ae ou te le o maua i le Tala o le Tupe ni tupe faaagaaga mo le siitia o le Ofisa o Leoleo.

Ou te iloa se i e silasila ane lava i ai lau Afioga i le Minisita ona o lea sa tuatuagia ia le Matagaluega ia ma tulaga foi e pei ona silafia e lenei Maota, e moomia ai ia se fanua ona taufai 4 eka leoleo ae 2 eka le Faamasinoga, ma se tulaga e faatino ai a latou fuafuaga mo le siitia i le tausaga lea a gafua nei. O lea foi na faafogofoga le tatou Maota nei i le naunautaiga lava o ou uso mai Savaii ina ia amata ona tatou vaavaai i le tulaga e fesoasoani ai i le galuega foi o lo o taumafai i ai ia nai toeiina ma loomatutua i Savaii i le taugata o le aumaiga o faaeleeleaga e ave i fafo e ui mai i Upolu nei.

E pei o le ala lena o lea e naunau ai, ae o le a oo i ai sau faamatalaga i le auala e faatupe ai le vaega lea ina ia aua e te popole, e aumai i le Tala o le Tupe. O le auala lea ou te mafaufau e tuualalo atu i lau Afioga i le Minisita o Tupe, e faaoga le concert foi lea o le PPP, o lea e i ai tupe a le NPF toetiiti lava \$50milion, ae o la e mananao e sue ni a latou paaga latou te fia paaga. O la foi e i ai tupe i le SIFA, o la foi e i ai tupe i le ACC, ae uma foi e toe recover lava i cost o le faaogaina o le uafu.

21 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga i luga o le faitauga faalua**

Ae pei la o nai tuualalo na e vave ai ona fai le tatou uafu, aua a fai le uafu, ua taugofie le aumai o container e auma i Savaii e o sao lava i Niu Sila, e o sao i Ausetalia e le toe oso mai iinei, ma e le toe u ai a tatou talo, aua o le siana lea e taua e u ai talo, e maua ai tatou aua e umi ona sau iinei toe alu i Niu Sila po o Ausetalia, e tasi lena auala, o le tulaga lena pei ona i ai.

O lau tuualalo, ou te iloa e le i lelei ona faufautua le Matagaluega i lau Afioga, na ou ofo lava ina ua leai se Tala Faaopopo o le Tupe, e ala ona ou popole, a feaveai tupe mai le isi Matagaluega i le isi Matagaluega, e manaomia le tulafono e feaveai ai, ia ae o la e i ai au tupe faasao i le Tala o le Tupe lea e uma i le vaiaso fou. Ia o lea la e fiafia le aualii ia fai mai e lelei o lea e i ai tupe mama le faaaogaina, ae o se mea le lelei o lea e tele o tatou mana o le o uma. O lea e i ai le falepuipui ua leva ona approve e le Kapeneta, o lea e i ai le faaleleiina o le fale e aumai i ai le UN, ua uma foi ona approve e le Kapeneta. O mea ia ua leva ona e silafia ma matou iloa e tatau ona tatou silasila lelei i ai lau Afioga ma le Matagaluega. Ou te iloa e le o lelei ona tuualalo atu ma fautua atu le Matagaluega, sa tatau lava ona fai se Tala Faatatau Faaopopo o le Tupe, leaga e tele mea ia e moomia, ia na matou fesili i lau Matagaluega ae fai mai na o le tai \$50,000. A o galuega ia matou te iloa, e ova i le \$10miliona le mea e moomia. Ae o le mea lea ou te popole ai aua o lea e tele tupe i le Tala o le Tupe lea o le a amata, i ne i safia le Tala Faatatau o le Tupe mo le 2017/2018, you wants e tuua mai le Tausaga Faaletupe i le Tausaga Faaletupe o muamua nei. O lau fesoasoani atu lea i lau Afioga se i e silasila i ai, leaga e moomia le feaveai po o le fetuunai o tupe i tulaga faale-Tulafono.

Lau Afioga, o galuega fia faalelei le Afioga ia Papaliitele. Na ou talanoa atu i lau Afioga i lou auala lea na pasia e le Tenders Board i le Paeaiga lea na tea nei. Ae fai mai ou te lauga atu ai, ia lea la o le a ou lauga atu. Na pasia e le Tenders Board i le nofoaiga lea na tea, approve e le Kapeneta, ae le faia.

Ia sei vaai ai i le faaletonu, ona tau ai lea e au o au e lou itumalo ou te pepelo. Sole ou te le pepelo, afai e faaolaina lau Afioga faaolaina au, e ta te le talanoa i le mea o le pepelo.

Ua olegia si ou itumalo ona ua ou fai i ai, ua uma ona talia le tatou auala i Sili. Ae o Sili, ua matuai certify ia Sili, i le le faaaogaina o vailaau, organic farming, lea matuai 100 pasene. Ma ua uma foi ona pasia faaletulafono, i kamupani mai Niu Sila ma Ausetalia, e le faaaogaina o le vailaau.

Lau Afioga Papalii, a faapea ua faasala si ou itumalo po o si ou nuu o Sili, i le le faia o le auala, faa 4 kilomita po o le 5 kilomita ia tatau ona fai ai, ia malilie ai nai toeaia ma ia tele ai talo e aumai e ave i Niu Sila, aua e organic. Organic le popo, organic mea uma lava i totonu o si ou nuu lea.

E i ai foi ia le na ou tuualalo i lau CEO a le LTA, lea na faapea e te lua asiiasi i le vaiaso lea, ia ae tau mai e lei oo. Na ou taua i ai auala, auala o le malo la e feoai ai pasi. E feololo ai auala o Falelauniu i le auala lea i le va o Gataivai ma Sili. Na fai i le 2002 e oo mai i le taimi lena, ua leai lava ma se ta o toe i ai ua ta fiu e talosaga.

21 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga i luga o le faitauga faalua**

Ia ae tatalo atu i lau Afioga Papaliitele, sei tagai ifo i le auala lea, e sau i le faleaoga o Gautavai e oo i le aai tuai o si ou nuu o Sili. Ia e faapea foi i le va o Puleia ma Gautavai uta sei e silasila i ai ua uma ona faailoa atu i lau Matagaluega.

O le si au uo o Loau, ou te le malie i le mea lea faapea o oe e matua le popoi lava, leaga ou te alofa ia te oe. E a foi, o le mea lea ou te fia, o faleaoga foi lava, ae o le a ou le fai atu i faleaoga ae o le a ou alu e sue ni au sponsors. Ae o lipoti faaletausaga a le tatou Matagaluega, e 43 po o le 44,000 tamaiti o le Year 1 to Year 8 Public Schools e le o aofia ai Private Schools. O lona uiga e sili atu pe a faaopopo i ai ia aoga tutoatasi. E oo mai i le vasega 9, e oo i le vasega 13 e toe 17,000 tagata la e totoe. O le mea la e i ai, o fea ua o i ai le 20 ma ona tupu afe lea e totoe? Fea o o i ai? Ia o lea ua ou faalogo atu, o le a fai Tulafono e aua ai le toe vaai i luga o auala i tamaiti faatau oloa. Oi o le a fai la lona Tulafono ae fea o le a o i ai tamaiti ia ua le fia aoga? E tatou te fiu lava e ave le solofanua i le vai, a le fia inu lava e le fia inu.

E le o le leai o ni tupe le faafitauli, ua matatupa le mafaufau tulou. A matatupa loa le mafaufau ona sue lea o se mea e toe ola ai. O le mea la lea o lau fautuaga, fai ni nai aoga foi ia e faaaoao ai ia le faitauga o tupe, ma le faatau o fasimoli, faatau o mea o vili taliga, o afitusi, aoao faapena, o le tou mea lona e fai. Ae o le a tutuli la tamaiti o fea le mea e o i ai?

O au foi sa ou faia le mea lona, o lea ou te fai atu leaga na ou faia o lou alofa i ou matua. Aisea? E leai se tupe ou te pasese ai ma totogi ai lau aoga. E fai i luga o le alofa, ae le o le fai i luga o le pologa. O lona o le a o mai papalagi fai mai e aua, a aua o le mea na outou soifua ma ou ola ai. A fai le Tulafono, e pau o le mea, e gata le tamaiti fealua i le 6 po o le 5, pau lava lea. Ae o le faasa o tamaiti e aua le feoai ma mea ia, ia o le a la le mea o le a fai? Alu i taulelea, fai le aualumaf

Tofa Olo Fiti Afoa Vaai: Lau Afioga i le Fofoga Fetalaií .

FOFOGA FETALAI: O lo o i ai le faauilavea. Tulai mai le sui usufono lea.

Tofa Olo Fiti Afoa Vaai: Pei ona saunoa le sui mamalu o laua ma le Minisita o Galuega e le pepelo ae o lea ua pepelo mai. E lei faatau ni afitusi i lona vaitau ao talavou le soifua o le sui.

FOFOGA FETALAI: Ia se i saunoa ia.

Afioga Hon FAUMUINA TIATIA FAAOLATANE LIUGA: O le sui usufono lea sa tulai mai nei, lea fai mai e vaai ni kamupani e ao ai le atigiapa ma atigifagu, o le mea lona na pau ai gau le vae. Aua foi ua lau pogisa i le kalapu lea e i le pa solofanua. O i ina na lavea ai, lavea gau le vae. E le i fonu, ua outou faafofoga mai la i le lauga a le tamaloa e le i fonu i le matou komiti. Ua ta fiu e faamalalama i ai le Tala o le Tupeí .

21 IUNI 2017

**Tulafono Tau Faaofi o le Faatatauina o Tupe 2017/2018
- felafolafoga i luga o le faitauga faalua**

FOFOGA FETALAI: E faamalulu atu i le sui usufono, leaga e toatele sui usufono lena e tusi i ai lou aao, ae faapitoa i le sui usufono mo Salega i Sasae. Saunoa le sui usufono.

Afioga Hon FAUMUINA TIATIA FAAOLATANE LIUGA: Ia se ua galo foi ia te au, o Olo ai foi le suafa oí .

FOFOGA FETALAI: O lena e lavea ai ma Pau, o lena e lavea ai ma Pau i le tusiga o lou aao, ae leai e na o Olo Fiti naí .

Afioga Hon FAUMUINA TIATIA FAAOLATANE LIUGA: Oi Olo Fiti, ia leai la o le Afioga ia Olo Fiti. O le uo mamae ia a o le tagata foi o le matua le popoi lava. O le mea la lea, e le o pepelo lau tala lea e fai atu.

Leaga o mea sa ou faia, na ou faatauina popo ma sua, na ou fealuai ma au. Na ou faia le umu fai le umu luau ou alu faatau, e faatau i lalo o pou paipa o le uafu i Salelologa i aso lava la o feoai vaa laupapa. O lau mea lena na fai. E fai o lou alofa i ou matua, ou te lei faia ona e faapologa au. Na ou faia ia ou aoga, e fesoasoani i lou aiga. Aua tatou te faasa, oi o le a faasa o le mea na outou soifua ma ou ola mai ai, ia amuia le tagata. Ou te iloa e na o Fonotoe lava e le i fealuai i se mea faapena.

Tofa Hon Laufo Fonotoe Nuafesili Pierre Laufo (Anoamaa Sisifo): Lau Afioga i le Fofoga Fetalaií .

FOFOGA FETALAI: Ia se i tulai mai ia le...

Tofa Hon Laufo Fonotoe Nuafesili Pierre Laufo: O au foi sa faatau popo, sa faatau au popo i le maketi. Ae faapena le tulaga sa i ai, e malamalama lelei i ai. Ia ae ina faaaauau ia le saunoaga a lou uso, sei uma ona ou tulai atu lea e fai sau lauga.

FOFOGA FETALAI: Malo, malo faafetai.

Afioga Hon FAUMUINA TIATIA FAAOLATANE LIUGA: Ou te iloa e faaaauau taeao au, ae faafetai atu i le., O le mea lena Loau, oka oka se toatele o tamaiti. O le matou nuu i Sili, e nao na le aoga lava o le tagata, taulelea loa, aualuma. Ou te alu atu, e tai 12 tai 13 tausaga o tamaiti lea i totonu ii. Ae a pese mai le tamaiti i le faasoaga o le ava, oka o la le matua maoae, fafeo i le taufafo, tama ia, e i ai tagata e susu vae pe a fai atu e sau e folafola le ava. A o le aulaiti nei, e tasi lea auala lea ua aoao i le fononua a nuu, e nonofo ai i totonu, folafolaina o ava, o le taufafo, so o se mea.

21 IUNI 2017

**Tulafono Tau Faaofi o le Faatatauina o Tupe 2017/2018
- felafolafoga i luga o le faitauga faalua**

Tasi lea auala e aooga ai, ae le faapea a le alu i luga o le vaega 9, ma alu i luga i le vasega 13, ia aua o lea ua amata ona tatou faia le galuega, mo matai Samoa, i le lumanai. E le vale, ae faafetai i le malo, lea ua faaaoga tamaiti e o atu i lalo, e tau i le vasega 11, sa tataua ona tau i le vasega 13, faaaauu i le 13, na iloa ai lea o le matua e le popoi lava.

O le isi vaega lau Afioga, e si ou uso a Minisita mo Faatoaga ma Faigafaiva manaia, malo, vaai ni avanoa aua o lea e fai mai ia le Tala o le Tupe, avanoa tutusa. O lona uiga, e tutusa lava Savaii ma Upolu nei. E ogatusa lava, ma le Anavatau o le HRPP, òo le mea e lelei iinei, e lelei foi i Savaii. Tatou o e fau ia Savaii, ona tatou faamama avega lea, e pei ona tau i le tele o saunoaga, ia o le a laititi foi tamaiti e omai iinei, talepe fale pe feoai foi i le auala, pe a taofiofi lava o tatou tagata i Savaii, e galueina ai ia le tulaga, o a tatou eleele. Ia ma o le lelei foi, aua a fai lo tatou uafu i o, o sao lava lea. Alu atu le vaa foi lea o le Cruise ship, ia faatoa vaai foi lea o nai tagata Savaii i le tele o tagata papae e feoai solo ma faatau ai ni esi, faatau ai popo, faatau ai niu, faatau ai kukama, ia ma maua ai foi isi seleni mo pisinisi a i latou o fai i Savaii.

Lau Afioga i le Minisita mo Faatoaga ma Faigafaiva, e a foi e taua foi le tou silasila, ae saili se tupe, maimau pe ana i ai se tupe o i le Budget, e fai ai le commercial arm o le SROS. O lenei organisation ua 10 tausaga, ua uma na develop products, ae le i oo atu lava i se tulaga e., O le mea la e moomia, a ua leai se Private Sector e latou te moomia ia prioducts ia, fai loa se Commercial Section a le SROS, ae ave i Savaii e fai ai, tele eleele, tele fua o faatoaga. Ma e mafai foi ona ave i ai se 100 eka i tatou fanua ia i o i gauta tonu lava o Pau, e aumai ai se 100 eka e toto ai le avoka, toto ai mea e mafai ona develop aua o la e tele eleele lelei i Vaiaata, matuai tele eleele iina, ia ma e aoga foi o lea e tele eleele o le malo i Vaiaata.

O le isi mea lea ua galo ia te au le mea lea Loau, o le NUS. O lea ua i ai le latou lala i Salelologa ae manaomia se 50 eka latalata i le sami, i i Salelologa tai, e ave e faatu ai i ina ia le NUS. A alualu lava ua Head Quarter ia Savaii, ae lala i i Vaivase. Aua ua tataua foi ona ave nisi mea lapoa, e faamanaia ai si o tatou motu, aua o la e tele eleele toe 300 ma ona tupu ia eka la e e le i faaaogaina i totonu o le taulaga i Salelologa.

E na o le 100 lava eka la ua uma ona fua, ia ma le mea la ua i ai Don Bosco, si tamai 8 eka na iina, ia ma le isi 8 eka la e ave e le EFKS e fai ai foi le latou Vocational School. Ae se i e fesoasoani ifo vaai se 50 eka e ave ia Lau, e o e amata loa ona teu, ia ma sue foi ni sponsors e fai ai aua e le faapea e faigofie. Ua toe alu le palota lea i le 2021, ae ua ma o atu ma Sili ua matua lelei lava ia Salelologa, ia ona e vaai laia i ai e matua manaia lava o lea vaega.

FOFOGA FETALAI: Ou te faamalie atu i le sui usufono mamalu o lo o saunoa. O lea ua tatou toai taunuu i le tatou taimi manava. E i ai le manatu o le nofoa, o le a faaaauu lau saunoaga i le aso a taeao, toe 5 au minute. O le mea la lea, ave ia lenei avanoa e momoli atu ai le faafetai ma le faamalo i sui usufono mamalu uma sa saunoa i lenei aso fonu.

21 IUNI 2017

**Tulafono Tau Faaofi o le Faatatauina o Tupe 2017/2018
- felafolafoaiga i luga o le faitauga faalua**

Ia momoli atu foi le faafetai ma le faamalo i le Taitai o le Malo ma le Kapeneta faapea sui usufono mamalu uma, o Faauluuluga o Matagaluega ma Faalapotopotoga o le Malo faapea foi le Ofisa o le Fono Aoa.

O le mea la lea, ae tatou te le i tolopo, o le a ou faaiuina le tatou Fonotaga i se tatalo.

Na motusia Felafolafoaiga ina ua tolopo Tualumaga a le Fono Aoa i le itula e 7:00 i le aftafi seia aulia le itula e 9:00 i le taeao o le Aso Tofi , 22 Iuni 2017.